

লোকসাহিত্য

বসন্তোৎসব

तमसो मा ज्योतिर्गमय

VISVA BHARATI
LIBRARY
SANTINIKETAN

T4

2

375209

লোকসাহিত্য

রবীন্দ্রনাথ ঠাকুর



বিশ্বভারতী গ্রন্থনবিভাগ
কলিকাতা

ପ୍ରକାଶ ୧୭୧୫

ପୁନର୍ମୁଦ୍ରଣ ଶ୍ରାବଣ ୧୭୭୭

ସଂସ୍କରଣ ମୌସ ୧୭୫୧

ପୁନର୍ମୁଦ୍ରଣ ଆଶ୍ୱିନ ୧୭୧୧, ଆଶ୍ୱିନ ୧୭୧୧, ଶ୍ରାବଣ ୧୭୭୧, ଯାବ ୧୭୭୭

ଫାଲ୍ଗୁନ ୧୭୧୦, ଅଗ୍ରହାୟଣ ୧୭୧୧, ଶ୍ରାବଣ ୧୭୧୭, ଆଷାଢ଼ ୧୭୧୧

ଫାଲ୍ଗୁନ ୧୭୧୧

© ବିଶ୍ୱଭାରତୀ

ପ୍ରକାଶକ ଶ୍ରୀଧାନ୍ତଶେଖର ଘୋଷ

ବିଶ୍ୱଭାରତୀ । ୭ ଆଚାର୍ଯ୍ୟ ଜଗନ୍ନାଥ ବହୁ ରୋଡ଼ । କଲିକାତା ୧୧

ମୁଦ୍ରକ ଶ୍ରୀରାମଗୋପାଳ ବନ୍ଦ୍ୟୋପାଧ୍ୟାୟ

ସାଭିସ ପ୍ରିଣ୍ଟର୍ସ । ୧୧/୭୫ କାଳୀଚରଣ ଘୋଷ ରୋଡ଼ । କଲିକାତା ୧୦

ছেলেভুলানো ছড়া	...	৫
ছেলেভুলানো ছড়া : ২	...	৪৯
কবি-সংগীত	...	৭৭
গ্রাম্যসাহিত্য	...	৮৭

ছেলেভুলানো ছড়া

বাংলা ভাষায় ছেলে ভুলাইবার জন্ত যে-সকল মেয়েলি ছড়া প্রচলিত আছে, কিছুকাল হইতে আমি তাহা সংগ্রহ করিতে প্রবৃত্ত ছিলাম। আমাদের ভাষা এবং সমাজের ইতিহাস-নির্ণয়ের পক্ষে সেই ছড়াগুলির বিশেষ মূল্য থাকিতে পারে, কিন্তু তাহাদের মধ্যে যে একটি সহজ স্বাভাবিক কাব্যরস আছে সেইটিই আমার নিকট অধিকতর আদরণীয় বোধ হইয়াছিল।

আমার কাছে কোনটা ভালো লাগে বা না লাগে সেই কথা বলিয়া সমালোচনার মুখবন্ধ করিতে ভয় হয়। কারণ, যাহারা স্ননিপুণ সমালোচক এরূপ রচনাকে তাঁহারা অহমিকা বলিয়া অপরাধ লইয়া থাকেন।

তাঁহাদের নিকট আমার সবিনয় নিবেদন এই যে, তাঁহারা বিবেচনা করিয়া দেখিবেন এরূপ অহমিকা অহংকার নহে, পরন্তু তাহার বিপরীত। যাহারা উপযুক্ত সমালোচক তাঁহাদের নিকট একটা দাঁড়িপাল্লা আছে; তাঁহারা সাহিত্যের একটা বাঁধা ওজন এবং সেইসঙ্গে অনেকগুলি বাঁধি বোল বাহির করিয়াছেন; যে-কোনো রচনা তাঁহাদের নিকট উপস্থিত করা যায় নিঃসংকোচে তাহার পৃষ্ঠে উপযুক্ত নম্বর এবং ছাপ মারিয়া দিতে পারেন।

কিন্তু অক্ষমতা এবং অনভিজ্ঞতা-বশত সেই ওজনটি যাহারা পান নাই, সমালোচনস্থলে তাঁহাদিগকে একমাত্র নিজের অনুরাগ-বিরাগের উপর নির্ভর করিতে হয়। অতএব সেরূপ লোকের পক্ষে সাহিত্য সম্বন্ধে বেদবাক্য প্রচলিত করিতে যাওয়াই স্পর্ধার কথা। কোন্ লেখা ভালো অথবা মন্দ তাহা প্রচার না করিয়া কোন্ লেখা আমার ভালো লাগে বা মন্দ লাগে সেই কথা স্বীকার করাই তাঁহাদের উচিত।

যদি কেহ প্রশ্ন করেন, সে কথা কে শুনিতে চায়, আমি উত্তর করিব,

সাহিত্যে সেই কথা সকল মানুষ শুনিয়া আসিতেছে। সাহিত্যের সমালোচনা কেই সমালোচনা বলা হইয়া থাকে, কিন্তু অধিকাংশ সাহিত্যই প্রকৃতি ও মানবজীবনের সমালোচনা মাত্র। প্রকৃতি সম্বন্ধে, মহুয়া সম্বন্ধে, ঘটনা সম্বন্ধে কবি যখন নিজের আনন্দ বিষাদ বিষময় প্রকাশ করেন এবং তাঁহার নিজের সেই মনোভাব কেবলমাত্র আবেগের দ্বারা ও রচনাকৌশলে অন্তের মনে সঞ্চারিত করিয়া দিবার চেষ্টা করেন, তখন তাঁহাকে কেহ অপরাধী করে না। তখন পাঠকও অহমিকা-সহকারে কেবল এইটুকু দেখেন যে ‘কবির কথা আমার মনের সহিত মিলিতেছে কি না’। কাব্য-সমালোচকও যদি যুক্তিতর্ক এবং শ্রেণীনির্ণয়ের দিক ছাড়িয়া দিয়া কাব্যপাঠ-জাত মনোভাব পাঠকগণকে উপহার দিতে উদ্যত হন তবে সেজন্ম তাঁহাকে দোষী করা উচিত হয় না।

বিশেষত আজ আমি যে কথা স্বীকার করিতে বসিয়াছি তাহার মধ্যে আত্মকথার কিঞ্চিৎ অংশ থাকিতেই হইবে। ছেলেভুলানো ছড়ার মধ্যে আমি যে রসাবাদ করি ছেলেবেলাকার স্মৃতি হইতে তাহাকে বিচ্ছিন্ন করিয়া দেখা আমার পক্ষে অসম্ভব। সেই ছড়াগুলির মাধুর্য কতটা নিজের বাল্যস্মৃতি এবং কতটা সাহিত্যের চিরস্থায়ী আদর্শের উপর নির্ভর করিতেছে তাহা নির্ণয় করিবার উপযুক্ত বিশ্লেষণশক্তি বর্তমান লেখকের নাই। এ কথা গোড়াতেই কবুল করা ভালো।

‘বৃষ্টি পড়ে টাপুর-টুপুর নদী এল বান’ এই ছড়াটি বাল্যকালে আমার নিকট মোহমগ্নের মতো ছিল এবং সেই মোহ এখনো আমি ভুলিতে পারি নাই। আমি আমার সেই মনের মুগ্ধ অবস্থা স্মরণ করিয়া না দেখিলে স্রষ্টা বুঝিতে পারিব না ছড়ার মাধুর্য এবং উপযোগিতা কী। বুঝিতে পারিব না, কেন এত মহাকাব্য এবং খণ্ডকাব্য, এত তত্ত্বকথা এবং নীতিপ্রচার, মানবের এত প্রাণপণ প্রযত্ন, এত গলদঘর্ম ব্যায়াম প্রতিদিন ব্যর্থ এবং বিন্ধত

হইতেছে, অথচ এই-সকল অসংগত অর্থহীন যদৃচ্ছাকৃত শ্লোকগুলি লোকস্বভিতে চিরকাল প্রবাহিত হইয়া আসিতেছে।

এই-সকল ছড়ার মধ্যে একটি চিরত্ব আছে। কোনোটির কোনো কালে কোনো রচয়িতা ছিল বলিয়া পরিচয় মাত্র নাই এবং কোন্ শকের কোন্ তারিখে কোন্টা রচিত হইয়াছিল এমন প্রশ্নও কাহারো মনে উদয় হয় না। এই স্বাভাবিক চিরত্বগুণে ইহারাজ রচিত হইলেও পুরাতন এবং সহস্র বৎসর পূর্বে রচিত হইলেও নূতন।

ভালো করিয়া দেখিতে গেলে শিশুর মতো পুরাতন আর-কিছুই নাই। দেশ কাল শিক্ষা প্রথা -অনুসারে বয়স্ক মানবের কত নূতন পরিবর্তন হইয়াছে, কিন্তু শিশু শত সহস্র বৎসর পূর্বে যেমন ছিল আজও তেমনি আছে; সেই অপরিবর্তনীয় পুরাতন বারংবার মানবের ঘরে শিশুমূর্তি ধরিয়া জন্মগ্রহণ করিতেছে, অথচ সর্বপ্রথম দিন সে যেমন নবীন, যেমন স্নকুমার, যেমন মৃদু, যেমন মধুর ছিল আজও ঠিক তেমনি আছে। এই নবীন চিরত্বের কারণ এই যে, শিশু প্রকৃতির সৃজন; কিন্তু বয়স্ক মানুষ বহল পরিমাণে মানুষের নিজ-কৃত রচনা। তেমনি ছড়াগুলিও শিশু-সাহিত্য; তাহার মানব-মনে আপনি জন্মিয়াছে।

আপনি জন্মিয়াছে এ কথা বলিবাব একটু বিশেষ তাৎপর্য আছে। স্বভাবত আমাদের মনের মধ্যে বিশ্বজগতের প্রতিবিম্ব এবং প্রতিধ্বনি ছিন্নবিচ্ছিন্নভাবে ঘুরিয়া বেড়ায়। তাহার বিচিত্র রূপ ধারণ করে এবং অকস্মাৎ প্রসঙ্গ হইতে প্রসঙ্গান্তরে গিয়া উপনীত হয়। যেমন বাতাসের মধ্যে পথের ধূলি, পুষ্পের রেণু, অসংখ্য গন্ধ, বিচিত্র শব্দ, বিচ্ছিন্ন পল্লব, জলের নীকর, পৃথিবীর বাষ্প—এই আবর্তিত আলোড়িত জগতের বিচিত্র উৎকৃষ্ট উদ্ভীর্ণ খণ্ডাংশ-সকল সর্বদাই নিরর্থকভাবে ঘুরিয়া ফিরিয়া বেড়াইতেছে, আমাদের মনের মধ্যেও সেইরূপ। সেখানেও আমাদের নিত্যপ্রবাহিত চেতনার মধ্যে কত বর্ণ গন্ধ শব্দ, কত

কল্পনার বাস্প, কত চিন্তার আভাস, কত ভাবার ছিন্ন খণ্ড, আমাদের ব্যবহার-জগতের কত শত পরিত্যক্ত বিস্মৃত বিচ্যুত পদার্থ-সকল অলক্ষিত অনাবশ্যকভাবে ভাসিয়া ভাসিয়া বেড়ায়।

যখন আমরা সচেতনভাবে কোনো-একটা বিশেষ দিকে লক্ষ্য করিয়া চিন্তা করি তখন এই-সমস্ত গুঞ্জন থামিয়া যায়, এই-সমস্ত রেণুজাল উড়িয়া যায়, এই-সমস্ত ছায়াময়ী মরীচিকা মুহূর্তের মধ্যে অপসারিত হয়; আমাদের কল্পনা, আমাদের বুদ্ধি একটা বিশেষ ঐক্য অবলম্বন করিয়া একাগ্রভাবে প্রবাহিত হইতে থাকে। আমাদের মন-নামক পদার্থটি এত অধিক প্রভুত্বশালী যে, সে যখন সজাগ হইয়া বাহির হইয়া আসে তখন তাহার প্রভাবে আমাদের অন্তর্জগতের এবং বহির্জগতের অধিকাংশই সমাচ্ছন্ন হইয়া যায়— তাহারই শাসনে, তাহারই বিধানে, তাহারই কথায়, তাহারই অমুচরপরিচরে নিখিল সংসার আকীর্ণ হইয়া থাকে। ভাবিয়া দেখো, আকাশে পাখির ডাক, পাতার মর্মর, জলের কল্লোল, লোকালয়ের মিশ্রিত ধ্বনি, ছোটো বড়ো কত সহস্র প্রকার কলশব্দ নিরন্তর ধ্বনিত হইতেছে—এবং আমাদের চতুর্দিকে কত কম্পন, কত আন্দোলন, কত গমন, কত আগমন, ছায়ালোকের কতই চঞ্চল লীলাপ্রবাহ প্রতিনিয়ত আবর্তিত হইতেছে—অথচ তাহার মধ্যে কতই যৎসামান্য অংশ আমাদের গোচর হইয়া থাকে; তাহার প্রধান কারণ এই যে, ধীরে ধীরে আমাদের মন ঐক্যজাল ফেলিয়া একেবারে এক ক্ষেপে যতখানি ধরিতে পারে, সেইটুকু গ্রহণ করে, বাকি সমস্তই তাহাকে এড়াইয়া যায়। যে যখন দেখে তখন ভালো করিয়া শোনে না; যখন শোনে তখন ভালো করিয়া দেখে না, এবং সে যখন চিন্তা করে তখন ভালো করিয়া দেখেও না, শোনেও না। তাহার উদ্দেশ্যের পথ হইতে সমস্ত অনাবশ্যক পদার্থকে সে অনেকটা পরিমাণে দূর করিয়া দিতে পারে। এই ক্ষমতাবলেই সে এই জগতের অসীম বৈচিত্র্যের মধ্যেও আপনার নিকটে আপনার প্রাধান্ত রক্ষা করিতে পারিয়াছে। পুরাণে

পাঠ করা যায়, পুরাকালে কোনো কোনো মহাত্মা ইচ্ছামৃত্যু ক্ষমতা লাভ করিয়াছিলেন। আমাদের মনের ইচ্ছাকৃত ইচ্ছাবধিরতার শক্তি আছে ; এবং এই শক্তি তাহাকে প্রতি পদেই ব্যবহার করিতে হয় বলিয়া জন্ম হইতে মৃত্যুকাল পর্যন্ত জগতের অধিকাংশই তাহার চেতনার বহির্ভাগ দিয়া চলিয়া যায়। সে নিজের বিশেষ উদ্যোগী হইয়া যাহা গ্রহণ করে এবং নিজের আবশ্যক ও প্রকৃতি-অনুসারে গঠিত করিয়া লয় তাহাই সে উপলব্ধি করে। চতুর্দিকে, এমন-কি, মানসপ্রদেশেও যাহা ঘটিতেছে, যাহা উঠিতেছে, তাহার সে ভালোরূপ খোঁজ রাখে না।

সহজ অবস্থায় আমাদের মানসাকাশে স্বপ্নের মতো যে-সকল ছায়া এবং শব্দ যেন কোন অলক্ষ্য বায়ুপ্রভাবে দৈবচালিত হইয়া কখনো সংলগ্ন কখনো বিচ্ছিন্ন ভাবে বিচিত্র আকার ও বর্ণ-পরিবর্তন-পূর্বক ক্রমাগত মেঘরচনা করিয়া বেড়াইতেছে, তাহারা যদি কোনো অচেতন পটের উপর নিজের প্রতিবিম্বপ্রবাহ চিহ্নিত করিয়া যাইতে পারিত তবে তাহার সহিত আমাদের আলোচ্য এই ছড়াগুলির অনেক সাদৃশ্য দেখিতে পাইতাম। এই ছড়াগুলি আমাদের নিয়ত-পরিবর্তিত অন্তরাকাশের ছায়ামাত্র, তরল স্বচ্ছ সরোবরের উপর মেঘক্ৰীড়িত নভোমণ্ডলের ছায়ার মতো। সেইজন্যই বলিয়াছিলাম, ইহারা আপনি জন্মিয়াছে।

উদাহরণস্বরূপে এইখানে দুই-একটি ছড়া উদ্ধৃত করিবার পূর্বে পাঠকদের নিকট মার্জনা ভিক্ষা করি ; প্রথমত, এই ছড়াগুলির সঙ্গে চিরকাল যে স্নেহার্জ সরল মধুর কণ্ঠ ধ্বনিত হইয়া আসিয়াছে আমার মতো মর্ষাদাভীকৃ গম্ভীরস্বভাব বয়স্ক পুরুষের লেখনী হইতে সে ধ্বনি কেমন করিয়া ক্ষরিত হইবে? পাঠকগণ আপন গৃহ হইতে, আপন বালাস্বতি হইতে সেই স্বধান্নিক স্বরটুকু মনে মনে সংগ্রহ করিয়া লইবেন। ইহার সহিত যে স্নেহটি, যে সংগীতটি, যে সন্ধ্যা-প্রদীপালোকিত মৌল্যধ্বজবিটি চিরদিন একাত্মভাবে মিশ্রিত হইয়া আছে সে

আমি কোন্ মোহমত্তে পাঠকদের সামনে আনিয়া উপস্থিত করিব! ভরসা করি, এই ছড়াগুলির মধ্যেই সেই মোহমত্তটি আছে।

দ্বিতীয়ত, আট-ঘাট-বাধা রীতিমত সাধুভাবার প্রবন্ধের মাঝখানে এই-সমস্ত গৃহচারিণী অকৃতবেশা অসংস্কৃত মেয়েলি ছড়াগুলিকে দাঁড় করাওয়া দিলে তাহাদের প্রতি কিছু অত্যাচার করা হয়—যেন আদালতের সাক্ষ্যক্ষেত্রে ঘরের বধূকে উপস্থিত করিয়া জেরা করা। কিন্তু উপায় নাই। আদালতের নিয়মে আদালতের কাজ হয়, প্রবন্ধের নিয়মামুসারে প্রবন্ধ রচনা করিতে হয়—নিষ্ঠুরতাটুকু অপরিহার্য।

যমুনাবতী সরস্বতী কাল যমুনার বিয়ে।

যমুনা যাবেন শশুরবাড়ি কাজিতলা দিয়ে।

কাজিফুল কুড়তে পেয়ে গেলুম মালা।

হাত-ঝুমঝুম পা-ঝুমঝুম সীতারামের থেলা।

নাচো তো সীতারাম কঁাকাল বৈকিয়ে।

আলোচাল দেব টাপাল ভরিয়ে।

আলোচাল খেতে খেতে গলা হল কাঠ।

হেথায় তো জল নেই ত্রিপুরার ঘাট।

ত্রিপুরার ঘাটে ছটো মাহ ভেসেছে।

একটি নিলেন গুরুঠাকুর একটি নিলেন কে।

তার বোনকে বিয়ে করি ওড়ফুল দিয়ে।

ওড়ফুল কুড়তে হয়ে গেল বেলা।

তার বোনকে বিয়ে করি ঠিক ছক্ষুর বেলা।

ইহার মধ্যে ভাবের পরস্পর সম্বন্ধ নাই সে কথা নিতান্তই পক্ষপাতী সমালোচককেও স্বীকার করিতে হইবে। কতকগুলি অসংলগ্ন ছবি-নিতান্ত সামান্ত প্রসঙ্গমাত্র অবলম্বন করিয়া উপস্থিত হইয়াছে। একটা এই দেখা

যাইতেছে কোনোপ্রকার বাছ-বিচার নাই। যেন কবিশ্বেষ সিংহধারে নিম্ভক শারদ মধ্যাহ্নের মধুর উত্তাপে দ্বারবান বেটা দিয়া পা ছড়াইয়া দিয়া ঘুমাইয়া পড়িয়াছে। কথাগুলো ভাবগুলো কোনোপ্রকার পরিচয়-প্রদানের অপেক্ষা না রাখিয়া, কোনোরূপ উপলক্ষ অন্বেষণ না করিয়া, অনায়াসে তাহার পা ডিঙাইয়া, এমন-কি, মাঝে মাঝে লঘুকরস্পর্শে তাহার কান মলিয়া দিয়া, কল্পনার অশ্রুভেদী মায়াপ্রাসাদে ইচ্ছানুযায়ী আনাগোনা করিতেছে ; দ্বারবানটা যদি ঢুলিতে ঢুলিতে হঠাৎ একবার চমক খাইয়া জাগিয়া উঠিত তবে সেই মুহূর্তেই তাহার কৈ কোথায় দৌড় দিত তাহার আর ঠিকানা পাওয়া যাইত না।

যমুনাবতী সরস্বতী যিনিই হউন, আগামী কল্য যে তাহার শুভবিবাহ সে কথার স্পষ্টই উল্লেখ দেখা যাইতেছে। অবশ্য, বিবাহের পর যথাকালে কাজিতলা দিয়া যে তাঁহাকে শশুরবাড়ি যাইতে হইবে সে কথা আপাতত উত্থাপন না করিলেও চলিত ; যাহা হউক তথাপি কথাটা নিতান্তই অপ্ৰাসঙ্গিক হয় নাই। কিন্তু বিবাহের জন্ত কোনোপ্রকার উদ্‌যোগ অথবা সেজন্ত কাহারো তিলমাত্র ঔৎসুক্য আছে এমন কিছুই পরিচয় পাওয়া যায় না। ছড়ার রাজ্য তেমন রাজ্যই নহে। সেখানে সকল ব্যাপারই এমন অনায়াসে ঘটিতে পারে এবং এমন অনায়াসে না-ঘটিতেও পারে যে, কাহাকেও কোনো-কিছুর জন্তই কিছুমাত্র হুশিঙ্গাগ্রস্ত বা ব্যস্ত হইতে হয় না। অতএব আগামী কল্য শ্রীমতী যমুনাবতীর বিবাহের দিন স্থির হইলেও সে ঘটনাকে বিন্দুমাত্র প্রাধান্য দেওয়া হয় নাই। তবে সে কথাটা আদৌ কেন উত্থাপিত হইল তাহার জবাবদিহির জন্তও কেহ ব্যস্ত নহে। কাজিফুল যে কী ফুল আমি নগরবাসী তাহা ঠিক করিয়া বলিতে পারি না, কিন্তু ইহা স্পষ্ট অস্বাভাবিক করিতেছি যে যমুনাবতী-নামক কণ্ঠাটির আসন্ন বিবাহের সহিত উক্ত পুষ্পসংগ্রহের কোনো যোগ নাই। এবং হঠাৎ মাঝখান হইতে সীতারাম কেন যে হাতের বলয় এবং পায়ের নুপুর রুম রুম করিয়া নৃত্য আরম্ভ করিয়া দিল আমরা তাহার বিন্দু-বিসর্গ কারণ

দেখাইতে পারিব না। আলোচালের প্রলোভন একটা মন্ত কারণ হইতে পারে, কিন্তু সেই কারণ আমাদের সীতারামের আকস্মিক নৃত্য হইতে ভূলাইয়া হঠাৎ ত্রিপুরার ঘাটে আনিয়া উপস্থিত করিল। সেই ঘাটে দুটি মৎস্ত ভাসিয়া উঠা কিছুই আশ্চর্য নহে বটে, কিন্তু বিশেষ আশ্চর্যের বিষয় এই যে, দুটি মৎস্তের মধ্যে একটি মৎস্ত যে লোক লইয়া গেছে তাহার কোনোরূপ উদ্দেশ্য না পাওয়া সত্ত্বেও আমাদের দৃঢ়প্রতিজ্ঞ রচয়িতা কী কারণে তাহারই ভগিনীকে বিবাহ করিবার জগ্ৰ হঠাৎ স্থিরসংকল্প হইয়া বসিলেন, অথচ প্রচলিত বিবাহের প্রথা সম্পূর্ণ উপেক্ষা করিয়া একমাত্র ওড়ফুল সংগ্রহদ্বারাই শুভকর্মের আয়োজন যথেষ্ট বিবেচনা করিলেন এবং যে লয়টি স্থির করিলেন তাহাও নূতন অথবা পুরাতন কোনো পঞ্জিকাকারের মতেই প্রশস্ত নহে।

এই তো কবিতার বাধুনি। আমাদের হাতে যদি রচনার ভার থাকিত তবে নিশ্চয় এমন কৌশলে প্লট বাধিতাম যাহাতে প্রথমোক্ত যমুনাবতীই গ্রন্থের শেষ পরিচ্ছেদে সেই ত্রিপুরার ঘাটের অনির্দিষ্ট ব্যক্তির অপরিজ্ঞাত ভগ্নীরূপে দাঁড়াইয়া ঘাইত এবং ঠিক মধ্যাহ্নকালে ওড়ফুলের মালা-বদল করিয়া যে গান্ধর্ব বিবাহ ঘটিত তাহাতে সন্দ্বন্দয় পাঠকমাত্রই তৃপ্তিলাভ করিতেন।

কিন্তু বালকের প্রকৃতিতে মনের প্রতাপ অনেকটা ক্ষীণ। জগৎ-সংসার এবং তাহার নিজের কল্পনাগুলি তাহাকে বিচ্ছিন্নভাবে আঘাত করে; একটার পর আর-একটা আসিয়া উপস্থিত হয়। মনের বন্ধন তাহার পক্ষে পীড়াজনক। সুসংলগ্ন কার্যকারণসূত্র ধরিয়া জিনিসকে প্রথম হইতে শেষ পর্যন্ত অনুসরণ করা তাহার পক্ষে দুঃসাধ্য। বহির্জগতে সমুদ্রতীরে বসিয়া বালক বালির ঘর রচনা করে, মানস-জগতের সিন্ধুতীরেও সে আনন্দে বসিয়া বালির ঘর বাধিতে থাকে। বালিতে বালিতে জোড়া লাগে না, তাহা স্থায়ী হয় না— কিন্তু বালুকার মধ্যে এই ঘোজনশীলতার অভাব-বশতই বাল্যস্থাপত্যের পক্ষে তাহা সর্বোৎকৃষ্ট উপকরণ। মুহূর্তের মধ্যেই মুঠা মুঠা করিয়া তাহাকে একটা উচ্চ আকারে

পরিণত করা যায়—মনোনীত না হইলে অন্যায়সে তাহাকে সংশোধন করা সহজ এবং শ্রান্তি বোধ হইলেই তৎক্ষণাৎ পদাঘাতে তাহাকে সমভূমি করিয়া দিয়া লীলাময় স্বজনকর্তা লঘুহৃদয়ে বাড়ি ফিরিতে পারে। কিন্তু, যেখানে গাঁথিয়া গাঁথিয়া কাজ করা আবশ্যক সেখানে কতাকেও অবিলম্বে কাজের নিয়ম মানিয়া চলিতে হয়। বালক নিয়ম মানিয়া চলিতে পারে না—সে সম্প্রতিমাত্র নিয়মহীন ইচ্ছানন্দময় স্বর্গলোক হইতে আসিয়াছে। আমাদের মতো স্বদীর্ঘকাল নিয়মের দাসত্বে অভ্যস্ত হয় নাই, এইজন্য সে ক্ষুদ্র শক্তি-অনুসারে সমুদ্রতীরে বালির ঘর এবং মনের মধ্যে ছড়ার ছবি স্বেচ্ছামত রচনা করিয়া মর্তলোকে দেবতার জগৎলীলার অনুকরণ করে। এইজন্যই আমাদের শাস্ত্রে ঈশ্বরের কার্যের সহিত বালকের লীলার সর্বদা তুলনা দেওয়া হইয়া থাকে, উভয়ের মধ্যেই একটা ইচ্ছাময় আনন্দের সাদৃশ্য আছে।

পূর্বোদ্যুত ছড়াটিতে সংলগ্নতা নাই, কিন্তু ছবি আছে। কাজিতলা, ত্রিপুরিণ ষাট এবং ওড়বনের ঘটনাগুলি স্বপ্নের মতো অদ্ভুত, কিন্তু স্বপ্নের মতো সত্যবৎ।

স্বপ্নের মতো সত্য বলাতে পাঠকগণ আমার বুদ্ধির সজাগতা সম্বন্ধে সন্দেহান হইবেন না। অনেক দার্শনিক পণ্ডিত প্রত্যক্ষ জগৎটাকে স্বপ্ন বলিয়া উড়াইয়া দিয়াছেন। কিন্তু, সেই পণ্ডিত স্বপ্নকে উড়াইতে পারেন নাই। তিনি বলেন, প্রত্যক্ষ সত্য নাই—তবে কী আছে? না, স্বপ্ন আছে। অতএব দেখা যাইতেছে, প্রবল যুক্তির দ্বারা সত্যকে অস্বীকার করা সহজ, কিন্তু স্বপ্নকে অস্বীকার করিবার জো নাই। কেবল সজাগ স্বপ্ন নহে, নিদ্রাগত স্বপ্ন সম্বন্ধেও এই কথা খাটে। স্মৃতিক্ষুব্ধি পণ্ডিতেরও সাধ্য নাই স্বপ্নাবস্থায় স্বপ্নকে অবিশ্বাস করেন। জাগ্রত অবস্থায় তাঁহারা সম্ভব সত্যকেও সন্দেহ করিতে ছাড়েন না, কিন্তু স্বপ্নাবস্থায় তাঁহারা চরমতম অসম্ভবকে অসংশয়ে গ্রহণ করেন। অতএব বিশ্বাসজনকতা-নামক যে গুণটি সত্যের সর্বপ্রধান গুণ হওয়া উচিত সেটা যেমন স্বপ্নের আছে এমন আর কিছুই নাই।

এতদ্বারা পাঠক এই কথা বুঝিবেন যে প্রত্যক্ষ জগৎ আমাদের কাছে
যতটা সত্য, ছড়ার স্বপ্নজগৎ নিত্যস্বপ্নদর্শী বালকের নিকট তদপেক্ষা অনেক
অধিক সত্য। এইজন্য অনেক সময় সত্যকেও আমরা অসম্ভব বলিয়া ত্যাগ
করি, এবং তাহার অসম্ভবকেও সত্য বলিয়া গ্রহণ করে।

বুড়ি পড়ে টাপুর-টুপুর নদী এল বান।

শিবু ঠাকুরের বিয়ে হল তিন কল্লো দান।

এক কল্লো রাঁধেন বাড়েন এক কল্লো খান।

এক কল্লো না খেয়ে বাপের বাড়ি যান ॥

এ বয়সে এই ছড়াটি শুনিবামাত্র বোধ করি প্রথমেই মনে হয় শিবু ঠাকুর
যে তিনটি কল্লোকে বিবাহ করিয়াছেন তন্মধ্যে মধ্যমা কল্যাণটিই সর্বাপেক্ষা
বৃদ্ধিমতী। কিন্তু এক বয়স ছিল যখন এতাদৃশ চরিত্রবিশ্লেষণের ক্ষমতা ছিল
না। তখন এই চারটি ছত্র আমার বাল্যকালের মেঘদূতের মতো ছিল।
আমার মানসপটে একটি ঘনমেঘাচ্ছন্ন বাদলার দিন এবং উত্তালতরঙ্গিত নদী
মূর্তিমান হইয়া দেখা দিত। তাহার পর দেখিতে পাইতাম সেই নদীর প্রান্তে
বালুর চরে গুটিত্বয়েক পানুসি নৌকা বাঁধা আছে এবং শিবু ঠাকুরের নব-
বিবাহিতা বধূগণ চড়ায় নামিয়া রাঁধাবাড়া করিতেছেন। সত্য কথা বলিতে
কী, শিবু ঠাকুরের জীবনটিকে বড়ো সুখের জীবন মনে করিয়া চিত্ত কিছু
ব্যাকুল হইত। এমন-কি, তৃতীয়া বধূঠাকুরানী মর্যাস্তিক রাগ করিয়া ক্ষতচরণে
বাপের বাড়ি-অভিমুখে চলিয়াছেন, সেই ছবিতেও আমার এই সুখচিত্রের
কিছুমাত্র ব্যাঘাতসাধন করিতে পারেন নাই। এই নিবোধ তখনো বুঝিতে
পারিত না, ঐ একটিমাত্র ছত্রে হতভাগ্য শিবু ঠাকুরের জীবনে কী এক
ক্লময়বিধারক শোকাবহ পরিণাম সূচিত হইয়াছে। কিন্তু পূর্বেই বলিয়াছি,
চরিত্রবিশ্লেষণ অপেক্ষা চিত্রবিরচনের দিকেই তখন মনের গতিটা ছিল। এখন

বুঝিতে পারিতেছি, হতবুদ্ধি শিবু ঠাকুর তদীয় কনিষ্ঠ জায়ার অকস্মাৎ পিতৃগৃহ-প্রয়াণ-দৃষ্টটিকে ঠিক মনোরম চিত্র হিসাবে দেখেন নাই।

এই শিবু ঠাকুর কি কখন কালে কেহ ছিল এক-এক বার এ কথাও মনে উদয় হয়। হয়তো বা ছিল। হয়তো এই ছড়ার মধ্যে পুরাতন বিশ্বত ইতিহাসের অতি ক্ষুদ্র এক ভগ্ন অংশ থাকিয়া গিয়াছে। আর-কোনো ছড়ায় হয়তো বা ইহার আর-এক টুকরা থাকিতে পারে।

এ পার গঙ্গা, ও পার গঙ্গা, মধ্যাথানে চর।

তারি মধ্যে বসে আছে শিব সদাগর।

শিব গেল শস্তরবাড়ি, বসতে দিল পিঁড়ে।

জলপান করিতে দিল শালিধানের চিঁড়ে।

শালিধানের চিঁড়ে নয় রে, বিম্বিধানের খই।

মোটা মোটা সবরি কলা, কাগমারে দই।

ভাবে-গতিকে আমার সন্দেহ হইতেছে শিবু ঠাকুর এবং শিবু সদাগর লোকটি একই হইবেন। দাম্পত্য সম্বন্ধে উভয়েরই একটু বিশেষ শথ আছে এবং বোধ করি আহার সম্বন্ধেও অবহেলা নাই। উপরন্তু গঙ্গার মাঝখানটিতে যে স্থান-টুহু নির্বাচন করিয়া লওয়া হইয়াছে তাহাও নবপরিণীতের প্রথম প্রণয়যাপনের পক্ষে অতি উপযুক্ত স্থান।

এই স্থলে পাঠকগণ লক্ষ্য করিয়া দেখিবেন, প্রথমে অনবধানতাক্রমে শিবু সদাগরের জলপানের স্থলে শালিধানের চিঁড়ার উল্লেখ করা হইয়াছিল কিন্তু পরক্ষণেই সংশোধন করিয়া বলা হইয়াছে ‘শালিধানের চিঁড়ে নয় রে, বিম্বি-ধানের খই’। যেন ঘটনার সত্য সম্বন্ধে তিলমাত্র স্থলন হইবার জো নাই। অথচ এই সংশোধনের দ্বারা বর্ণিত ফলাহারের খুব যে একটা ইতর-বিশেষ হইয়াছে, জামাই-আদর সম্বন্ধে শস্তরবাড়ির গৌরব খুব উজ্জলতররূপে পরিষ্কৃত

হইয়া উঠিয়াছে, তাহাও বলিতে পারি না। কিন্তু এ ক্ষেত্রে শব্দরবাড়ির মৰ্ধাঙ্গ অপেক্ষা সত্যের মৰ্ধাঙ্গ রক্ষার প্রতি কবির অধিক লক্ষ দেখা যাইতেছে। তাও ঠিক বলিতে পারি না। বোধ করি ইহাও স্বপ্নের মতো। বোধ করি শালিধানের চিঁড়া দেখিতে দেখিতেই পরমুহূর্তে বিম্বিধানের খই হইয়া উঠিয়াছে। বোধ করি শিবু ঠাকুরও কখন এমনি করিয়া শিবু সদাগরে পরিণত হইয়াছে কেহ বলিতে পারে না।

সুনা যায়, মঙ্গল ও বৃহস্পতির কক্ষমধ্যে কতকগুলি টুকরা গ্রহ আছে। কেহ কেহ বলেন, একখানা আস্ত গ্রহ ভাঙিয়া থণ্ড থণ্ড হইয়া গিয়াছে। এই ছড়াগুলিকেও সেইরূপ টুকরা জগৎ বলিয়া আমার মনে হয়। অনেক প্রাচীন ইতিহাস প্রাচীন স্মৃতির চূর্ণ অংশ এই-সকল ছড়ার মধ্যে বিক্ষিপ্ত হইয়া আছে, কোনো পুরাতত্ত্ববিৎ আর তাহাদিগকে জোড়া দিয়া এক করিতে পারেন না, কিন্তু আমাদের কল্পনা এই ভগ্নাবশেষগুলির মধ্যে সেই বিস্মৃত প্রাচীন জগতের একটি স্ফূর অথচ নিকট পরিচয় লাভ করিতে চেষ্টা করে।

অবশ্য, বালকের কল্পনা এই ঐতিহাসিক ঐক্য-রচনার জন্য উৎসুক নহে। তাহার নিকট সমস্তই বর্তমান এবং তাহার নিকট বর্তমানেরই গৌরব। সে কেবল প্রত্যক্ষ ছবি চাহে এবং সেই ছবিকে ভাবের অশ্রুবাষ্পে ঝাপসা করিতে চাহে না।

নিম্নোদ্ধৃত ছড়াটিতে অসংলগ্ন ছবি যেন পাখির ঝাঁকের মতো উড়িয়া চলিয়াছে। ইহাদের প্রত্যেকের এই স্বতন্ত্র দ্রুতগতিতে বালকের চিন্তা উপযুক্ত নব নব আঘাত পাইয়া বিচলিত হইতে থাকে।

নোটন নোটন পায়রাগুলি ঝোঁটন রেখেছে।

বড়ো সাহেবের বিবিগুলি নাইতে এসেছে।

দু প্যারে দুই কুই কাংলা ভেসে উঠেছে।

দাদার হাতে কলম ছিল ছুঁড়ে যেয়েছে।

ও পারেতে দুটি মেয়ে নাইতে নেবেছে ।
 ঝুন্ড ঝুন্ড চুলগাছটি ঝাড়তে নেগেছে ।
 কে রেখেছে কে রেখেছে, দাদা রেখেছে ।
 আজ দাদার ঢোলা ফেলা, কাল দাদার বে ।
 দাদা যাবে কোন্থান দে । বকুলতলা দে ॥
 বকুলকুল কুড়তে কুড়তে পেয়ে গেলুম মালা ।
 রামধনুকে বাদি বাজে সীতেনাথের থেলা ॥
 সীতেনাথ বলে রে ভাই চালকড়াই খাব ।
 চালকড়াই খেতে খেতে গলা হল কাঠ ।
 হেথা হোথা জল পাব চিংপুরের মাঠ ।
 চিংপুরের মাঠেতে বালি চিক্ চিক্ করে ।
 সোনা-মুখে রোদ নেগে রক্ত ফেটে পড়ে ॥

ইহার মধ্যে কোনো ছবিই আমাদেরকে ধরিয়া রাখে না, আমরাও কোনো ছবিকে ধরিয়া রাখিতে পারি না । ষ্টোন্টনবিশিষ্ট নোটন পায়রাগুলি, বড়ো সাহেবের বিবিগণ, দুই পারে ভাসমান দুই কুই কাতলা, পরপারে আননিরত দুই মেয়ে, দাদার বিবাহ, রামধনুকের বাজ-সহকারে সীতানাথের থেলা, এবং মধ্যাহ্নরৌদ্রে তপ্তবালুচিকণ মাঠের মধ্যে খরতাপক্লিষ্ট রক্তমুখছবি—এ-সমস্তই স্বপ্নের মতো । ও পারে যে দুইটি মেয়ে নাইতে বসিয়াছে এবং দুই হাতের চুড়িতে চুড়িতে ঝুন ঝুন শব্দ করিয়া চুল ঝাড়িতেছে তাহারা ছবির হিসাবে প্রত্যক্ষ সত্য, কিন্তু প্রাসঙ্গিকতা হিসাবে অপক্লপ স্বপ্ন ।

এ কথাও পাঠকদের স্মরণে রাখা কর্তব্য যে, স্বপ্ন রচনা করা বড়ো কঠিন । ইঠাং মনে হইতে পারে যে, যেমন-তেমন করিয়া লিখিলেই ছড়া লেখা যাইতে পারে । কিন্তু সেই যেমন-তেমন ভাবটি পাওয়া সহজ নহে । সংসারের সকল কার্যেই আমাদের এমনি অভ্যাস ইহায়া গেছে যে, সহজ

ভাবের অপেক্ষা সচেতন ভাবটাই আমাদের পক্ষে সহজ হইয়া দাঁড়াইয়াছে। না ডাকিলেও ব্যস্তবাণীশ চেষ্টা সকল কাজের মধ্যে আপনি আসিয়া হাজির হয়। এবং সে যেখানেই হস্তক্ষেপ করে সেখানেই ভাব আপন লঘু মেঘাকার ভাগ করিয়া দানা বাঁধিয়া উঠে, তাহার আর বাতাসে উড়িবার ক্ষমতা থাকে না। এইজন্য ছড়া জিনিসটা যাহার পক্ষে সহজ তাহার পক্ষে নিরতিশয় সহজ, কিন্তু যাহার পক্ষে কিছুমাত্র কঠিন, তাহার পক্ষে একেবারেই অসাধ্য। যাহা সর্বাপেক্ষা সরল তাহা সর্বাপেক্ষা কঠিন ; সহজের প্রধান লক্ষণই এই।

পাঠক বোধ করি ইহাও লক্ষ্য করিয়া দেখিয়া থাকিবেন, আমাদের প্রথমোদ্ধৃত ছড়াটির সহিত এই ছড়া কেমন করিয়া মিশিয়া গিয়াছে। যেমন মেঘে মেঘে স্বপ্নে স্বপ্নে মিলাইয়া যায় এই ছড়াগুলিও তেমনি পরস্পর জড়িত মিশ্রিত হইতে থাকে, সেজন্য কোনো কবি চূরির অভিযোগ করে না এবং কোনো সমালোচকও ভাববিপর্যয়ের দোষ দেন না। বাস্তবিকই এই ছড়াগুলি মানসিক মেঘরাজ্যের লীলা, সেখানে সীমা বা আকার বা অধিকার-নির্ণয় নাই। সেখানে পুলিশ বা আইন-কানূনের কোনো সম্পর্ক দেখা যায় না। অন্তর্জ হইতে প্রাপ্ত নিম্নের ছড়াটির প্রতি মনোযোগ করিয়া দেখুন।

ও পারে জন্তিগাছটি জন্তি বড়ো ফলে।

গো জন্তির মাথা থেয়ে প্রাণ কেমন করে।

প্রাণ করে হাইটাই গলা হল কাঠ।

কতক্ষণে যাব রে ভাই হরগৌরীর মাঠ।

হরগৌরীর মাঠে রে ভাই পাকা পাকা পান।

পান কিনলাম, চুন কিনলাম, নন্দে ভাজে খেলায়।

একটি পান হারালে দাদাকে ব'লে ছেলায়।

দাদা দাদা ডাক ছাড়ি দাদা নাইকো বাড়ি।

স্বল স্বল ডাক ছাড়ি স্বল আছে বাড়ি।

আজ্জ হুবলের অধিবাস কাল হুবলের বিয়ে ।
 হুবলকে নিয়ে যাব আমি দিগুনগর দিয়ে ॥
 দিগুনগরের মেয়েগুলি নাইতে বসেছে ।
 মোটা মোটা চুলগুলি গো পেতে বসেছে ।
 চিকন চিকন চুলগুলি ঝাড়তে নেগেছে ॥
 হাতে তাদের দেবশাঁখা মেঘ নেগেছে ।
 গলায় তাদের তক্তমালা রক্ত ছুটেছে ।
 পরনে তাদের ডুরে শাড়ি ঘুরে পড়েছে ॥
 দুই দিকে দুই কাতলা মাছ ভেসে উঠেছে ।
 একটি নিলেন গুরুঠাকুর একটি নিলেন টিয়ে ॥

টিয়ের মার বিয়ে ।
 নাল গামছা দিয়ে ॥
 অশখের পাতা ধনে ।
 গৌরী বেটি কনে ॥
 নকা বেটা বর ।

চ্যাম্ কুড়্ কুড়্ বাদি বাজে, চড়কভাঙায় ঘর ॥

এই-সকল ছড়ায় মধ্য হইতে সত্য অন্বেষণ করিতে গেলে বিষম বিভ্রাটে পড়িতে হইবে। প্রথম ছড়ায় দেখিয়াছি আলোচাল খাইয়া সীতারাম-নামক নৃত্যপ্রিয় লুক্ক বালকটিকে ত্রিপুরার ঘাটে জল খাইতে বাইতে হইয়াছিল ; দ্বিতীয় ছড়ায় দেখিতে পাই সীতানাথ চাল কড়াই খাইয়া জলের অন্বেষণে চিংপুরের মাঠে গিয়া উপস্থিত হইয়াছিল ; কিন্তু তৃতীয় ছড়ায় দেখা বাইতেহে, সীতারামও নহে, সীতানাথও নহে, পরন্তু কোনো এক হতভাগিনী ভ্রাতৃজ্ঞায়ার বিদ্বেষপরায়ণা ননদিনী জন্তিকল-ভক্ষণের পর তৃষাতুর হইয়া হরগৌরীর মাঠে পান খাইতে গিয়াছিল এবং পরে অসাবধানা ভ্রাতৃবধূর তুচ্ছ অপরাধটুকু দাণ্ডাকে

বলিয়া দিবার জন্য পাড়া তোলপাড় করিয়া তুলিয়াছিল।

এই তো তিন ছড়ার মধ্যে অসংগতি। তার পর প্রত্যেক ছড়ার নিজের মধ্যেও ঘটনার ধারাবাহিকতা দেখা যায় না। বেশ বুঝা যায়, অধিকাংশ কথাই বানানো। কিন্তু ইহাও দেখিতে পাই, কথা বানাইতে গেলে লোকে প্রমাণের প্রাচুর্য-দ্বারা সেটাকে সত্যের অপেক্ষা অধিকতর বিশ্বাসযোগ্য করিয়া তোলে, অথচ এ ক্ষেত্রে সে পক্ষে খেয়ালমাত্র নাই। ইহাদের কথা সত্যও নহে, মিথ্যাও নহে; দুইয়ের বার। ঐ-যে ছড়ার এক জায়গায় স্ববলের বিবাহের উল্লেখ আছে সেটা কিছু অসম্ভব ঘটনা নহে। কিন্তু সত্য বলিয়াও বোধ হয় না।

দাদা দাদা ডাক ছাড়ি, দাদা নাইকো বাড়ি।

স্ববল স্ববল ডাক ছাড়ি, স্ববল আছে বাড়ি ॥

যেমনি স্ববলের নামটা মুখে আসিল অমনিই বাহির হইয়া গেল, ‘আজ স্ববলের অধিবাস, কাল স্ববলের বিয়ে।’ সে কথাটাও স্থায়ী হইল না, অনতিবিলম্বেই দিগ্‌নগরের দীর্ঘকেশা মেয়েদের কথা উঠিল। অগ্রেও ঠিক এইরূপ ঘটে। হয়তো শব্দসাদৃশ্য অথবা অন্য কোনো অলীক তুচ্ছ সঙ্কল্প অবলম্বন করিয়া মুহূর্তে মুহূর্তে একটা হইতে আর-একটা কথা রচিত হইয়া উঠিতে থাকে। মুহূর্তকাল পূর্বে তাহাদের সম্ভাবনার কোনোই কারণ ছিল না, মুহূর্তকাল পরেও তাহারা সম্ভাবনার রাজ্য হইতে বিনা চেষ্টায় অপসৃত হইয়া যায়। স্ববলের বিবাহকে যদি বা পাঠকগণ তৎকালীন ও তৎস্থানীয় কোনো সত্য ঘটনার আভাস বলিয়া জ্ঞান করেন তথাপি সকলেই একবাক্যে স্বীকার করিবেন ‘নাল গামছা দিবে টিয়ের মার বিয়ে’ কিছুতেই সাময়িক ইতিহাসের মধ্যে স্থান পাইতে পারে না। কারণ, বিধবাবিবাহ টিয়ে-জাতির মধ্যে প্রচলিত থাকিলেও নাল গামছার ব্যবহার উক্ত সম্প্রদায়ের

মধ্যে কখন কালে শুনা যায় নাই। কিন্তু বাহাদের কাছে ছন্দের তালে তালে স্মৃতিষ্ট কর্তে এই-সকল অসংলগ্ন অসম্ভব ঘটনা উপস্থিত করা হইয়া থাকে তাহারা বিশ্বাসও করে না, সন্দেহও করে না, তাহারা মনশ্চক্ষে স্বপ্নবৎ প্রত্যক্ষবৎ ছবি দেখিয়া যায়।

বালকেরা ছবিও অতিশয় সহজে স্বপ্নায়োজনে দেখিতে পায়। ইহার কারণ পূর্বে একস্থলে বলিয়াছি, ইচ্ছাশক্তি সম্বন্ধে বালকের সহিত দেবতার একটা সাদৃশ্য দেখা যায়। বালক যত সহজে ইচ্ছামাত্রই স্বপ্নন করিতে পারে আমরা তেমন পারি না। ভাবিয়া দেখো, একটা গ্রন্থিবীধা বস্ত্রখণ্ডকে সুগুণবিশিষ্ট মনুষ্য কল্পনা করিয়া তাহাকে আপনায় সন্তানরূপে লালন করা সামান্ত ব্যাপার নহে। আমাদের একটা মূর্তিকে মানুষ বলিয়া কল্পনা করিতে হইলে ঠিক সেটাকে মানুষের মতো গড়িতে হয়—যেখানে যতটুকু অমুককর্ণের ক্রটি থাকে তাহাতেই আমাদের কল্পনার ব্যাঘাত করে। বহির্জগতের জড়-ভাবে শাসনে আমরা নিয়ন্ত্রিত; আমাদের চক্ষে বাহ্য পড়িতেছে আমরা কিছুতেই তাহাকে অন্তরূপে দেখিতে পারি না। কিন্তু শিশু চক্ষে বাহ্য দেখিতেছে তাহাকে উপলক্ষমাত্র করিয়া আপন মনের মতো জিনিস মনের মধ্যে গড়িয়া লইতে পারে, মনুষ্যমূর্তির সহিত বস্ত্রখণ্ডরচিত খেলনকের কোনো বৈসাদৃশ্য তাহার চক্ষে পড়ে না, সে আপনায় ইচ্ছারচিত সৃষ্টিকেই সম্মুখে জাজল্যমান করিয়া দেখে।

কিন্তু তথাপি ছড়ার এই-সকল অযত্বরচিত চিত্রগুলি কেবল যে বালকের সহজ স্বপ্ন-শক্তি-দ্বারা সৃজিত হইয়া উঠে তাহা নহে; তাহার অনেক স্থানে রেখার এমন সুস্পষ্টতা আছে যে, তাহারা আমাদের সংশয়ী চক্ষেও অতি সংক্ষেপ বর্ণনায় ত্বরিত-চিত্র আনিয়া উপস্থিত করে।

এই ছবিগুলি একটি-রেখা একটি-কথার ছবি। দেশালাই যেমন এক আঁচড়ে দপ্ করিয়া জলিয়া উঠে বালকের চিন্তে তেমনি একটি কথার টানে একটি

সমগ্র চিত্র পলকের মধ্যে জাগাইয়া তুলিতে হয়। অংশ যোজনা করিয়া কিছু গড়িয়া তুলিলে চলিবে না।

চিংপুরের মাঠেতে বালি চিক্‌চিক্‌ করে।

এই একটিনাত্র কথায় একটি বৃহৎ অন্তর্বর মাঠ মধ্যাহ্নের রৌদ্রালোকে আমাদের দৃষ্টিপথে আসিয়া উদয় হয়।

পরনে তার ডূরে শাড়ি ঘুরে পড়েছে।

ডূরে শাড়ির ভোর। রেখাগুলি ঘূর্ণাজলের আবর্তধারার মতো তল্ল গাত্রঘষ্টিকে যেমন ঘুরিয়া ঘুরিয়া বেটন করিয়া ধরে তাহা ঐ এক ছত্রে এক মুহূর্তে চিত্রিত হইয়া উঠিয়াছে। আবার পাঠান্তরে আছে—

পরনে তার ডূরে কাপড় উড়ে পড়েছে।

সে ছবিটিও মন্দ নহে।

আয় ঘুম আয় ঘুম বাগ্‌দিপাড়া দিয়ে।

বাগ্‌দিদের ছেলে ঘুমোয় জাল মুড়ি দিয়ে ॥

ঐ শেষ ছত্রে জাল মুড়ি দিয়া বাগ্‌দিদের ছেলেটা যেখানে-সেখানে পড়িয়া ক্লিপ অকাতরে ঘুমাইতেছে সে ছবি পাঠকমাত্রেরই উপলব্ধি করিতে পারিবেন। অধিক কিছু নহে, ঐ জাল মুড়ি দেওয়ার কথা বিশেষ করিয়া বলাতেই বাগ্‌দি সম্ভানের ঘুম বিশেষরূপে প্রত্যক্ষ হইয়াছে।

আয় রে আয় ছেলের পাল মাছ ধরতে যাই।

মাছের কাঁটা পায়ে ফুটল দোলায় চেপে যাই।

দোলায় আছে ছ পণ কড়ি গুনতে গুনতে যাই।

এ নদীর জলটুকু টলমল করে।

এ নদীর ধারে যে ভাই বালি খুবখুব করে।

টাকমুখেতে রোদ লেগেছে রক্ত ফুটে পড়ে।

দোলায় করিয়া ছয় পণ কড়ি গুনিতে গুনিতে যাওয়াকে যদি পাঠকেরা ছবির হিসাবে অকিঞ্চিৎকর জ্ঞান করেন তথাপি শেষ তিন ছত্রে কে তাঁহারা উপেক্ষা করিবেন না। নদীর জলটুকু টলমল করিতেছে এবং তীরের বালি খুবখুব করিয়া খসিয়া খসিয়া পড়িতেছে, বালুতটবর্তী নদীর এমন সংক্ষিপ্ত সরল অথচ সুন্দর ছবি আর কী হইতে পারে।

এ তো এক শ্রেণীর ছবি গেল। আর-এক শ্রেণীর ছবি আছে যাহা বর্ণনীয় বিষয় অবলম্বন করিয়া একটা সমগ্র ব্যাপার আমাদের মনের মধ্যে জাগ্রত করিয়া দেয়। হয়তো একটা তুচ্ছ বিষয়ের উল্লেখ সমস্ত বঙ্গগৃহ বঙ্গসমাজ জীবন্ত হইয়া উঠিয়া আমাদের হৃদয়কে স্পর্শ করে। সে-সমস্ত তুচ্ছ কথা বড়ো বড়ো সাহিত্যে তেমন সহজে তেমন অবাধে তেমন অসংকোচে প্রবেশ করিতে পারে না। এবং প্রবেশ করিলেও আপনিই তাহার রূপান্তর ও ভাবান্তর হইয়া যায়।

দাদা গো দাদা শহরে যাও।

তিন টাকা করে মাইনে পাও।

দাদার গলায় তুলসীমালা।

বউ বরনে চন্দ্রকলা।

হেই দাদা তোমার পায়ে পড়ি।

বউ এনে দাঁণ্ড খেলা করি।

দাদার বেতন অধিক নহে— কিন্তু, বোনটির মতে তাহাই প্রচুর। এই তিন টাকা বেতনের সচ্ছলতার উদাহরণ দিয়াই ভগ্নীটি অচুনয় করিতেছেন—

হেই দাদা তোমার পায়ে পড়ি।

বউ এনে দাঁণ্ড খেলা করি।

চতুরা বালিকা নিজের এই স্বার্থ-উদ্ধারের জন্ত দাদাকেও প্রলোভনের ছলে আভাস দিতে ছাড়ে নাই যে ‘বউ বরনে চন্দ্রকলা’। যদিও ভগ্নীর খেলেনাটি

তিন টাকা বেতনের পক্ষে অনেক মহার্ঘ তথাপি নিশ্চয় বলিতে পারি তাহার কাতর অনুরোধ রক্ষা করিতে বিলম্ব হয় নাই, এবং সেটা কেবলমাত্র মৌজাব্রবশত নহে।

উলু উলু মাদারের ফুল।

বর আসছে কত দূর ॥

বর আসছে বাঘুনাপাড়া।

বড়ো বউ গো রান্না চড়া ॥

ছোটো বউ লো জলকে ষা।

জলের মধ্যে লাকাজোকা।

ফুল ফুটেছে চাকা চাকা ॥

ফুলের বরণ কড়ি।

নটে শাকের বড়ি ॥

জামাতসমাগমপ্রত্যাশিনী পল্লীরমণীগণের উৎসুক্য এবং আনন্দ-উৎসবের ছবি আপনি ফুটিয়াছে এবং সেই উপলক্ষে শেওড়াগাছের-বেড়া-দেওয়া পাড়াগাঁয়ের পথঘাট, বন, পুষ্করিণী, ঘটকক্ষ বধু এবং শিখিলগুঠন ব্যস্তসমস্ত গৃহিণীগণ ইন্দ্রজালের মতো জাগিয়া উঠিয়াছে।

এমন প্রায় প্রত্যেক ছড়ার প্রত্যেক তুচ্ছ কথায় বাংলাদেশের একটি মূর্তি, গ্রামের একটি সংগীত, গৃহের একটি আশ্বাদ পাওয়া যায়। কিন্তু সে-সমস্ত অধিক পরিমাণে উদ্ভূত করিতে আশঙ্কা করি, কারণ, ভিন্নরুচিহি লোকঃ।

ছবি যদি কিছু অদ্ভুত গোছের হয়, তাহাতে কোনো ক্ষতি নাই বরঞ্চ ভালোই। কারণ, নৃতনত্বে চিন্তে আরো অধিক করিয়া আঘাত করে। ছেলের কাছে অদ্ভুত কিছু নাই; কারণ, তাহার নিকট অসম্ভব কিছু নাই। সে এখনো জগতে সম্ভাব্যতার শেষসীমাবর্তী প্রাচীরে গিয়া চারি দিক হইতে মাথা ঠুকিয়া ফিরিয়া আসে নাই। সে বলে, যদি কিছুই সম্ভব হয় তবে

সকলই সম্ভব। একটা জিনিস যদি অদ্ভুত না হয় তবে আর-একটা জিনিসই বা কেন অদ্ভুত হইবে? সে বলে, একমুণ্ডওয়াল মানুষকে আমি কোনো প্রশ্ন না করিয়া বিশ্বাস করিয়া লইয়াছি; কারণ, সে আমার নিকটে প্রত্যক্ষ হইয়াছে। দুইমুণ্ডওয়াল মানুষের সম্বন্ধেও আমি কোনো বিরুদ্ধ প্রশ্ন করিতে চাহি না; কারণ, আমি তো তাহাকে মনের মধ্যে স্পষ্ট দেখিতে পাইতেছি। আবার স্বককাটা মানুষও আমার পক্ষে সমান সত্য; কারণ, সে তো আমার অল্পভবের অগম্য নহে। একটি গল্প আছে, কোনো লোক সভাস্থলে উপস্থিত হইয়া কহিল, আজ পথে এক আশ্চর্য ব্যাপার দেখিয়া আসিলাম; বিবাদে একটি লোকের মুণ্ড কাটা পড়িল, তথাপি সে দশ পা চলিয়া গেল। সকলেই আশ্চর্য হইয়া কহিল, বল কী হে, দশ পা চলিয়া গেল! তাঁহাদের মধ্যে একটি স্ত্রীলোক ছিলেন; তিনি বলিলেন, দশ পা চলা কিছুই আশ্চর্য নহে, উহার সেই প্রথম পা চলাটাই আশ্চর্য।

সৃষ্টিরও সেইরূপ প্রথম পদক্ষেপটাই মহাশ্রম, কিছু যে হইয়াছে ইহাই প্রথম বিশ্বয় এবং পরম বিশ্বয়ের বিষয়; তাহার পরে আরো যে কিছু হইতে পারে তাহাতে আশ্চর্য কী! বালক সেই প্রথম আশ্চর্যটার প্রতি প্রথম দৃষ্টিপাত করিতেছে; সে চক্ষু মেলিবামাত্র দেখিতেছে অনেক জিনিস আছে, আরো অনেক জিনিস থাকিবে তাহার পক্ষে কিছুই অসম্ভব নহে। এইজগৎ ছড়ার দেশে সম্ভব-অসম্ভবের মধ্যে সীমানা-ঘটিত কোনো বিবাদ নাই।

আয় রে আয় টিয়ে,

নায়ে ভরা দিয়ে ॥

না নিয়ে গেল বোয়াল মাছে।

তা দেখে দেখে ভৌদড় নাচে ॥

ওরে ভৌদড়, ফিরে চা।

খোঁকার নাচন দেখে যা ॥

প্রথমত, টিয়েপাখি নৌকা চড়িয়া আসিতেছে এমন দৃশ্য কোনো বালক তাহার পিতার বয়সেও দেখে নাই ; বালকের পিতার সম্বন্ধেও সে কথা খাটে । কিন্তু সেই অপূর্বতাই তাহার প্রধান কৌতুক । বিশেষত, হঠাৎ যখন অগাধ জলের মধ্য হইতে একটা ক্ষীতকায় বোয়াল মাছ উঠিয়া, বলা নাই কথা নাই, খামকা তাহার নৌকাখানা লইয়া চলিল, এবং ক্রুদ্ধ ও ব্যতিব্যস্ত টিয়া মাথার রোয়া ফুলাইয়া, পাখা ঝাপটাইয়া, অত্যাচ্চ চীংকারে আপত্তি প্রকাশ করিতে থাকিল, তখন কৌতুক আরো বাড়িয়া উঠে । টিয়া বেচারার দুর্গতি এবং জলচর প্রাণীটার নিতান্ত অভদ্র ব্যবহার দেখিয়া অকস্মাৎ ভৌদড়ের দুনিবার নৃত্যস্পৃহাও বড়ো চমৎকার । এবং সেই আনন্দনর্ভনপর নিষ্ঠুর ভৌদড়টিকে নিজের নৃত্যবেগ সম্বরণপূর্বক থোকান নৃত্য দেখিবার জন্য ফিরিয়া চাহিতে অস্বাভাবিক করার মধ্যেও বিস্তর রস আছে । যেমন মিষ্ট ছন্দ শুনিলেই তাহাকে গানে বাঁধিয়া গাহিতে ইচ্ছা করে তেমনি এই-সকল ভাষার চিত্র দেখিলেই ইহাদিগকে রেখার চিত্রে অন্তর্ভুক্ত করিয়া আঁকিয়া কেলিতে ইচ্ছা করে । কিন্তু হায়, এ-সকল চিত্রের রস নষ্ট না করিয়া ইহাদের বাল্য স্মরণতা, উজ্জল নবীনতা, অসংশয়তা, অসম্ভবের সহজ সম্ভবতা রক্ষা করিয়া আঁকিতে পারে এমন চিত্রকর আমাদের দেশে কোথায় এবং বোধ করি সর্বত্রই দুর্লভ ।

থোকা যাবে মাছ ধরতে ক্ষীরনদীর কূলে ।

ছিপ নিয়ে গেল কোলা ব্যাঙে, মাছ নিয়ে গেল চিলে ।

থোকা ব'লে পাখিটি কোন্ বিলে চরে ।

থোকা ব'লে ডাক দিলে উড়ে এসে পড়ে ॥

ক্ষীরনদীর কূলে মাছ ধরিতে গিয়া থোকা যে কী সংকটেই পড়িয়াছিল তাহা কি তুলি দিয়া না আঁকিলে মনের ক্ষোভ মেটে ? অবশ্য, ক্ষীরনদীর ভূগোলবৃত্তান্ত থোকাবাবু আমাদের অপেক্ষা অনেক ভালো জানেন সন্দেহ নাই ; কিন্তু যে নদীতেই হউক, তিনি যে প্রাজ্ঞোচিত ধৈর্যাবলম্বন করিয়া পরম

গম্ভীরভাবে নিজ আয়তনের চতুর্ভুজ দীর্ঘ এক ছিপ ফেলিয়া মাছ ধরিতে বসিয়াছেন তাহাই যথেষ্ট কৌতুকাবহ, তাহার উপর যখন জল হইতে ডাবা চক্ষু মেলিয়া একটা অত্যন্ত উৎকট গোছের কোলা ব্যাঙ খোকার ছিপ লইয়া টান মারিয়াছে এবং অন্য দিকে ডাঙা হইতে চিল আসিয়া মাছ ছোঁ মারিয়া লইয়া চলিয়াছে, তখন তাহার বিব্রত বিম্বিত ব্যাকুল মুখের ভাব— একবার বা প্রাণপণ শক্তিতে পশ্চাতে ঝুঁকিয়া পড়িয়া ছিপ লইয়া টানাটানি, একবার বা সেই উড্ডীন চোরের উদ্দেশে দুই উৎসুক বাগ্র হস্ত উর্ধ্বে উৎক্ষেপ—এ-সমস্ত চিত্র স্তম্ভপূর্ণ সহৃদয় চিত্রকরের প্রত্যাশায় বহুকাল হইতে প্রতীক্ষা করিতেছে।

আবার খোকার পক্ষীয়ুতিও চিত্রের বিষয় বটে। মস্ত একটা বিল চোখে পড়িতেছে। তাহার ও পারটা ভালো দেখা যায় না। এ পারে তীরের কাছে একটা কোণের মতো জায়গায় বড়ো বড়ো ঘাস, বেতের ঝাড় এবং ঘন কচুর সমাবেশ; জলে শৈবাল এবং নালফুলের বন, তাহারই মধ্যে লম্বচঞ্চু দীর্ঘপদ গম্ভীরপ্রকৃতি ধ্যানপরায়ণ গোটাকতক বক-সারসের সহিত মিশিয়া থোকাবাবু ডানা গুটাইয়া নতশিরে অত্যন্ত নিবিষ্টভাবে চরিয়া বেড়াইতেছেন, এ দৃশ্যটিও বেশ—এবং বিলের অনতিদূরে ভাদ্রমাসের জলময় পক্ষীধি ধাতুক্ষেত্রের সংলগ্ন একটি কুটির; সেই কুটির-প্রাঙ্গণে বাঁশের বেড়ার উপরে বাম হস্ত রাখিয়া দক্ষিণ হস্ত বিলের অভিমুখে সম্পূর্ণ প্রসারিত করিয়া দিয়া অপরাহ্নের অবসান-সুধালোকে জননী তাহার থোকাবাবুকে ডাকিতেছেন; বেড়ার নিকটে ঘরে-ফেরা বাঁধা গরুটিও স্তিমিত কৌতুহলে সেই দিকে চাহিয়া দেখিতেছে এবং ভোজনতৃপ্ত থোকাবাবু নালবন শৈবালবনের মাঝখানে হঠাৎ মায়ের ডাক শুনিয়া সচকিতে কুটিরের দিকে চাহিয়া উড়ি-উড়ি করিতেছে, সেও স্বন্দর দৃশ্য—এবং তাহার পর তৃতীয় দৃশ্যে পাখিটি মার বুক গিয়া তাহার কাঁধে মুখ লুটাইয়াছে এবং দুই ডানায় তাহাকে অনেকটা ঝাঁপিয়া ফেলিয়াছে এবং

নিম্নলিখিতনেত্রে মা দুই হস্তে সুকোমল ডানা-সুস্থ তাহাকে বেঁধন করিয়া নিবিড় ব্লেহবন্ধনে বৃকে বাঁধিয়া ধরিয়াছেন, সেও সুন্দর দেখিতে হয়।

জ্যোতির্বিদগণ ছায়াপথের নীহারিকা পর্যবেক্ষণ করিতে করিতে দেখিতে পান, সেই জ্যোতির্ময় বাষ্পরাশির মধ্যে মধ্যে এক-এক জায়গায় যেন বাষ্প সংহত হইয়া নক্ষত্রে পরিণত হইবার উপক্রম করিতেছে। আমাদের এই ছড়ার নীহারিকারাশির মধ্যেও সহসা স্থানে স্থানে সেইরূপ অধঃসংহত আকারবদ্ধ কবিশ্বের মূর্তি দৃষ্টিপথে পড়ে। সেই-সকল নবীনমুষ্টি কল্পনামণ্ডলের মধ্যে জটিলতা কিছু নাই—প্রথম বয়সের শিশু-পৃথিবীর জায় এখনো সে কিঞ্চিৎ তরলাবস্থায় আছে ; কঠিন হইয়া উঠে নাই। একটা উদ্ভূত করি—

জাহ্নু, এ তো বড়ো রঙ্গ জাহ্নু, এ তো বড়ো রঙ্গ।

চার কালো দেখাতে পার যাব তোমার সঙ্গ।

কাক কালো, কোকিল কালো, কালো ফিঙের বেশ।

তাহার অধিক কালো, কন্তে, তোমার মাথার কেশ।

জাহ্নু, এ তো বড়ো রঙ্গ জাহ্নু, এ তো বড়ো রঙ্গ।

চার ধলো দেখাতে পার যাব তোমার সঙ্গ।

বক ধলো, বস্ত্র ধলো, ধলো রাজহংস।

তাহার অধিক ধলো, কন্তে, তোমার হাতের শব্দ।

জাহ্নু, এ তো বড়ো রঙ্গ জাহ্নু, এ তো বড়ো রঙ্গ।

চার রাঙা দেখাতে পার যাব তোমার সঙ্গ।

জবা রাঙা, করবী রাঙা, রাঙা কুসুমফুল।

তাহার অধিক রাঙা, কন্তে, তোমার মাথার সিঁদুর।

জাহ্ন, এ তো বড়ো রঙ্গ জাহ্ন, এ তো বড়ো রঙ্গ ।

চার তিতো দেখাতে পার যাব তোমার সঙ্গ ॥

নিম্ন তিতো, নিম্নে তিতো, তিতো মাকাল ফল ।

তাহার অধিক তিতো, কন্তো, বোন-সতিনের ঘর ।

জাহ্ন, এ তো বড়ো রঙ্গ জাহ্ন, এ তো বড়ো রঙ্গ ।

চার হিম দেখাতে পার যাব তোমার সঙ্গ ॥

হিম জল, হিম স্থল, হিম শীতলপাটি ।

তাহার অধিক হিম, কন্তো, তোমার বুকের ছাতি ।

কবিসম্প্রদায় কবিদ্বয়টির আরম্ভকাল হইতে বিবিধ ভাষায় বিচিত্র ছন্দে নারীজাতির স্তবগান করিয়া আসিতেছেন, কিন্তু উপরি-উদ্ধৃত স্তব-গানের মধ্যে যেমন একটি সরল সহজ ভাব এবং একটি সরল সহজ চিত্র আছে এমন অতি অল্প কাব্যেই পাওয়া যায়। ইহার মধ্যে অজ্ঞাতসারে একটুখানি সরল কোতুক আছে। সীতার ধনুক-ভাঙা এবং দ্রৌপদীর লক্ষ্যবেধ পণ খুব কঠিন পণ ছিল সন্দেহ নাই। কিন্তু এই সরল কণ্ঠাটি যে পণ করিয়া বসিয়াছে সেটি তেমন কঠিন বলিয়া বোধ হয় না। পৃথিবীতে এত কালো ধলো রাঙা মিষ্টি আছে যে তাহার মধ্যে কেবল চারিটি মাত্র নমুনা দেখাইয়া এমন কণ্ঠা লাভ করা ভাগ্যবানের কাজ। আজকাল কলির শেষ দশায় সমস্ত পুরুষের ভাগ্য ফিরিয়াছে, ধনুর্ভঙ্গ লক্ষ্যবেধ বিচারে-জয় এ-সমস্ত কিছুই আবশ্যক হয় না; উলটিয়া তাঁহারাই কোম্পানির কাগজ পণ করিয়া বসেন, এবং সেই কাপুরুষোচিত নীচতার জন্ত তিলমাত্র আত্মগ্লানি অনুভব করেন না। ইহা অপেক্ষা আমাদের আলোচিত ছড়াটির নায়ক-মহাশয়কে যে সামান্য সহজ পরীক্ষায় উত্তীর্ণ হইয়া কণ্ঠা লাভ করিতে ইয়াছিল সেও অনেক ভালো। যদিও পরীক্ষার শেষ ফল

উক্ত ছড়াটির মধ্যে পাওয়া যায় নাই তথাপি অল্পমানে বলিতে পারি লোকটি পুরা নম্বর পাইয়াছিল। কারণ, দেখা যাইতেছে, প্রত্যেক স্নোকের চারিটি উত্তরের মধ্যে চতুর্থ উত্তরটি দিব্য সন্তোষজনক হইয়াছিল। কিন্তু, পরীক্ষয়িত্রী যখন স্বয়ং সশরীরে সম্মুখে উপস্থিত ছিলেন তখন সে উত্তরগুলি জোগানো আমাদের নাযকের পক্ষে যে কিছুমাত্র কঠিন হইয়াছিল তাহা আমরা বলিতে পারি না; ও যেন ঠিক বই খুলিয়া উত্তর দেওয়ার মতো। কিন্তু, সেজন্য নিষ্ফল দ্বন্দ্ব প্রকাশ করিতে চাহি না। যিনি পরীক্ষক ছিলেন তিনি যদি সন্তুষ্ট হইয়া থাকেন তবে আমাদের আর-কিছু বলিবার নাই।

প্রথম ছত্রে কণ্ঠা কহিতেছেন—

জাহ্নু, এ তো বড়ো রঙ্গ জাহ্নু, এ তো বড়ো রঙ্গ।

ইহা হইতে বোধ হইতেছে, পরীক্ষা আরো পূর্বেই আরম্ভ হইয়াছে এবং পরীক্ষার্থী এমন মনের মতন আনন্দজনক উত্তরটি দিয়াছে যে, কণ্ঠার প্রশঞ্জিঙ্গাসার ইচ্ছা উত্তরোত্তর বাড়িয়া উঠিতেছে। বাস্তবিক এমন রঙ্গ আর-কিছু নাই।

যাহা হউক, আমাদের উপরে এই ছড়াটির রচনার ভার থাকিলে খুব সম্ভব ভূমিকাটা রীতিমত ফাঁদিয়া বসিতাম; এমন আচমকা মাঝখানে আরম্ভ করিতাম না। প্রথমে একটা পরীক্ষাশালার বর্ণনা করিতাম, সেটা যদি-বা ঠিক সেনেট হলের মতো না হইত, অনেকটা ইড্‌ন্‌ গার্ডেনের অল্পরূপ হইতে পারিত। এবং তাহার সহিত জ্যোৎস্নার আলো, দক্ষিণের বাতাস এবং কোকিলের কুহুধ্বনি যোগ করিয়া ব্যাপারটাকে বেশ একটু জমজমাট করিয়া তুলিতাম—আয়োজন অনেকরকম করিতে পারিতাম, কিন্তু এই সরল হৃদয় কণ্ঠাটি যাহার মাথার কেশ ফিঙের অপেক্ষা কালো, হাতের শাঁখা রাজহংসের অপেক্ষা ধলো, সিঁথার সিঁথুর কুহুমফুলের অপেক্ষা রাঙা, স্নেহের কোল ছেলেদের কথার অপেক্ষা মিষ্ট এবং বক্ষস্থল নীতল জলের

অপেক্ষা নিম্ন, সেই যেয়েটি—যে যেয়ে সামান্ত কয়েকটি স্তুতিবাক্য শুনিয়া সহজ বিশ্বাসে ও সরল আনন্দে আত্মবিসর্জন করিতে প্রস্তুত হইয়াছে—তাহাকে আমাদের সেই বর্ণনাবহুল মার্জিত ছন্দের বন্ধনের মধ্যে এমন করিয়া চিরকালের মতো ধরিয়া রাখিতে পারিতাম না।

কেবল এই ছড়াটি কেন, আমাদের উপর ভার দিলে আমরা অধিকাংশ ছড়াই সম্পূর্ণ সংশোধন করিয়া নূতন সংস্করণের যোগ্য করিয়া তুলিতে পারি। এমন-কি, উহাদের মধ্যে সর্বজনবিদিত নীতি এবং সর্বজনহৃদ্য তত্ত্বজ্ঞানেরও বাসা নির্মাণ করিতে পারি। কিছু না হউক, উহাদিগকে আমাদের বর্তমান শিক্ষা ও সামাজিক অবস্থার উন্নততর শ্রেণীতে উত্তীর্ণ করিয়া দিতে পারি। বিবেচনা করিয়া দেখুন, আমরা যদি কখনো বর্তমান সভ্যসমাজে চাঁদকে নিমন্ত্রণ করিয়া আনিতে ইচ্ছা করি তবে কি তাঁহাকে নিম্নলিখিতরূপে তুচ্ছ প্রলোভন দেখাইতে পারি—

আয় আয় চাঁদামামা টা দিবে যা।

চাঁদের কপালে চাঁদ টা দিবে যা।

মাছ কুটলে মুড়ো দেব,

ধান ভানলে কুঁড়ো দেব,

কালো গোকুর দুধ দেব,

দুধ খাবার বাটি দেব,

চাঁদের কপালে চাঁদ টা দিবে যা।

এ কোন্ চাঁদ! নিতান্তই বাঙালির ঘরের চাঁদ। এ আমাদের বাল্য-সমাজের সর্বজ্যোষ্ঠ সাধারণ মাতুল চাঁদ। এ আমাদের গ্রামের কুড়িরের নিকটে বায়ু-আন্দোলিত বাঁশবনের রক্তগুলির ভিতর দিয়া পরিচিত স্নেহ-হাস্যমুখে প্রাক্ষণমূলিবিবলুপ্তিত উল্লস শিশুর খেলা দেখিয়া থাকে; ইহার

সঙ্গে আমাদের গ্রামসম্পর্ক আছে। নতুবা, এতবড়ো লোকটা যিনি সপ্তবিংশতি নক্ষত্রসুন্দরীর অন্তঃপুরে বর্ষ যাপন করিয়া থাকেন, যিনি সমস্ত স্বরলোকের সুধারস আপনার অক্ষয় রৌপ্যপাত্রে রাত্রিদিন রক্ষা করিয়া আসিতেছেন, সেই শশলাহ্নন হিমাংশুমালীকে মাছের মুড়ো, ধানের কুঁড়ো, কালো গোকুর দুধ খাবার বাটির প্রলোভন দেখাইতে কে সাহস করিত ! আমরা হইলে বোধ করি পারিজাতের মধু, রজনীগন্ধার সৌরভ, বউ-কথা-কণ্ঠের গান, মিলনের হাসি, হৃদয়ের আশা, নয়নের স্বপ্ন, নববধূর লজ্জা প্রভৃতি বিবিধ অপূর্বজাতীয় দুর্লভ পদার্থের ফর্দ করিয়া বসিতাম—অথচ চাঁদ তখনো যেখানে ছিল এখনো সেখানেই থাকিত। কিন্তু ছড়ার চাঁদকে ছড়ার লোকেরা মিথ্যা প্রলোভন দিতে সাহস করিত না—থোকার কপালে টা দিয়া যাইবার জন্ত নামিয়া আসা চাঁদের পক্ষে যে একেবারেই অসম্ভব তাহা তাহার মনে করিত না। এমন ঘোরতর বিশ্বাসহীন সন্দ্বিগ্ন নাস্তিক-প্রকৃতি তাহার ছিল না। সুতরাং ভাঙারে যাহা মজুত আছে, তহবিলে যাহা কুলাইয়া উঠে, কবিত্বের উৎসাহে তাহার অপেক্ষা অত্যন্ত অধিক কিছু স্বীকার করিয়া বসিতে পারিত না। আমাদের বাংলাদেশের চাঁদামামা বাংলাদেশের সহস্র কুটির হইতে স্বকণ্ঠের সহস্র নিমন্ত্রণ প্রাপ্ত হইয়া চুপিচুপি হাঙ্গ করিত ; হাঁও বলিত না, না'ও বলিত না ; এমন ভাব দেখাইত যেন কোনদিন, কাহাকেও কিছু সংবাদ না দিয়া, পূর্বদিগন্তে যাত্রারস্ত করিবার সময়, অমনি পথের মধ্যে কৌতুক-প্রফুল্ল পরিপূর্ণ হাঙ্গমুখখানি লইয়া ঘরের কানাচে আসিয়া দাঁড়াইবে।

আমরা পূর্বেই বলিয়াছি, এই ছড়াগুলিকে একটি আস্ত জগতের ভাঙা টুকরা বলিয়া বোধ হয়। উহাদের মধ্যে বিচিত্র বিস্তৃত সুখদুঃখ শতধা-বিভক্ত হইয়া রহিয়াছে। যেমন পুরাতন পৃথিবীর প্রাচীন সমুদ্রতীরে কর্দমতটের উপর বিলুপ্তবংশ সেকালের পাখিদের পদচিহ্ন পড়িয়াছিল—অবশেষে কালক্রমে কঠিন চাপে সেই কর্দম, পদচিহ্নরেখা-সমেত, পাথর হইয়া গিয়াছে—সে চিহ্ন

আপনি পড়িয়াছিল এবং আপনি রহিয়া গেছে— কেহ খোঁজা দিয়ে খুঁদে নাই,
কেহ বিশেষ যত্নে তুলিয়া রাখে নাই— তেমনি এই ছড়াগুলির মধ্যে অনেক
দিনের অনেক হাসিকান্না আপনি অঙ্কিত হইয়াছে, ভাঙাচোরা ছন্দগুলির
মধ্যে অনেক হৃদয়বেদনা সহজেই সংলগ্ন হইয়া রহিয়াছে। কত কালের
এক-টুকরা মাহুষের মন কালসমুদ্রে ভাসিতে ভাসিতে এই বহুদূরবর্তী বর্তমানের
তীরে আসিয়া উৎকিণ্ত হইয়াছে ; আমাদের মনের কাছে সংলগ্ন হইবামাত্র
তাহার সমস্ত বিস্মৃত বেদনা জীবনের উত্তাপে লালিত হইয়া আবার অশ্রুরসে
সজীব হইয়া উঠিতেছে ।

ও পারেতে কালো রঙ, বৃষ্টি পড়ে ঝন্ ঝন্,
এ পারেতে লক্ষা গাছটি রাঙা টুকটুক করে ।
গুণবতী ভাই আমার, মন কেমন করে ॥

এ মাসটা থাক দিদি, কেঁদে ককিয়ে ।
ও মাসেতে নিয়ে যাব পাঙ্কি মাজিয়ে ॥

হাড় হল ভাজা-ভাজা, মাস হল দড়ি ।
আয় রে আয় নদীর জলে ঝাঁপ দিয়ে পড়ি ॥

এই অন্তর্বাখা, এই রুদ্ধ সঞ্চিত অশ্রুজলোচ্ছ্বাস, কোন্ কালে কোন্ গোপন
গৃহকোণ হইতে কোন্ অজ্ঞাত অখ্যাত বিস্মৃত নববধূর কোমল হৃদয়খানি বিদীর্ণ
করিয়া বাহির হইয়াছিল ! এমন কত অসহ্য কষ্ট জগতে কোনো চিহ্ন না
রাখিয়া অদৃশ্য দীর্ঘনিশ্বাসের মতো বায়ুস্রোতে বিলীন হইয়াছে ! এটা কেমন
কল্পিত দৈবক্রমে একটি শ্লোকের মধ্যে আবদ্ধ হইয়া গিয়াছে ।

ও পারেতে কালো রঙ, বৃষ্টি পড়ে ঝন্ ঝন্ ।
এমন দিনে এমন অবস্থায় মন-কেমন না করিয়া থাকিতে পারে না । চিরকালই

এমনি হইয়া আসিতেছে। বহুপূর্বে উজ্জয়িনী-রাজসভার মহাকবিও বলিয়া গিয়াছেন—

মেঘালোকে ভবতি স্থখিনোঃপ্যন্তথাবৃত্তিচেতঃ ।

.....কিং পুনর্বদূরসংস্থে ॥

কালিদাস যে কথাটি ঈষৎ দীর্ঘনিশ্বাস ফেলিয়া উল্লেখ করিয়াছেন মাত্র এই ছড়ায় সেই কথাটা বুক কাটিয়া কাঁদিয়া উঠিয়াছে—

গুণবতী ভাই আমার, মন কেমন করে...

হাড় হল ভাজা ভাজা, মাস হল দড়ি।

আয় রে আয় নদীর জলে ঝাঁপ দিয়ে পড়ি ।'

ইহার ভিতরকার সমস্ত মর্যাদিক কাহিনী, সমস্ত দুর্বিষহ বেদনাপরম্পরা কে বলিয়া দিবে? দিনে দিনে রাত্রে রাত্রে মুহূর্তে মুহূর্তে কত সহ্য করিতে হইয়াছিল—এমন সময়, সেই স্নেহস্বতীহীন স্থখহীন পরের ঘরে হঠাৎ একদিন তাহার পিতৃগৃহের চিরপরিচিত ব্যথার বাথী ভাই আপন ভগিনীটির তব্ব লইতে আসিয়াছে—হৃদয়ের স্তরে স্তরে সঞ্চিত নিগূঢ় অশ্রুবাশি সেদিন আর কি বাধা মানিতে পারে! সেই ঘর, সেই খেলা, সেই বাপ-মা, সেই স্মৃতিশৈব সমস্ত মনে পড়িয়া আর কি এক দণ্ড দূরস্ত উত্তলা হৃদয়কে বাঁধিয়া রাখা যায়! সেদিন কিছুতে আর একটি মাসের প্রতীক্ষাও প্রাণে সহিতেছিল না—বিশেষত, সেদিন নদীর ও পার নিবিড় মেঘে কালো হইয়া আসিয়াছিল; বৃষ্টি ঝঝঝঝ করিয়া পড়িতেছিল; ইচ্ছা হইতেছিল বর্ষার বৃষ্টিধারামুখরিত, মেঘচ্ছায়াশ্রামল, কুলে-কুলে-পরিপূর্ণ অগাধ শীতল নদীটির মধ্যে ঝাঁপ দিয়া পড়িয়া এখনই হাড়ের ভিতরকার জ্বালাটা নিবাইয়া আসি। ইহার মধ্যে একটি ব্যাকরণের ভুল আছে, সেটিকে বঙ্গভাষার সতর্ক অভিভাবকগণ মার্জনা করিবেন, এমন-কি, তাহার উপরেও একবিন্দু অশ্রুপাত করিবেন। ভাইয়ের প্রতি 'গুণবতী' বিশেষণ প্রয়োগ করিয়া

উক্ত অজ্ঞাতনামী কন্ঠাটি অপরিষেয় মূৰ্ত্তা প্রকাশ করিয়াছিল। সে হতভাগিনী স্বপ্নেও জানিত না, তাহার সেই একটি দিনের মর্মভেদী ক্রন্দনধ্বনির সহিত এই ব্যাকরণের ভুলটুকুও জগতে চিরস্থায়ী হইয়া যাইবে। জানিলে লজ্জায় মরিয়া যাইত। হয়তো ভুলটি গুরুতর নহে; হয়তো ভগিনীকে সংশোধন করিয়া কথাটা বলা হইতেছে এমনও হইতে পারে। সম্প্রতি ঐহারা বঙ্গভাষার বিশুদ্ধিরক্ষাত্রে ভাষাগত প্রথা এবং পুরাতন সৌন্দর্যগুলিকে বলিধান করিতে উদ্যত হইয়াছেন ভরসা করি তাঁহারাও মাঝে মাঝে স্নেহবশত আত্মবিশ্বাস হইয়া ব্যাকরণলঙ্ঘন-পূর্বক ভগিনীকে ভাই বলিয়া থাকেন, এমন-কি, পত্নীশ্রেণীয় সম্পর্কের দ্বারা প্রীতিপূর্ণ ভ্রাতৃসংশোধনে অভিহিত হইলে তৎক্ষণাৎ তাঁহাদের ভ্রম সংশোধন করিয়া দেন না।

আমাদের বাংলাদেশের এক কঠিন অন্তরবেদনা আছে—মেয়েকে শবুরবাড়ি পাঠানো। অপ্রাপ্তবয়স্ক অনভিজ্ঞ মূঢ় কন্ঠাকে পরের ঘরে যাইতে হয়, সেইজন্য বাঙালি কন্ঠার মুখে সমস্ত বঙ্গদেশের একটি ব্যাকুল করুণ দৃষ্টি নিপতিত রহিয়াছে। সেই সুরুপ কাতর স্নেহ, বাংলার শারদোৎসবে স্বর্গীয়তা লাভ করিয়াছে। আমাদের এই ঘরের স্নেহ, ঘরের দুঃখ, বাঙালির গৃহের এই চিরন্তন বেদনা হইতে অশ্রুজল আকর্ষণ করিয়া লইয়া বাঙালির হৃদয়ের মাঝখানে শারদোৎসব পল্লবে ছায়ায় প্রতিষ্ঠিত হইয়াছে। ইহা বাঙালির অধিকাংশ, এবং বাঙালির কন্ঠাপূজাও বটে। আগমনী এবং বিজয়া বাংলার মাতৃহৃদয়ের গান। অতএব সহজেই ধরিয়া লওয়া যাইতে পারে যে, আমাদের ছড়ার মধ্যেও বঙ্গজননীর এই মর্মবাথা নানা আকারে প্রকাশ পাইয়াছে।

আজ দুর্গার অধিবাস, কাল দুর্গার বিয়ে।

দুর্গা যাবেন শবুরবাড়ি সংসার কাঁদায়ে ॥

মা কাঁদেন মা কাঁদেন ধুলায় লুটায়
 সেই-যে মা পলাকাটি দিয়েছেন গলা সাজায়ে ।
 বাপ কাঁদেন বাপ কাঁদেন দরবারে বসিয়ে
 সেই-যে বাপ টাকা দিয়েছেন সিন্ধুক সাজায়ে ॥
 মাসি কাঁদেন মাসি কাঁদেন হৈশেলে বসিয়ে
 সেই-যে মাসি ভাত দিয়েছেন পাথর সাজিয়ে ॥
 পিসি কাঁদেন পিসি কাঁদেন গোয়ালে বসিয়ে
 সেই-যে পিসি দুধ দিয়েছেন বাটি সাজিয়ে ॥
 ভাই কাঁদেন ভাই কাঁদেন আঁচল ধরিয়ে
 সেই-যে ভাই কাপড় দিয়েছেন আলনা সাজিয়ে ॥
 বোন কাঁদেন বোন কাঁদেন খাটের খুরো ধরে
 সেই-যে বোন—

এইখানে, পাঠকদিগের নিকট অপরাধী হইবার আশঙ্কায় ছড়াটি শেষ করিবার পূর্বে দুই-একটি কথা বলা আবশ্যক বোধ করি। যে ভগিনীটি আজ খাটের খুরা ধরিয়া দাঁড়াইয়া দাঁড়াইয়া অজস্র অশ্রুমোচন করিতেছেন তাঁহার পূর্বব্যবহার কোনো ভদ্রকন্নার অমুকরণীয় নহে। বোনে বোনে কলহ না হওয়াই ভালো, তথাপি সাধারণত একরূপ কলহ নিত্য ঘটয়া থাকে। কিন্তু তাই বলিয়া কন্নাটির মুখে এমন ভাষা ব্যবহার হওয়া উচিত হয় না যাহা আমি অত্যন্ত ভদ্রসমাজে উচ্চারণ করিতে কুণ্ঠিত বোধ করিতেছি। তথাপি সে ছত্রটি একেবারেই বাদ দিতে পারিতেছি না কারণ তাহার মধ্যে কতকটা ইতর ভাষা আছে বটে কিন্তু তদপেক্ষা অনেক অধিক পরিমাণে বিস্তৃত করুণরস আছে। ভাষান্তরিত করিয়া বলিতে গেলে মোট কথা এই দাঁড়ায় যে, এই রোক্তগণ্যমানা বালিকাটি ইতিপূর্বে কলহকালে তাঁহার সহোদরাকে ভর্তৃখাদিকা বলিয়া অপমান করিয়া-ছেন। আমরা সেই গালিটিকে অপেক্ষাকৃত অনতিক্রম ভাষায় পরিবর্তন করিয়া

নিয়ে ছন্দ পূরণ করিয়া দিলাম—

বোন কাঁদেন বোন কাঁদেন খাটের খুরা ধরে

সেই-যে বোন গাল দিয়েছেন স্বামীখাকী বলে ।

মা অলংকার দিয়াছেন, বাপ অর্থ দিয়াছেন, মাসি ভাত খাওয়াইয়াছেন, পিসি দুধ খাওয়াইয়াছেন, ভাই কাপড় কিনিয়া দিয়াছেন—আশা করিয়া-ছিলাম এমন স্নেহের পরিবারে ভগিনীও অহরূপ কোনো প্রিয়কার্য করিয়া থাকিবেন। কিন্তু হঠাৎ শেষ ছত্রটা পড়িয়াই বন্ধে একটা আঘাত লাগে এবং চক্ষুও ছলছল করিয়া উঠে। মা-বাপের পূর্বতন স্নেহব্যবহারের সহিত বিদায়কালীন রোদনের একটা সামঞ্জস্য আছে—তাহা প্রত্যাশিত। কিন্তু যে ভগিনী সর্বদা ঝগড়া করিত এবং অকথ্য গালি দিত, বিদায়কালে তাহার কান্না যেন সব চেয়ে সক্রিয়। হঠাৎ আজ বাহির হইয়া পড়িল যে, তাহার সমস্ত দ্বন্দ্বকলহের মাঝখানে একটি সুকোমল স্নেহ গোপনে সঞ্চিত হইতেছিল—সেই অলঙ্কিত স্নেহ সহসা স্মৃতিত্র অল্পশোচনার সহিত আজ তাহাকে বড়ো কঠিন আঘাত করিল। সে খাটের খুরা ধরিয়া কাঁদিতে লাগিল। বাল্যকালে এই এক খাটে তাহারা দুই ভগিনী শয়ন করিত, এই শয়নগৃহই তাহাদের সমস্ত কলহবিবাদ এবং সমস্ত খেলাধুলার নীলাক্ষেত্র ছিল। বিচ্ছেদের দিনে এই শয়ন-ঘরে আসিয়া, এই খাটের খুরা ধরিয়া, নির্জনে গোপনে দাঁড়াইয়া, ব্যথিত বালিকা যে ব্যাকুল অশ্রুপাত করিয়াছিল, সেই গভীর স্নেহ-উৎসের নির্মল জলধারায় কলহভাবার সমস্ত কলহ প্রক্ষালিত হইয়া শুভ্র হইয়া গিয়াছে।

এই-সমস্ত ছড়ার মধ্যে একটি ছত্রে, একটি কথায়, সুখদুঃখের এক-একটি বড়ো বড়ো অধ্যায় উন্মুল্ল রহিয়া গিয়াছে। নিয়ে যে ছড়াটি উদ্ভূত করিতেছি তাহার দুই ছত্রে আশুকালা হইতে অশুকালা পর্যন্ত বঙ্গীয় জনমীর কত দিনের শোকের ইতিহাস ব্যক্ত হইয়াছে—

দোল দোল ছলুনি ।
 রাঙা মাথায় চিকুনি ।
 বর আসবে এখনি ।
 নিয়ে যাবে তখনি ॥
 কৈদে কেন মর ।

আপনি বুঝিয়া দেখো কার ঘর কর ।

একটি শিশুকন্যাকেও দোল দিতে দিতে দূরভবিষ্যৎবর্তী বিচ্ছেদসম্ভাবনা স্বতই মনে উদয় হয় এবং মায়ের চক্ষে জল আসে। তখন একমাত্র সান্ত্বনার কথা এই যে, এমনি চিরদিন হইয়া আসিতেছে। তুমিও একদিন মাকে কাঁদাইয়া পরের ঘরে চলিয়া আসিয়াছিলে—আজিকার সংসার হইতে সেদিনকার নিদারুণ বিচ্ছেদের সেই ক্ষতবেদনার সম্পূর্ণ আরোগ্য হইয়া গিয়াছে—তোমার মেয়েও যথাকালে তোমাকে ছাড়িয়া চলিয়া যাইবে এবং সে হৃৎথণ্ডি বিশ্বজগতে অধিক দিন স্থায়ী হইবে না।

পুঁটুর শ্মশুরবাড়ি-প্রয়াণের অনেক ছবি এবং অনেক প্রসঙ্গ পাওয়া যায়। সে কথাটা সর্বদাই মনে লাগিয়া আছে।

পুঁটু যাবে শ্মশুরবাড়ি সঙ্গে যাবে কে ।
 ঘরে আছে কুনো বেড়াল কোমর বেঁধেছে ॥
 আম কাঁঠালের বাগান দেব ছায়ায় ছায়ায় যেতে ।
 চার মিন্‌সে কাহার দেব পাঙ্কি বহাতে ॥
 সরু ধানের চিঁড়ে দেব পথে জল থেতে ।
 চার মাগী দাসী দেব পায়ে তেল দিতে ॥
 উড়কি ধানের মুড়কি দেব শাশুড়ি তুলাতে ॥

শেষ ছত্র দেখিলেই বিদিত হওয়া যায়, শান্তি কিসে ভুলিবে এই পরম হুঁশিয়ার তখনো সম্পূর্ণ ছিল। কিন্তু উড়কি ধানের মুড়কি দ্বারাই সেই হুঁসখ্য ব্যাপার সাধন করা যাইত এ কথা যদি বিশ্বাসযোগ্য হয়, তবে নিঃসন্দেহ এখনকার অনেক কন্টার মাতা সেই সত্যযুগের জন্ত গভীর দীর্ঘনিশ্বাস-সহকারে আক্ষেপ করিবেন। এখনকার দিনে কন্টার শান্তিকিকে যে কী উপায়ে ভুলাইতে হয় কন্টার পিতা তাহা ইহজন্মেও ভুলিতে পারেন না।

কন্টার সহিত বিচ্ছেদ একমাত্র শোকের কারণ নহে, অযোগ্য পাত্রের সহিত বিবাহ সেও একটা বিষম শেল। অথচ, অনেক সময় জানিয়া শুনিয়া মা-বাপ এবং আত্মীয়েরা স্বার্থ অথবা ধন অথবা কুলের প্রতি দৃষ্টি করিয়া নিরুপায় বালিকাকে অপাত্রের উৎসর্গ করিয়া থাকেন। সেই অত্যাচারের বেদনা সমাজ মাঝে মাঝে প্রকাশ করে। ছড়ায় তাহার পরিচয় আছে। কিন্তু পাঠকদের এ কথা মনে রাখিতে হইবে যে, ছড়ার সকল কথাই ভাঙাচোরা হাসিতে কান্নাতে অভূতে মেশানো।

ডালিম গাছে পর্তু নাচে।

তাক্ধুমাধুম বাদি বাজে ॥

আয়ী গো চিনতে পার ?

গোটাছুই অন্ন বাড়ো ॥

অন্নপূর্ণা^১ হুধের সর।

কাল যাব গো পরের ঘর ॥

পরের বেটা মারলে চড়।

কান্তে কান্তে খুড়োর ঘর ॥

খুড়ো দিলে বুড়ো বর ॥

হেই খুড়ো তোর পায়ে ধরি।

থুয়ে আয় গা মায়ের বাড়ি।

মায়ে দিল সরু শাঁখা বাপে দিল শাড়ি।

ভাই দিলে হড়কো ঠেঙা 'চল শুল্লরবাড়ি'।

তখন ইংরাজের আইন ছিল না। অর্থাৎ দাম্পত্য অধিকারের পুনঃপ্রতিষ্ঠার ভার পাহারাওয়ালার হাতে ছিল না। সুতরাং আত্মীয়গণকে উদ্যোগী হইয়া সেই কাজটা যথাসাধ্য সহজে এবং সংক্ষেপে সাধন করিতে হইত। আমার ক্ষুদ্র বুদ্ধিতে বোধ হয় ঘরের বধু-শাসনের জন্ত পুলিশের আইনের চেয়ে সেই গার্হস্থ্য আইন, কন্সটেবলের দ্রুত যষ্টির অপেক্ষা সহোদর ভ্রাতার হড়কো ঠেঙা, ছিল ভালো। আজ আমরা স্ত্রীকে বাপের বাড়ি হইতে ফিরাইবার জন্ত আদালত করিতে শিখিয়াছি, কাল হয়তো মান ভাঙাইবার জন্ত প্রেসিডেন্সি ম্যাজিস্ট্রেটের নিকট দরখাস্ত দাখিল করিতে হইবে। কিন্তু হাল নিয়মেই হউক আর সাবেক নিয়মেই হউক, নিতান্ত পাশব বলের দ্বারা অসহায়্য কন্যাকে অযোগ্যের সহিত যোজনা—এতবড়ো অস্বাভাবিক বর্বর নৃশংসতা জগতে আর আছে কি না সন্দেহ।

বাপ-মায়ের অপরাধ সমাজ বিন্মত হইয়া আসে, কিন্তু বুড়া বরটা তাহার চক্ষুশূল। সমাজ স্ত্রীত্ব বিদ্ৰূপের দ্বারা তাহার উপরেই মনের সমস্ত আক্রোশ মিটাইতে থাকে।

তালগাছ কাটম বোসের বাটম গৌরী এল° বি।

তোর কপালে বুড়ো বর আমি করব কী॥

টকা ভেঙে শঙ্খা দিলাম কানে মদনকড়ি।

বিয়ের বেলা দেখে এলুম বুড়ো চাপকাড়ি।

চোখ খাও গো বাপ-মা, চোখ খাও গো খুড়ো।

এমন বরকে বিয়ে দিয়েছিলে তামাকখেগো বুড়ো ॥

বুড়োর হুকো গেল ভেসে, বুড়ো মরে কেশে।

নেড়ে চেড়ে দেখি বুড়ো মরে রয়েছে।

ফেন গালবার সময় বুড়ো নেচে উঠেছে ॥

বুদ্ধের এমন লাহুনা আর কী হইতে পারে !

একণে বঙ্গগৃহের যিনি সম্রাট, যিনি বয়সে ক্ষুদ্রতম অথচ প্রতাপে প্রবল-
তম, সেই মহামহিম থোকা-খুকু বা খুকুনের কথাটা বলা বাকি আছে।

প্রাচীন ঋগ্বেদ ইন্দ্র-চন্দ্র-বরুণের স্তবগান উপলক্ষে রচিত—আর মাতৃ-
হৃদয়ের যুগলদেবতা থোকা এবং পুঁটুর স্তব হইতে ছড়ার উৎপত্তি। প্রাচীনতা
হিসাবে কোনোটাই ন্যূন নহে। কারণ, ছড়ার পুরাতনত্ব ঐতিহাসিক পুরাতনত্ব
নহে, তাহা সহজেই পুরাতন। তাহা আপনার আদিম সরলভাষ্যে মানব-
রচনার সর্বপ্রথম। সে এই উনবিংশ শতাব্দীর বাম্পলেশশূন্য তীব্র মধ্যাহ্ন-
রৌদ্রের মধ্যেও মানবহৃদয়ের নবীন অরুণোদয়রাগ রক্ষা করিয়া আছে।

এই চিরপুরাতন নববেদের মধ্যে যে স্নেহগাথা, যে শিশুস্তবগুলি রহিয়াছে
তাহার বৈচিত্র্য সৌন্দর্য এবং আনন্দ-উজ্জ্বাসের আর সীমা নাই। মুগ্ধহৃদয়া
বন্দনাকারিণীগণ নব নব স্নেহের ছাঁচে ঢালিয়া এক খুকুদেবতার কত মূর্তিই
প্রতিষ্ঠা করিয়াছে—সে কখনো পাখি, কখনো চাঁদ, কখনো মানিক, কখনো
ফুলের বন।

ধনকে নিয়ে বনকে যাব, সেখানে খাব কী।

নিরলে বসিয়া চাঁদের মুখ নিরখি ॥

ভালোবাসার মতো এমন সৃষ্টিছাড়া পদার্থ আর কিছুই নাই। সে
আরম্ভকাল হইতে এই সৃষ্টির আদি-অন্তে অভ্যন্তরে ব্যাপ্ত হইয়া রহিয়াছে
তথাপি সৃষ্টির নিয়ম সমস্তই লঙ্ঘন করিতে চায়। সে যেন সৃষ্টির লৌহ-

পিঙ্করের মধ্যে আকাশের পাখি। শতসহস্র বার প্রতিবেদ্য প্রতিষোধ প্রতিবাদ প্রতিঘাত পাইয়াও তাহার এ বিশ্বাস কিছুতেই গেল না যে, সে অনায়াসেই নিয়ম না মানিয়া চলিতে পারে। সে মনে মনে জানে ‘আমি উড়িতে পারি’, এইজন্তই সে লোহার শলাকাগুলোকে বারংবার তুলিয়া যায়। ধনকে লইয়া বনকে যাইবার কোনো আবশ্যক নাই, ঘরে থাকিলে সকল পক্ষেই সুবিধা। অবশ্য, বনে অনেকটা নিরালা পাওয়া যায় সন্দেহ নাই, কিন্তু তাহা ছাড়া আর বিশেষ কিছু পাওয়া যায় না। বিশেষত নিজেই স্বীকার করিতেছে, সেখানে উপযুক্ত পরিমাণে আহাৰ্য দ্রব্যের অসম্ভাব ঘটিতে পারে। কিন্তু তবু ভালোবাসা জোর করিয়া বলে, ‘তোমরা কি মনে কর আমি পারি না?’ তাহার এই অসংকোচ স্পর্ধাবাক্য শুনিয়া আমাদের মতো প্রবীণবুদ্ধি বিবেচক লোকেরও হঠাৎ বুদ্ধিভ্রংশ হইয়া যায়—আমরা বলি, তাও তো বটে, কেনই বা না পারিবে? যদি কোনো সংকীর্ণহৃদয় বস্ত-জগৎ-বদ্ধ সংশয়ী জিজ্ঞাসা করে ‘খাইবে কী’, সে তৎক্ষণাৎ অগ্নানমুখে উত্তর দেয়, ‘নিরলে বসিয়া চাঁদের মুখ নিরখি।’ শুনিবামাত্র আমরা মনে করি, ঠিক সংগত উত্তরটি পাওয়া গেল। অন্তের মুখে যাহা ঘোরতর স্বতঃসিদ্ধ মিথ্যা, যাহা উন্মাদের অত্যাঙ্কি, ভালোবাসার মুখে তাহা অবিসম্বাদিত প্রামাণিক কথা।

ভালোবাসার আর-একটি গুণ এই যে, সে এককে আর করিয়া দেয়। ভিন্ন পদার্থের প্রভেদসীমা মানিতে চাহে না। পাঠক পূর্বেই তাহার উদাহরণ পাইয়াছেন; দেখিয়াছেন একটা ছড়ায় কিছুমাত্র ভূমিকা না করিয়া থোকাকে অনায়াসেই পক্ষীজাতীয়ের শামিল করিয়া দেওয়া হইয়াছে—কোনো প্রাণীবিজ্ঞানবিৎ তাহাতে আপত্তি করিতে আসেন না। আবার পরমুহূর্তেই থোকাকে যখন আকাশের চন্দ্রের অভেদ আত্মীয়রূপে বর্ণনা করা হয় তখন কোনো জ্যোতির্বিদ তাহার প্রতিবাদ করিতে সাহস

করেন না। কিন্তু সর্বাপেক্ষা ভালোবাসার স্বেচ্ছাচারিতা প্রকাশ পায় যখন সে আড়ম্বর-পূর্বক যুক্তির অবতারণা করিয়া ঠিক শেষ মুহূর্তে তাহাকে অবজ্ঞাভরে পদাঘাত করিয়া ভাঙিয়া ফেলে। নিম্নে তাহার একটি দৃষ্টান্ত দেওয়া যাইতেছে।

চাঁদ কোথা পাব বাছা, জাদুমণি!

মাটির চাঁদ নয়^৪ গড়ে দেব

গাছের চাঁদ নয়^৪ পেড়ে দেব—

তোর মতন চাঁদ কোথায় পাব।

তুই চাঁদের শিরোমণি।

যুমো রে আমার থোকামণি।

চাঁদ আয়ত্তগম্য নহে, চাঁদ মাটির গড়া নহে, গাছের ফল নহে, এ-সমস্তই বিসৃষ্ট যুক্তি, অকাট্য এবং নূতন—ইহার কোথাও কোনো ছিদ্র নাই। কিন্তু এতদূর পর্যন্ত আসিয়া অবশেষে যদি থোকাকে বলিতে হয় যে তুমিই চাঁদ এবং তুমি সকল চন্দ্রের শ্রেষ্ঠ, তবে তো মাটির চাঁদও সম্ভব, গাছের চাঁদও আশ্চর্য নহে। তবে গোড়ায় যুক্তির কথা পাড়িবার প্রয়োজন কী ছিল?

এইখানে বোধ করি একটি কথা বলা নিতান্ত অপ্ৰাসঙ্গিক হইবে না। জ্ঞানলোকদের মধ্যে যে বহুল পরিমাণে যুক্তিহীনতা দেখা যায় তাহা বুদ্ধি-হীনতার পরিচয় নহে। তাঁহারা যে জগতে থাকেন সেখানে ভালোবাসারই একাধিপত্য। ভালোবাসা স্বর্গের মাহুষ। সে বলে, আমার অপেক্ষা আর কিছু কেন প্রধান হইবে? আমি ইচ্ছা করিতেছি বলিয়াই বিশ্বনিয়মের সমস্ত বাধা কেন অপসারিত হইবে না? সে স্বপ্ন দেখিতেছে এখনো সে স্বর্গেই আছে। কিন্তু হায়, মর্ত-পৃথিবীতে স্বর্গের মতো ঘোরতর অর্থোক্তিক পদার্থ

আর কী হইতে পারে! তথাপি পৃথিবীতে খেটুকু স্বর্গ আছে সে কেবল রমণীতে বালকে প্রেমিক ভাবকে মিলিয়া সমস্ত যুক্তি এবং নিয়মের প্রতিকূল স্রোতেও ধরাভলে আবদ্ধ করিয়া রাখিয়াছে। পৃথিবী যে পৃথিবীই এ কথা তাহার অনেক সময় ভুলিয়া যায় বলিয়াই, সেই ভ্রমক্রমেই পৃথিবীতে দেব-লোক স্থলিত হইয়া পড়ে।

ভালোবাসা এক দিকে যেমন প্রভেদসীমা লোপ করিয়া চাঁদে ফুলে থোকায পাখিতে এক মুহূর্তে একাকার করিয়া দিতে পারে, তেমনি আবার আর-এক দিকে যেখানে সীমা নাই সেখানে সীমা টানিয়া দেয়, যেখানে আকার নাই সেখানে আকার গড়িয়া বসে।

এ পর্যন্ত কোনো প্রাণীতত্ত্ববিৎ পণ্ডিত ঘুমকে স্তম্ভপায়ী অথবা অস্ত্র কোনো জীবশ্রেণীতে বিভক্ত করেন নাই। কিন্তু ঘুম নাকি থোকার চোখে আসিয়া থাকে, এইজন্য তাহার উপরে সর্বদাই ভালোবাসার স্ফূর্তনহস্ত পড়িয়া সেও কখন একটা মানুষ হইয়া উঠিয়াছে।

হাটের ঘুম, ঘাটের ঘুম, পথে পথে ফেরে।

চার কড়া দিয়ে কিন্লেম ঘুম, মণির চোখে আয় রে ॥

রাত্রি অধিক হইয়াছে, এখন তো আর হাটে ঘাটে লোক নাই। সেইজন্য সেই হাটের-ঘুম, ঘাটের-ঘুম নিরাশ্রয় হইয়া অন্ধকারে পথে পথে মানুষ খুঁজিয়া খুঁজিয়া বেড়াইতেছে। বোধ করি সেইজন্যই তাহাকে এত শ্লভ মূল্যে পাওয়া গেল। নতুবা সমস্ত রাত্রির পক্ষে চার কড়ার কড়ি এখনকার কালের মজুরির তুলনায় নিতান্তই যৎসামান্ত।

শুনা যায় গ্রীক কবিগণ এবং মাইকেল মধুসূদন দত্তও ঘুমকে স্বতন্ত্র মানবী রূপে বর্ণনা করিয়াছেন, কিন্তু নৃত্যকে একটা নির্দিষ্ট বস্তুরূপে গণ্য করা কেবল আমাদের ছড়ার মধ্যেই দেখা যায়।

থেনা নাচন থেনা। বট পাকুড়ের ফেনা ।

বলদে খালো চিনা, ছাগলে খালো ধান ।

সোনার জাতুর জগ্রে যায়ে নাচনা কিনে আন ॥

কেবল তাহাই নহে। থোকার প্রত্যেক অঙ্গপ্রত্যঙ্গের মধ্যে এই নৃত্যকে স্বতন্ত্র সীমাবদ্ধ করিয়া দেখা সেও বিজ্ঞানের দূরবীক্ষণ বা অণুবীক্ষণের দ্বারা সাধ্য নহে, স্নেহবীক্ষণের দ্বারাই সম্ভব।

হাতের নাচন, পায়ের নাচন, বাটা মুখের নাচন—

নাটা চক্ষের নাচন, কাঁটালি ভুরুর নাচন।

বাঁশির নাকের নাচন, মাজা বেকুর নাচন—

আর নাচন কী।

অনেক সাধন ক’রে

জাহু পেয়েছি ॥

ভালোবাসা কখনো অনেককে এক করিয়া দেখে, কখনো এককে অনেক করিয়া দেখে, কখনো বৃহৎকে তুচ্ছ এবং কখনো তুচ্ছকে বৃহৎ করিয়া তুলে। ‘নাচো রে নাচো রে জাহু, নাচনখানি দেখি!’ নাচনখানি! যেন জাহু হইতে তাহার নাচনখানিকে পৃথক করিয়া একটি স্বতন্ত্র পদার্থের মতো দেখা যায়; যেন সেও একটি আদরের জিনিস। ‘থোকা যাবে বেড়ু করতে তেলিমাগীদের পাড়া।’ এ স্থলে ‘বেড়ু করতে’ না বলিয়া ‘বেড়াইতে’ বলিলেই প্রচলিত ভাষার গৌরব রক্ষা করা হইত, কিন্তু তাহাতে থোকাবাবুর বেড়ানোর গৌরব হ্রাস হইত। পৃথিবীস্বত্ব লোক বেড়াইয়া থাকে, কিন্তু থোকাবাবু ‘বেড়ু’ করেন। উহাতে থোকাবাবুর বেড়ানোটি একটু বিশেষ স্বতন্ত্র এবং স্নেহাঙ্গীত পদার্থরূপে প্রকাশ পায়।

থোকা এল বেড়িয়ে।

দুধ দাও গো জুড়িয়ে ॥

দুধের বাটি তপ্ত ।

খোকা হলেন খাপ্ত ।

খোকা যাবেন নায়ে ।

লাল জুতুয়া পায়ে ।

অবশ্য, খোকাবাবু ভ্রমণ সমাধা করিয়া আসিয়া দুধের বাটি দেখিয়া ক্ষিপ্ত হইয়া উঠিয়াছেন, সে ঘটনাটি গৃহরাজ্যের মধ্যে একটি বিবম ঘটনা এবং তাঁহার যে নোঁকারোহণে ভ্রমণের সংকল্প আছে ইহাও ইতিহাসে লিপিবদ্ধ করিয়া রাখিবার যোগ্য—কিন্তু পাঠকগণ শেষ ছত্রের প্রতি বিশেষ লক্ষ্য করিয়া দেখিবেন । আমরা যদি সর্বশ্রেষ্ঠ ইংরাজের দোকান হইতে আজাহুসমুখিত বুট কিনিয়া অত্যন্ত মচ, মচ, শব্দ করিয়া বেড়াই তথাপি লোকে তাহাকে জুতা অথবা জুতি বলিবে মাত্র । কিন্তু খোকাবাবুর অতি ক্ষুদ্র কোমল চরণযুগলে ছোটো-ঘুন্টি-দেওয়া অতিক্ষুদ্র সামান্ত মূল্যের রাঙা জুতাজোড়া সেটা হইল ‘জুতুয়া’ ! স্পষ্টই দেখা যাইতেছে জুতার আদরও অনেকটা পদসম্ভ্রমের উপরেই নির্ভর করে, তাহার অন্ত মূল্য কাহারও খবরেই আসে না ।

সর্বশেষে, উপসংহারকালে আর-একটি কথা লক্ষ্য করিয়া দেখিবার আছে । যেখানে মানুষের গভীর স্নেহ, অকৃত্রিম প্রীতি, সেইখানেই তাহার দেবপূজা । যেখানে আমরা মানুষকে ভালোবাসি সেইখানেই আমরা দেবতাকে উপলব্ধি করি ; ঐ-যে বলা হইয়াছে ‘নিরলে বসিয়া চাঁদের মুখ নিরখি’, ইহা দেবতারই ধ্যান । শিশুর ক্ষুদ্র মুখখানির মধ্যে এমন কী আছে যাহা নিরীক্ষণ করিয়া দেখিবার জন্ম, যাহা পরিপূর্ণরূপে উপলব্ধি করিবার জন্ম অরণ্যের নিরালার মধ্যে গমন করিতে ইচ্ছা হয়—মনে হয়, সমস্ত সংসার, সমস্ত নিত্যনৈমিত্তিক ক্রিয়াকর্ম এই আনন্দভাণ্ডার হইতে চিস্তকে বিক্ষিপ্ত করিয়া দিতেছে ! যোগীগণ যে অমৃত-লালসায় পানাহার ত্যাগ করিয়া অরণ্যের মধ্যে অক্ষুণ্ণ অবসর অব্ধেষণ করিতেন, জননী নিজের সন্তানের

মুখে সেই দেবদুর্লভ অমৃতরসের সন্ধান প্রাপ্ত হইয়াছেন, তাই তাঁহার অন্তরের উপাসনামন্দির হইতে এই গাথা উচ্ছ্বসিত হইয়া উঠিয়াছে—

ধনকে নিয়ে বনকে ঘাব, সেখানে খাব কী।

নিরলে বসিয়া চাঁদের মুখ নিরখি ॥

সেইজন্য ছড়ার মধ্যে প্রায়ই দেখিতে পাওয়া যায়—নিজের পুত্রের সহিত দেবকীর পুত্রকে অনেক স্থলেই মিশাইয়া ফেলা হইয়াছে। অন্ত দেশে মনুষ্যে দেবতায় এরূপ মিলাইয়া দেওয়া দেবাপমান বলিয়া গণ্য হইত। কিন্তু আমার বিবেচনায় মনুষ্যের উচ্চতম মধুরতম গভীরতম জীবন্ত সম্বন্ধ-সকল হইতে দেবতাকে স্বদূরে স্বতন্ত্র করিয়া রাখিলে মনুষ্যত্বকেও অপমান করা হয়, এবং দেবত্বকেও আদর করা হয় না। আমাদের ছড়ার মধ্যে মর্তের শিশু স্বর্গের দেবপ্রতিমার সঙ্গে যখন-তখন এক হইয়া গিয়াছে—সেও অতি সহজে, অতি অবহেলে—তাঁহার জন্য স্বতন্ত্র চালচিত্রেরও আবশ্যক হইতেছে না। শিশু-দেবতার অতি অদ্ভুত অসংগত অর্থহীন চালচিত্রের মধ্যেই স্বর্গের দেবতা কখন অলক্ষিতে শিশুর সহিত মিশিয়া আপনি আসিয়া দাঁড়াইতেছেন।

খোকা ঘাবে বেড়ু করতে তেলিমাগীদের পাড়া।

তেলিমাগীরা মুখ করেছে কেন্ রে মাখনচোরা ॥

ভাঁড় ভেঙেছে, ননি খেয়েছে আর কি দেখা পাব।

কদমতলায় দেখা পেলে বাঁশি কেড়ে নেব ॥

হঠাৎ, তেলিমাগীদের পাড়ায় ক্ষুদ্র খোকাবাবু কখন যে বৃন্দাবনের বাঁশি আনিয়া ফেলিয়াছেন তাহা সে বাঁশি যাহাদের কানের ভিতর দিয়া মরমে প্রবেশ করিয়াছে তাহাঁরাই বুঝিতে পারিবে।

আমি ছড়াকে মেঘের সহিত তুলনা করিয়াছি। উভয়েই পরিবর্তনশীল, বিবিধ বর্ণে রঞ্জিত, বায়ুশ্রোতে যদৃচ্ছাভাসমান। দেখিয়া মনে হয় নিরর্থক।

ছড়াও কলাবিচার-শাস্ত্রের বাহির, মেঘবিজ্ঞানও শাস্ত্রনিয়মের মধ্যে ভালো করিয়া ধরা দেয় নাই। অথচ জড়জগতে এবং মানবজগতে এই দুই উচ্চতম অদ্ভুত পদার্থ চিরকাল মহৎ উদ্দেশ্য সাধন করিয়া আসিতেছে। মেঘ বারি-ধারায় নামিয়া আসিয়া শিশু-শস্ত্রকে প্রাণদান করিতেছে এবং ছড়াগুলিও স্নেহরসে বিগলিত হইয়া কল্পনাবৃষ্টিতে শিশুহৃদয়কে উর্বর করিয়া তুলিতেছে। লঘুকায় বন্ধনহীন মেঘ আপন লঘুত্ব এবং বন্ধনহীনতাগুণেই জগদব্যাপী হিত-সাধনে অব্যবতই উপযোগী হইয়া উঠিয়াছে, এবং ছড়াগুলিও ভারহীনতা অর্থ-বন্ধনশূন্যতা এবং চিত্রবৈচিত্র্য-বশতই চিরকাল ধরিয়া শিশুদের মনোরঞ্জন করিয়া আসিতেছে— শিশুমনোবিজ্ঞানের কোনো সূত্র সম্মুখে ধরিয়া রচিত হয় নাই।

ছেলেভুলানো ছড়া : ২

ভূমিকা

আমাদের অলংকারশাস্ত্রে নয় রসের উল্লেখ আছে, কিন্তু ছেলেভুলানো ছড়ার মধ্যে যে রসটি পাওয়া যায়, তাহা শাস্ত্রোক্ত কোনো রসের অন্তর্গত নহে। সত্যকর্ষণে মাটি হইতে যে সৌরভটি বাহির হয়, অথবা শিশুর নবনীতকোমল দেহের যে স্নেহোদবেলকর গন্ধ, তাহাকে পুষ্পচন্দন গোলাপজল আতর বা ধূপের স্নগন্ধের সহিত এক শ্রেণীতে ভুক্ত করা যায় না। সমস্ত স্নগন্ধের অপেক্ষা তাহার মধ্যে যেমন একটি অপূর্ব আদিমতা আছে, ছেলেভুলানো ছড়ার মধ্যে তেমনি একটি আদিম সৌকুমার্য আছে; সেই মাধুর্যটিকে বাল্যরস নাম দেওয়া যাইতে পারে। তাহা তীব্র নহে, গাঢ় নহে, তাহা অত্যন্ত স্নিগ্ধ সরস এব যুক্তিসংগতিহীন।

শুদ্ধমাত্র এই রসের দ্বারা আকৃষ্ট হইয়াই আমি বাংলাদেশের ছড়া সংগ্রহে প্রবৃত্ত হইয়াছিলাম। রুচিভেদবশত সে রস সকলের প্রীতিকর না হইতে পারে, কিন্তু এই ছড়াগুলি স্থায়ীভাবে সংগ্রহ করিয়া রাখা কর্তব্য সে বিষয়ে বোধ করি কাহারো মতান্তর হইতে পারে না। কারণ, ইহা আমাদের জাতীয় সম্পত্তি। বহুকাল হইতে আমাদের দেশের মাতৃভাণ্ডারে এই ছড়াগুলি রক্ষিত হইয়া আসিয়াছে; এই ছড়ার মধ্যে আমাদের মাতৃমাতামহীগণের স্নেহসংগীতস্বর জড়িত হইয়া আছে, এই ছড়ার চন্দ্রে আমাদের পিতৃপিতামহগণের শৈশবনৃত্যের নুপুরনিকণ বাৎকৃত হইতেছে। অথচ, আজকাল এই ছড়াগুলি লোকে ক্রমশই বিস্মৃত হইয়া যাইতেছে। সামাজিক পরিবর্তনের শ্রোতে ছোটোবড়ো অনেক জিনিস অলক্ষিতভাবে ভাসিয়া যাইতেছে। অতএব জাতীয় পুরাতন সম্পত্তি সযত্নে সংগ্রহ করিয়া রাখিবার উপযুক্ত সময় উপস্থিত হইয়াছে।

ছড়াগুলি ভিন্ন ভিন্ন প্রদেশ হইতে সংগ্রহ করা হইয়াছে ; এইজন্য ইহার অনেকগুলির মধ্যে বাংলার অনেক উপভাষা (dialect) লক্ষিত হইবে। একই ছড়ার অনেকগুলি পাঠও পাওয়া যায় ; তাহার মধ্যে কোনোটিই বর্জনীয় নহে। কারণ, ছড়ায় বিশুদ্ধ পাঠ বা আদিম পাঠ বলিয়া কিছু নির্ণয় করিবার উপায় অথবা প্রয়োজন নাই। কালে কালে মুখে মুখে এই ছড়াগুলি এতই জড়িত মিশ্রিত এবং পরিবর্তিত হইয়া আসিতেছে যে, ভিন্ন ভিন্ন পাঠের মধ্য হইতে কোনো-একটি বিশেষ পাঠ নির্বাচিত করিয়া লওয়া সংগত হয় না। কারণ, এই কামচারিতা কামরূপধারিতা ছড়াগুলির প্রকৃতিগত। ইহারা অতীত কীর্তির জায় মৃতভাবে রক্ষিত নহে। ইহারা সজীব, ইহারা সচল ; ইহারা দেশকালপাত্র-বিশেষে প্রতিক্রমে আপনাকে অবস্থার উপযোগী করিয়া তুলিতেছে। ছড়ার সেই নিয়তপরিবর্তনশীল প্রকৃতিটি দেখাইতে গেলে তাহার ভিন্ন ভিন্ন পাঠ রক্ষা করা আবশ্যক।

নিম্নে একটি উদাহরণ দেওয়া যাক—

প্রথম পাঠ

আগড়ুম বাগড়ুম বোড়াডুম সাজে।

ঢাক মুদং ঝাঁঝর বাজে ॥

বাজতে বাজতে চলল ডুলি।

ডুলি গেল সেই কমলাপুলি ॥

কমলাপুলির টিয়েটা।

সুখিমামার বিয়েটা ॥

আয় রঙ্গ হাটে যাই।

গুয়া পান কিনে খাই ॥

একটা পান ফোপুয়া।

মায়ে বিয়ে ঝগড়া ॥

কচি কচি কুমড়োর ঝোল ।
 ওরে খুকু গা তোল ॥
 আমি তো বটে নন্দঘোষ—
 মাথায় কাপড় দে ॥
 হলুদ বনে কলুদ ফুল—
 তারার নামে টগর ফুল ॥

দ্বিতীয় পাঠ

আগড়ুম বাগড়ুম ঘোড়াডুম সাজে ।
 ঢাঁই মিরুগেল ঘাঘর বাজে ॥
 বাজতে বাজতে প'ল ঠুলি ।
 ঠুলি গেল কমলাফুলি ॥
 আয় রে কমলা হাতে যাই ।
 পান গুয়োটা কিনে খাই ॥
 কচি কুমড়োর ঝোল ।
 ওরে জামাই গা তোল ॥
 জ্যোৎস্নাতে ফটিক ফোটে—
 কদমতলায় কে রে ।
 আমি তো বটে নন্দঘোষ—
 মাথায় কাপড় দে-রে ॥

তৃতীয় পাঠ

আগড়ুম বাগড়ুম ঘোড়াডুম সাজে ।
 লাল মিরুগেল ঘাঘর বাজে ॥
 বাজতে বাজতে এল ডুলি ।
 ডুলি গেল সেই কমলাপুলি ॥

কমলাপুলির বিয়েটা ।
 স্মিয়ামার টিয়েটা ॥
 হাড়মুড়্‌মুড়্‌ কেলে জিরে ।
 কুম্‌ কুম্‌ পানের বিঁড়ে !
 রাই রাই রাই রাবণ ॥
 হলুদ ফুলে কলুদ ফুল ।
 তারার নামে টগ্‌গর ফুল ॥
 এক গাচি করে মেয়ে খাঁড়া ।
 এক গাচি করে পুরুষ খাঁড়া ॥
 জামাই বেটা ভাত খাবি তো
 এখানে এসে বোস্‌ ।

খা গণ্ডা গণ্ডা কাঁটালের কোষ ॥

উপরি-উদ্ধৃত ছড়াগুলির মধ্যে মূল পাঠ কোনটি তাহা নির্ণয় করা অসম্ভব, এবং মূল পাঠটি রক্ষা করিয়া অল্প পাঠগুলি ত্যাগ করাও উচিত হয় না । ইহাদের পরিবর্তনগুলিও কৌতুকবহু এবং বিশেষ আলোচনার যোগ্য । ‘আগড়ুম বাগড়ুম ঘোড়াডুম সাজে’—এই ছত্রটির কোনো পরিষ্কার অর্থ আছে কি না জানি না ; অথবা যদি ইহা অল্প কোনো ছত্রের অপভ্রংশ হয় তবে সে ছত্রটি কী ছিল তাহাও অনুমান করা সহজ নহে । কিন্তু ইহা স্পষ্ট দেখা যাইতেছে, প্রথম কয়েক ছত্র বিবাহযাত্রার বর্ণনা । দ্বিতীয় ছত্রে যে বাজন্য কয়েকটির উল্লেখ আছে তাহা ভিন্ন ভিন্ন পাঠে কতই বিকৃত হইয়াছে ! আবার ভিন্ন স্থান হইতে আমরা এই ছত্রের আর-একটি পাঠ প্রাপ্ত হইয়াছি, তাহাতে আছে—

আগড়ুম বাগড়ুম ঘোড়াডুম সাজে ।

ডান মেকড়া ঘাঘর বাজে ॥

বাজতে বাজতে পড়ল টুরি।

টুরি গেল কমলাপুরী ॥

ভাষার যে ক্রমশ ক্রিপণ রূপান্তর হইতে থাকে এই-সকল ছড়া হইতে তাহার প্রত্যক্ষ দৃষ্টান্ত পাওয়া যায়।

ছড়াসংগ্রহ

১

মাসি পিসি বমগাঁবাসী বনের ধারে ঘর।
কখনো মাসি বলেন না যে খই-মোয়াটা ধর ॥
কিসের মাসি কিসের পিসি কিসের বৃন্দাবন।
এত দিনে জানিলাম মা বড়ো ধন ॥
মাকে দিলুম আমন দোলা।
বাপকে দিলুম নীলে ঘোড়া।
আপনি যাব গোড়।
আনব সোনার মউর ॥
তাইতে দেব ভায়ের বিয়ে।
আপনি নাচব ধ্যেয়ে ॥

২

কে মেরেছে কে ধরেছে সোনার গতরে।
আধকাঠা চাল দেব গালের ভিতরে ॥
কে মেরেছে কে ধরেছে কে দিয়েছে গাল।
তার সঙ্গে গোসা করে ভাত খাও নি কাল ॥
কে মেরেছে কে ধরেছে কে দিয়েছে গাল।
তার সঙ্গে কোঁদল করে আসব আমি কাল ॥

মারি নাইকো ধরি নাইকো বলি নাইকো দূর ।
সবেমাত্র বলেছি গোপাল, চরাও গে বাছুর ॥

৩

পুঁটু নাচে কোন্‌খানে ।
শতদলের মাঝখানে ।
সেখানে পুঁটু কী করে ।
চুল ঝাড়ে আর ফুল পাড়ে ।
ডুব দিয়ে দিয়ে মাছ ধরে ॥

৪

ধন ধোনা ধন ধোনা ।
চোতবোশেখের বেনা ॥
ধন বর্ষাকালের ছাতা
জাড়কালের কাঁথা ॥
ধন চুল বাঁধবার দড়ি
হড়কো দেবার নড়ি ॥
পেতে শুতে বিছানা নেই— ধন ধুলোয় গড়াগড়ি ॥
ধন পরানের পেটে ।
কোন্‌ পরানে বলব রে ধন যাও কাদাতে হেঁটে ॥
ধন ধোনা ধন ধন ।
এমন ধন যার ঘরে নাই তার বৃথায় জীবন ।

৫

ঘুমপাড়ানি মাসি পিসি আমার বাড়ি যেয়ো ।
সকল স্নাতোর কাপড় দেব, ভাত রৈঁধে থেয়ো ॥

আমার বাড়ির জাতকে আমার বাড়ি সাজে ।
লোকের বাড়ি গেলে জাহ্নু কৌদলখানি বাজে ॥

হোক কৌদল ভাঙুক খাডু ।

হু হাতে কিনে দেব ঝালের নাডু ॥

ঝালের নাডু বাছা আমার না খেলে না ছুঁলে ।

পাড়ার ছেলেগুলো কেড়ে এসে খেলে ॥

গোয়াল থেকে কিনে দেব দুদুলা গাই ।

বাছার বালাই নিয়ে আমি মরে যাই ॥

দুদুলা গাইটে পালে হল হারা ।

ঘরে আছে আঙটা দুধ আর চাপাকলা ।

তাই দিয়ে জাহ্নুকে ভোলা রে ভোলা ॥

৬

ঘুমপাড়ানি মাসি পিসি ঘুমের বাড়ি যেয়ো ।

বাটা ভরে পান দেব, গাল ভরে থেয়ো ॥

শান-বাঁধানো ঘাট দেব, বেলম মেখে নেয়ো ;

নীতলপাটি পেড়ে দেব, প'ড়ে ঘুম যেয়ো ॥

আব-কাঁঠালের বাগান দেব, ছায়ায় ছায়ায় যাবে ।

চার চার বেয়ারা দেব, কাঁধে করে নেবে ॥

তুই তুই বাদি দেব, পায়ে তেল দেবে ।

উল্কি^১ ধানের মুড়কি দেব নারেঙ্গা^২ ধানের খই ।

গাছ-পাকা রস্তু দেব হাঁড়ি-ভরা দই ॥

৭

ঘুমপাড়ানি মাসি পিসি আমার বাড়ি এসো ।
 সেজ নেই মাহুর নেই, পুঁটুর চোখে বোসো ॥
 বাটা ভরে পান দেব, গাল ভরে থেয়ো ।
 খিড়কি দুয়ার খুলে দেব, কুড়ুং করে যেয়ো ॥

৮

ও পাড়াতে যেয়ো না, ঝঁধু এসেছে ।
 ঝঁধুর পাতের ভাত থেয়ো না, ভাব লেগেছে ॥
 ভাব ভাব কদমের ফুল ফুটে রয়েছে ।
 ঢাকন খুলে দেখো, বড়ো বউর থোকা হয়েছে ॥

৯

পানকৌড়ি পানকৌড়ি ডাঙায় ওঠো'সে ।
 তোমার শাশুড়ি বলে গেছে, বেগুন কোটো'সে ।
 ও বেগুন কুটো না, বীচ রেখেছে ।
 ও ঘরেতে যেয়ো না, ঝঁধু এয়েছে ॥
 ঝঁধুর পান থেয়ো না, ঝগড়া করেছে ।
 দাদাকে দেখে কদম-পানা ফুটে উঠেছে ॥

১০

পানকৌড়ি পানকৌড়ি ডাঙায় ওঠো'সে ।
 তোমার শাশুড়ি বলে গেছেন, আলু কোটো'সে ॥
 কী করে কুটব, চাকা চাকা ক'রে ।
 ও ছয়োরে যেয়ো না, ঝঁধু এসেছে ।
 ঝঁধুর পান থেয়ো না, ভাব লেগেছে ।
 ভাব ভাব কদমের ফুল ফুটে উঠেছে ॥

১১

ঘুঘু মেতি নই
পুত কই ।
হাটে গেছে ॥
হাট কই ।
পুড়ে গেছে ॥
ছাই কই ।
গোয়ালে আছে ॥
সোনা-কুড়ে পড়বি না
ছাই-কুড়ে পড়বি ॥

১২

ওরে আমার ধন ছেলে
পথে বসে বসে কান্ছিলে ॥
মা ব'লে ব'লে ডাকছিলে ॥
ধুলো-কাদা কত মাক্ছিলে ॥
সে যদি তোমার মা হত
ধুলো-কাদা ঝেড়ে কোলে নিত ॥

১৩

পুঁটুমণি গো মেয়ে ।
বর দিব চেয়ে ॥
কোন্ গাঁয়ের বর ।

নিমাই সরকারের বেটা । পাল্‌কি বের কর ॥
বের করেছি বের করেছি ফুলের ঝারা দিয়ে ।
পুঁটুমণিকে নিয়ে যাব বকুলতলা দিয়ে ॥

১৪

ধুলোর দোসর নন্দকিশোর ধুলো-মাথা গায় ।
ধুলো ঝেড়ে করব কোলে আয় নন্দরায় ॥

১৫

ধুলোর দোসর নন্দকিশোর গা করেছ থড়ি !
কলুবাড়ি যাও, তেল আন গে, আমি দিব তার কড়ি ॥

১৬

আয় রে চাঁদা, আগড় বাঁধা, দুয়ারে বাঁধা হাতি ।
চোক ঢুলঢুল নয়নভারা, দেখুসে চাঁদের বাজি ॥

১৭

বড়োবউ গো ছোটোবউ গো জলকে যাবি গো ।
জলের মধ্যে ফুল ফুটেছে দেখতে পাবি গো ॥
কেষ্ট বেড়ান কুলে কুলে, তাঁত নিবি গো ।
তারি জন্তে মার থেয়েছি, পিঠ দেখো গো ॥
বড়োবউ গো ছোটোবউ গো আরেক কথা শুন্সে ।
রাধার ঘরে চোর ঢুকেছে চুড়োবাঁধা মিন্সে ॥
ঘটি নেয় না বাটি নেয় না, নেয় না সোনার ঝারি—
যে ঘরেতে রাঙা বউ সেই ঘরেতে চুরি ॥

১৮

থোক। গেছে মাছ ধরতে, দেবতা এল জল ।
ও দেবতা তোর পায়ে ধরি থোকন আশুক ঘর ॥
কাজ নাইকো মাছে, আগুন লাগুক মাছে ।
থোকনের পায়ে কান্দা লাগে পাছে ॥

১৯

এ পারেতে বেনা, ওপারেতে বেনা ।
 মাছ ধরেছি চুনোচানা ॥
 হাঁড়ির ভিতর ধনে ।
 গোরী বেটি কনে ॥
 নোকে বেটা বর ।
 টাকশালেতে চাকরি করে, ঘুঘুড়াড়ায় ঘর ॥
 ঘুঘুড়াড়ায় ঘুঘু মরে চালভাজা খেয়ে ।
 ঘুঘুর মরণ দেখতে যাব এয়োশাঁখা প'রে ॥
 শাঁখাটি ভাঙল । ঘুঘুটি ম'ল ॥

২০

কাঁদুনে রে কাঁদুনে কুলতলাতে বাসা ।
 পরের ছেলে কাঁদবে ব'লে মনে করেছ আশা ॥
 হাত ভাঙব পা ভাঙব, করব নদী পার ।
 সারারাত কেঁদো না রে, জাহ্নু, যুমো একবার ॥

২১

তালগাছেতে ছতুম্‌থুমো, কান আছে পাঁদারু ।
 মেঘ ডাকছে ব'লে বুক করছে গুরু গুরু ॥
 তোমাদের কিসের আনাগোনা ।
 উড়ে মেড়ার বাপ আসছে দিদিন ধিনা ধিনা ॥

২২

দোল দোল দোলানি ।
 কানে দেব চৌদানি ॥

কোমরে দেব ভেড়ারি টোপ ।
 ফেটে মরবে পাড়ার লোক ॥
 মেয়ে নয়কো সাত বেটা—
 গড়িয়ে দেব কোমরপাটা ॥
 দেখে শত্রু চেয়ে—
 আমার কত সাধের মেয়ে ॥

২৩

ইকড়ি মিকড়ি চাম চিকড়ি
 চাম কাটে মজুমদার ।
 ধয়ে এল দামুদর ।
 দামুদর ছুতরের পো ।
 হিঙুল গাছে বেঁধে থো ॥
 হিঙুল করে কড়মড় ।
 দাদা দিলে জগন্নাথ ॥
 জগন্নাথের হাঁড়িকুঁড়ি ।
 দুয়োরে বসে চাল কাঁড়ি ॥
 চাল কাঁড়তে হল বেল।
 ভাত খাওসে দুপুরবেলা ॥
 ভাতে পড়ল মাছি ।
 কোদাল দিয়ে টাচি ॥
 কোদাল হল ভোঁতা ।
 থা ছুতরের মাথা ॥

২৪

উলুকেতু হুলুকেতু নলের বাঁশি ।
 নল ভেঙেছে একাদশী ।
 একা নল পঞ্চদল ।
 কেশাবি রে কামার-সাগর ॥
 কামার-মাগী কেবুকেরানি যেম পাটরানী ॥
 আক-বন ডাব-বন ।
 কুড়ি কিস্তি বেড়া বন ॥
 কার পেটের ছয়ো ।
 কার পেটের স্থয়ো ॥
 ব'লে গেছে চড়ুই রাজা
 চোরের পেটে চাল-কড়াই ভাজা ॥
 কাঠবেড়ালি মদা মাগী কাপড় কেচে দে ।
 হারদোচ খেলাতে ডুলকি কিনে দে ॥
 ডুলকির ভিতর পাকা পান ।
 ছি, হি'তুর সোয়ামি মোচরুমান ॥
 এক-পাথর কলাপোড়া এক-পাথর ঝোল ।
 নাচে আমার খুকুমনি, বাজা তোরা ঢোল ॥

২৫

উলুকুটু ধুলুকুটু নলের বাঁশি
 নল ভেঙেছে একাদশী ॥
 একা নল পঞ্চদল ।
 মা দিয়েছে কামারশাল ॥

কামার-মাগীর ঘুব্বুকনি ।

অর্পণ দর্পণ । কুড়িগুটি ব্রাহ্মণ ॥

২৬

রাসু কেন কেঁদেছে ।

ভিজ়ে কাঠে রেঁধেছে ॥

কাল যাব আমি গঞ্জের হাট ।

কিনে আনব শুকনো কাঠ ॥

তোমার কান্না কেন শুনি ।

তোমার শিকেয় তোলা ননি ।

তুমি খাও-না সারা দিনই ॥

২৭

থোকোমণি দুধের ফেনি ডাবলোর ঘি,

থোকার বিয়ের সময় করব আমি কী ।

সাত মাগী দাসী দেব পায়ে তেল দিতে,

সাত মিন্‌সে কাহার দেব ছলান ছলাতে,

সকু ধানের চিড়ে দেব নাগর থেলাতে,

রসকরা নাড়ু দেব শাশুড়ি ভুলাতে ॥

২৮

থোকা আমাদের সোনা,

চার পুথুরের কোনা ।

বাড়িতে সেকরা ডেকে মোহর কেটে

গড়িয়ে দেব দানা—

তোমরা কেউ কোরো না মানা ॥

২২

থোকা আমাদের লক্ষ্মী ।
 গলায় দেব তঙ্কি ॥
 কাঁকালে দেব ছেলে ।
 পাক দিয়ে দিয়ে নিয়ে বেড়াব
 আমাদের ছেলে ॥’

৩০

ধন ধন ধনিয়ে কাপড় দেব বুনিয়ে ।
 তাতে দেব হীরের টোপ,
 ফেটে মরবে পাড়ার লোক ॥

৩১

আলতাছড়ি গাছের গুঁড়ি জোড়-পুতুলের বিয়ে ।
 এত টাকা নিলে বাবা, দুয়ে দিলে বিয়ে ॥
 এখন কেন কান্ছ বাবা গামছা বুড়ি দিয়ে ।
 আগে কাঁদে মা-বাপ, পাছে কাঁদে পর ।
 পাড়াপড়শি নিয়ে গেল শশুরদের ঘর ॥
 শশুরদের ঘরখানি বেতের ছাউনি ।
 তাতে বসে পান খান দুর্গা ভবানী ।
 হেঁই দুর্গা, হেঁই দুর্গা, তোমার মেয়ের বিয়ে ।
 তোমার মেয়ের বিয়ে দাও ফুলের মালা দিয়ে ॥
 ফুলের মালা গোঁদের ডালা কোন্ সোহাগির বউ ।
 হীরেদাঁদার মড়মড়ে থান ঠাকুরদাঁদার বউ ॥

১ পাঠান্তর : হিন্ধা দিয়ে বেড়াবে যেন বড়োমানুষের ছেলে ॥

এক বাড়িতে দই দ্বিবা এক বাড়িতে চিঁড়ে ।
 এমন করে ভোজন করো গোকুনাথের কিরে ॥

৩২

হাড়ে রে কন্মিলতা
 এতকাল ছিলে কোথা ॥
 এতকাল ছিলাম বনে ।
 বনেতে বাগ্দি ম'ল,
 আমারে যেতে হল ।
 তুমি নেও কলসী কাঁকে—
 আমি নিই বন্দু হাতে ।
 চলো যাই রাজপথে ।
 ছেলের মা গয়না গাঁথে,
 ছেলেটি তুড়ুক নাচে ॥

৩৩

থোকা যাবে নায়ে, রোদ লাগিবে গায়ে—
 লক্ষ টাকার মলমলি থান সোনার চাদর গায়ে ।
 তাতে নাল গোলাপের ফুল
 যত বাঙালের মেয়ে দেখে ব্যাকুল ।
 সয়দাবাদের ময়দা, কাশিম-বাজারের ঘি—
 একটু বিলম্ব করো, থোকাকে লুচি ভেজে দি ॥^১

১ পাঠান্তর : উলোর ভুঁয়ের ময়দা রে সয়দাবাদের ঘি ।
 শান্তিপুরের কড়াই এনে লুচি ভেজে দি ॥

৩৪

হুড়্ হুড়্‌নি গুড়্ গুড়্‌নি নদী এল বান ।
 শিবঠাকুর বিয়ে কল্লেন, ভিন কল্লে দান ।
 এক কল্লে রাঁধেন বাড়েন, এক কল্লে খান ।
 এক কল্লে না পেয়ে বাপের বাড়ি যান ।
 বাপেদের তেল-আমলা, মালীদের ফুল—
 এমন ক'রে চুল বাঁধব হাজার টাকা মূল ।
 হাজারে বাজারে পড়ে পেলাম খাঁড়া,
 সেই খাঁড়া দিয়ে কাটলাম নাল কচুর দাঁটা ॥

৩৫

খোকাবাবু চৌধুরী
 গাঁ পেয়েছে আগুড়ি ।
 মাছ পেয়েছে পবা ।
 আমার খোকামণির বউ ডাকছে ।
 ভাত খাওসে বাবা ॥

৩৬

একবার নাচো চাঁদের কোণা ।
 আমি মুরলী বাঁধিয়ে দেব যত লাগে সোনা ॥
 আবার তোমার নাচন আমি জানি, জানে না ব্রজাঙ্গনা ॥

৩৭

শিব নাচে ব্রহ্মা নাচে আর নাচে ইন্দ্র ।
 গোকুলে গোয়লা নাচে পাইয়ে গোবিন্দ ॥
 ক্ষীর খিবুসে ক্ষীরের নাডু মর্তমানের কলা ।
 হুটিয়ে হুটিয়ে থায় যত গোপের বালা ॥

নন্দের মন্দিরে গোয়ালা এল ধৈয়ে ।
 তাঁদের হাতে নড়ি, কাঁধে ভাঁড়—
 নাচে খেয়ে খেয়ে ॥

৩৮

থোকা নাচে কোন্‌খানে ।
 শতদলের মাঝখানে ॥
 সেখানে থোকা চুল ঝাড়ে—
 থোকা থোকা ফুল পড়ে ।
 তাই নিয়ে থোকা খেলা করে ॥

৩৯

অন্নপূর্ণা দুধের সর
 কাল যাব লো পরের ঘর ॥
 পরের বেটা মারলে চড়,
 কান্‌তে কান্‌তে খুড়োর ঘর ।
 খুড়ো দিলে বুড়ো বর ॥
 হেঁই খুড়ো তোর পায়ে ধরি
 রেখে আয় গে মায়ের বাড়ি ॥
 মায়ে দিল সুরু শাঁখা
 বাপে দিল শাড়ি ।
 ঝপ্‌ ক'রে মা বিদেয় কর—
 রথ আসছে বাড়ি ॥
 আগে আয় রে চৌপল
 পিছে যায় রে ডুলি ।

দাঁড়া রে কাহার মিনসে মাকে স্থির করি ॥
মা বড়ো নিবুঁজি কেঁদে কেন মর ।
আপুনি ভাবিয়ে দেখো কার ঘর কর ॥

৪০

খোকা নাচে বুকের মাঝে—
নাক নিয়ে গেল বোয়াল মাছে ॥
ওরে বোয়াল ফিরে আয়— খোকার নাচন দেখে যা ॥

৪১

মাসি পিসি বনকাপাসি । বনের মধ্যে টিয়ে ।
মাসি গিয়েছে বৃন্দাবন দেখে আসি গিয়ে ॥
কিসের মাসি কিসের পিসি কিসের বৃন্দাবন—
আজ হতে জানলাম মা বড়ো ধন ॥
মাকে দিলাম শাঁখা শাড়ি ।
বাপকে দিলাম নীলে ঘোড়া ॥

ভাইয়ের দিলাম বিয়ে—
কলসীতে তেল নেইকো, কিবা সাধের বিয়ে ।
কলসীতে তেল নেইকো, নাচব থিয়ে থিয়ে ॥

৪২

মাসি পিসি বনকাপাসি বনের মধ্যে ঘর ।
কখনো বল্লি নে মাসি কড়ার নাড়ু ধর ॥

৪৩

খোকো মানিক ধন,
বাড়ি-কাছে জুলের বাগান, তাতে বৃন্দাবন ॥

৪৪

কিসের লেগে কাঁদ থোকো কিসের লেগে কাঁদ ।

কিবা নেই আমার ঘরে ।

আমি সোনার বাঁশি বাঁধিয়ে দেব—

মুক্তা থরে থরে ॥

৪৫

ওরে আমার সোনা,

এতখানি রাতে কেন বেহন ধান ভানা ॥

বাড়িতে মানুষ এসেছে তিনজনা ।

বাম মাছ রৈধেলি শোলমাছের পোনা ॥

৪৬

কে ধরেছে কে মেরেছে কে দিয়েছে গাল ।

থোকাকর গুণের বালাই নিয়ে মরে যেন সে কাল ॥

৪৭

কাজল বলে আঙ্গল আমি রাঙামুখে যাই ।

কালো মুখে গেলে আমার হতমান হয় ॥

৪৮

থোকো আমার কী দিয়ে ভাত খাবে ।

নদীর কূলে চিংড়িমাছ বাড়ির বেগুন দিয়ে ॥

৪৯

থোকো যাবে রথে চড়ে, ব্যাঙ হবে সারথি

মাটির পুতুল নটর-পটর, পিঁপড়ে ধরে ছাতি—

ছাতির উপর কোম্পানি কোন্ সাহেবের খন তুমি ॥

৫০

থোকো যাবে মাছ ধরিতে, গায়ে নাগিবে কাঁদা ।
কলু বাড়ি গিয়ে তেল নেও গে, দাম দেবে তোমার দাঁদা ॥

৫১

থোকো যাবে মাছ ধরিতে ক্ষীরনদীর বিল ;
মাছ নয় গুগুলির পেছে উড়ছে দুটো চিল ॥

৫২

থোকো যাবে মোষ চরাতে, খেয়ে যাবে কী ।
আমার শিকের উপর গমের কুটি, তবলা-ভরা ঘি ॥

৫৩

থোকো ঘুমো ঘুমো ।
তালতলাতে বাঘ ডাকছে দারুণ হুমো ॥

৫৪

ঘুমতা ঘুমায় ঘুমতা ঘুমায় গাছের বাকলা ।
ষষ্ঠীতলায় ঘুম যায় মস্ত হাতি ঘোড়া ॥
ছাইগাদায় ঘুম যায় খেকি কুকুর ।
খাটপালঙ্গে ঘুম যায় ষষ্ঠী ঠাকুর ।
আমার কোলে ঘুম যায় থোকোমনি ॥

৫৫

আতা গাছে তোতা পাখি, দালিম গাছে মউ
কথা কও না কেন বউ ॥
কথা কব কী ছলে ।
কথা কইতে গা জলে ॥

৫৬

ও পারে তিল গাছটি
 তিল ঝুর ঝুর করে ।
 তারি তলায় মা আমার
 লক্ষ্মী-প্রদীপ জ্বালে ॥
 মা আমার জটাধারী
 ঘর নিকুচ্ছেন ।
 বাবা আমার বুড়োশিব
 নৌকা সাজাচ্ছেন ॥
 তাই আমার রাজেশ্বর
 ঘড়া ডুবাইছেন ।
 ওই আসছে প্যাথ্‌না বিবি
 প্যাক্ প্যাক্ প্যাক্—
 ও দাদা দেখ্ দেখ্ দেখ্ ॥

৫৭

থোকো আমার ধন ছেলে
 পথে বসে বসে কান্‌ছিলে ॥
 রাঙা গায়ে ধুলো মাথছিলে ।
 মা ব'লে ধন ডাকছিলে ॥

৫৮

থোকা থোকা ডাক পাড়ি ।
 থোকা গিয়েছে কার বাড়ি ।
 আন গো তোরা লালছড়ি ।
 থোকাকে মেরে খুন করি ॥

৫২

ঘুমপাড়ানি মাসি পিসি আমাদের বাড়ি যেয়ো ।
খাট নেই, পালঙ্ক নেই, থোকার চোখে বোসো ॥
থোকার মা বাড়ি নেই, শুয়ে ঘুম যেয়ো ।
মাথার নীচে হুধ আছে, টেনে টুনে থেয়ো ॥
নিশির কাপড় খসিয়ে দেব, বাঘের নাচন চেয়ো ।
বাটা ভরে পান দেব, দুয়োরে বসে থেয়ো ।
খিড়কি দুয়োর কেটে দেব ফুডুং ফুডুং যেয়ো ॥

৬০

খুকিমনি হুধের ফেনি, বগুগাছের মউ ।
হাড়ি ডুগুডুগানি উঠান-ঝাড়নি মণ্ডা-থেকোর বউ ॥

৬১

নিদ পাড়ে নিদ পাড়ে গাছের পাতাডি ।
বটীতলায় নিদ পাড়ে বুড়ো মাথারি ॥
থেড়ো ঘরে নিদ পাড়ে কালা কুকুর ।
আমাদের বাড়ি নিদ পাড়ে থোকা ঠাকুর ॥

৬২

হরম বিবির খড়ম পায় ।
লাল বিবির জুতো পায় ॥
চল্ লো বিবি ঢাকা যাই—
ঢাকা গিয়ে ফল খাই ।
সে ফলের বোটা নাই ॥

৬৩

ঢাকিয়া ঢাক বাজায় খালে আর বিলে ।
 হৃন্দরীয়ে বিয়া দিলাম ডাকাতের মেলে ॥
 ডাকাত আলো মা,
 পাট কাপড় দিয়ে বেড়ে নিলে,
 দেখতে দিলে না ॥
 আগে যদি জান্তাম
 ডুলি ধরে কান্তাম ॥

৬৪

ইটা কমলের মা লো ভিটা ছেড়ে দে ।
 তোর ছাওয়ালের বিয়া, বাত্ব এনে দে ॥
 ছোটো বেলায় খেলাইছিলাম ঘুটি মুছি দিয়া ।
 মা গালাইছিলেন খুবরি বলিয়া ॥
 এখন কেন কাঁদো মা গো ডুলির খুরা ধরে ।
 পরের পুতে নিয়ে যাবে ডুন্ডুমি বাজিয়ে ॥

৬৫

কে রে, কে রে, কে রে—
 তপ্ত হৃদে চিনির পান।
 মণ্ডা ফেলে দে রে ॥

৬৬

আয় রে পাখি টিয়ে—
 থোকা আমাদের পান খেয়েছে
 নজর বাধা দিয়ে ॥

৬৭

আয় রে পাখি লটুনা
ভেজে দিব তোরে ববুটনা ।
থাবি আর কল্কলাবি ।
থোকাকে নিয়ে ঘুম পাড়াবি ॥

৬৮

ষষ্ঠী বাছা পানের গোছা
তুলে নাড়া রে ।
ষে আবাগী দেখতে নারে
পাড়া ছেড়ে যা রে ॥

৬৯

ধুলায় ধূসর নন্দকিশোর
ধুলা মেখেছে গায় ।
ধুলা ঝেড়ে কোলে করো
সোনার ছাত্তরায় ॥

৭০

থোকা আমাদের কই—
জলে ভাসে থই ।
সুকোলো বাটার পান
অম্বল হল দই ॥

৭১

থোকো থোকো ডাক পাড়ি
থোকো বলে, মা, শাক তুলি ॥

মরুক মরুক শাক তোলা—

থোকো থাকে দুধ কলা ॥

৭২

আমার থোকো যাবে গাই চরাতে—

গাইয়ের নাম হাসি ।

আমি সোনা দিয়ে বাঁধিয়ে দেব

মোহন-চুড়া বাঁধি ॥

৭৩

থোকোর আমার নিদন্তের হাসি

আমি বড়োই ভালোবাসি ॥

৭৪

থোকো যাবে নায়ে লাল জুতুয়া পায়ে ।

পাঁচ শো টাকার মলমলি থান

সোনার চাদর গায়ে ॥

ভোমরা কে বলিবে কালো ।

পাটনা থেকে হলুদ এনে গা ক'রে দিব আলো ॥

৭৫

থোকো ঘুমালো দিব দান

পাব ফুলের ডালি ।

কোন ঘাটে ফুল তুলেছে

ওরে বনমালী ।

চাঁদমুখেতে রোদ্ লেগেছে,

তুলে ধরো ডালি ॥

থোকো আমাদের ধন,
বাড়িতে নটের বন ।
বাহির-বাড়ি ঘর করেছি
সোনার সিংহাসন ॥

৭৬

আয় ঘুম আয় কলাবাগান দিয়ে—
হৈড়ে-পানা মেঘ করেছে ।
লথার মা নথ পরেছে কপাল ফুটো ক'রে ।
আমানি থেতে দাঁত ভেঙেছে ।
সিঁদুর পরবে কিসে ॥

৭৭

থোকোমণির বিয়ে দেব হটমালার দেশে
তার। গাই বলদে চষে ॥
তার। হীরেয় দাঁত ঘষে ।
কুইমাছ পালঙের শাক ভারে ভারে আসে
থোকোর দিদি কোণায় বসে বাছে ।
কেউ ছুটি চাইতে গেলে বলে আর কি আমার আছে ॥

৭৮

এত টাকা নিলে বাবা ছাদনাতলায় বসে—
এখন কেন কাঁদ বাবা গামছা মুখে দিয়ে ।
আমরা যাব পরের ঘরে পর-অধীন হয়ে—
পরের বেটি মুখ করবে মুখ নাড়া দিয়ে ।
দুই চক্ষের জল পড়বে বসুধারা দিয়ে ॥

৭২

ও পারে দুটো শিয়াল চন্দন মেখেছে—
 কে দেখেছে, কে দেখেছে, দাড়া দেখেছে ॥
 দাড়ার হাতের লাল নাঠিখান ফেলে মেরেছে ।
 দুই দিকে দুই কাংলা মাছ ভেসে উঠেছে ।
 একটা নিলে কি'য়ের মা, একটা নিলে কি'য়ে ।
 ঢোকুম কুম বাজনা বাজে অকার মার বিয়ে ॥

৮০

ওই আসছে খোঁড়া জামাই ডিং ডিং বাজিয়ে ।
 কীরের হাঁড়িতে দই প'ল, ছাই থাক্ সে ॥
 হাঁড়ায় আছে কাংলা মাছ ধরে আন গে ।
 দুই দিকে দুই কাংলা মাছ ভেসে উঠেছে ॥
 একটি নিলেন গুরুঠাকুর, একটি নিলে টিয়ে ।
 টিয়ের মার বিয়ে লাল গামছা দিয়ে ।
 লাল গামছায় হল নাকো, তসর এনে দে ।
 তসর করে মসর মসর, শাড়ি এনে দে ।
 শাড়ির ভারে উঠতে নারি, শালায়া কাঁদে ॥

৮১

আলুর পাতায় ছালুরে ভাই, ভেল্লা পাতায় দই ।
 সকল জামাই এল রে আমার, খোঁড়া জামাই কই ।
 ওই আসছে খোঁড়া জামাই টুংটুডি বাজিয়ে ॥
 ভাঙা ঘরে শুতে দিলাম ইতুরে নিল কান ।
 কেঁদো না কেঁদো না জামাই, গোরু দিব দান ।
 সেই গোরুটার নাম খুইয়ো পুণ্যবতীর চাঁদ ॥

কবি-সংগীত

বাংলার প্রাচীন কাব্যসাহিত্য এবং আধুনিক কাব্যসাহিত্যের মাঝখানে কবি-ওয়ালাদের গান এক নূতন সামগ্রী এবং অধিকাংশ নূতন পদার্থের দ্বারাই হবার পরমায়ু অতিশয় স্বল্প। একদিন হঠাৎ গোধূলির সময়ে যেমন পতঙ্গে আকাশ ছাইয়া যায়, মধ্যাহ্নের আলোকেও তাহাদিগকে দেখা যায় না এবং অন্ধকার ঘনীভূত হইবার পূর্বেই তাহার। অদৃশ্য হইয়া যায়—এই কবির গানও সেইরূপ এক সময়ে বঙ্গসাহিত্যের স্বল্পক্ষণস্থায়ী গোধূলি-আকাশে অকস্মাৎ দেখা দিয়াছিল, তৎপূর্বেও তাহাদের কোনো পরিচয় ছিল না, এখনো তাহাদের কোনো সাড়াশব্দ পাওয়া যায় না।

গীতিকবিতা বাংলাদেশে বহুকাল হইতে চলিয়া আসিতেছে, এবং গীতিকবিতাই বঙ্গসাহিত্যের প্রধান গৌরবস্থল। বৈষ্ণব কবিদের পদাবলী বসন্তকালের অপৰ্ব্বাপ্ত পুষ্পমঞ্জরীর মতো; যেমন তাহার ভাবের সৌরভ তেমনি তাহার গঠনের সৌন্দর্য। রাজসভাকবি রায়গুণাকরের অন্নদামঙ্গলগান রাজকণ্ঠের মণি-মালার মতো, যেমন তাহার উজ্জলতা তেমনি তাহার কারুকার্য। আমাদের বর্তমান সমালোচ্য এই কবির গানগুলিও গান, কিন্তু ইহাদের মধ্যে সেই ভাবের গাঢ়তা এবং গঠনের পারিপাট্য নাই।

না থাকিবার কিছু কারণও আছে। পূর্বকালের গানগুলি হয় দেবতার সম্মুখে নয় রাজার সম্মুখে গীত হইত—সুতরাং স্বতই কবির আদর্শ অভ্যস্ত দুর্বল ছিল। সেইজন্য রচনার কোনো অংশেই অবহেলার লক্ষণ ছিল না, ভাব ভাষা ছন্দ রাগিণী সকলেরই মধ্যে সৌন্দর্য এবং নৈপুণ্য ছিল। তখন কবির রচনা করিবার এবং শ্রোতৃগণের শ্রবণ করিবার অব্যাহত অবসর ছিল; তখন গুপীসভার গুণাকর কবির গুণপনা-প্রকাশ সার্থক হইত।

কিন্তু ইংরাজের নূতনসৃষ্ট রাজধানীতে পুরাতন রাজসভা ছিল না, পুরাতন আদর্শ ছিল না। তখন কবির আশ্রয়দাতা রাজা হইল সর্বসাধারণ নামক এক অপরিণত শূলায়তন ব্যক্তি, এবং সেই হঠাৎ-রাজার সভার উপযুক্ত গান হইল কবির দলের গান। তখন ষথার্থ সাহিত্যরস-আলোচনার অবসর যোগ্যতা এবং ইচ্ছা কয়জনের ছিল? তখন নূতন রাজধানীর নূতনসমৃদ্ধিশালী কর্মশ্রাস্ত বণিক-সম্প্রদায় সন্ধ্যাবেলার বৈঠকে বসিয়া দুই দণ্ড আমোদের উদ্ভেজনা চাহিত, তাহার সাহিত্যরস চাহিত না।

কবির দল তাহাদের সেই অভাব পূর্ণ করিতে আসরে অবতীর্ণ হইল। তাহার। পূর্ববর্তী গুণীদের গানে অনেক পরিমাণে জল এবং কিঞ্চিৎ পরিমাণে চটক মিশাইয়া, তাহাদের ছন্দোবদ্ধ সৌন্দর্য সমস্ত ভাঙিয়া নিতান্ত স্থলভ করিয়া দিয়া, অত্যন্ত লঘু হুরে উচ্চৈঃস্বরে চারিজোড়া ঢোল ও চারিখানা কঁাসি-সহযোগে সমলে সবলে চীৎকার করিয়া আকাশ বিদীর্ণ করিতে লাগিল। কেবল গান শুনিবার এবং ভাবরস সম্ভোগ করিবার যে স্থখ তাহাতেই তখনকার সম্মুখগণ সম্ভুত ছিলেন না—তাহার মধ্যে লড়াই এবং হার-জিতের উদ্ভেজনা থাকা আবশ্যক ছিল। সরস্বতীর বীণার তারেও ঝন্ঝন্ শব্দে ঝংকার দিতে হইবে আবার বীণার কাষ্ঠদণ্ড লইয়াও ঠক্ ঠক্ শব্দে লাঠি খেলিতে হইবে। নূতন হঠাৎ-রাজার মনোরঞ্জনার্থে এই এক অপূর্ব নূতন ব্যাপারের সৃষ্টি হইল। প্রথমে নিয়ম ছিল, দুই প্রতিপক্ষদল পূর্ব হইতে পরস্পরকে জিজ্ঞাসা করিয়া উত্তর-প্রত্যুত্তর লিখিয়া আনিতেন; অবশেষে তাহাতেও তৃপ্তি হইল না—আসরে বসিয়া মুখে মুখেই বাগযুদ্ধ চলিতে লাগিল। একরূপ অবস্থায় যে কেবল প্রতিপক্ষকে আহত করা হয় তাহা নহে, ভাষা ভাব ছন্দ সমস্তই ছারখার হইতে থাকে। প্রোতারাও বেশি কিছু প্রত্যাশা করে না—কথার কোশল, অম্ব-প্রাসের ছটা এবং উপস্থিতমত জবাবেই সভা জমিয়া উঠে এবং বাহবা উচ্ছ্বসিত হইতে থাকে; তাহার উপরে আবার চারজোড়া ঢোল, চারখানা কঁাসি

এবং সম্মিলিত কর্ত্তের প্রাণপণ চীৎকার ; বিজনবিলাসিনী সরস্বতী এমন সন্তার অধিকক্ষণ টিকিতে পারেন না ।

সৌন্দর্যের সরলতায় সাহাদের দৃষ্টি আকর্ষণ করে না, ভাবের গভীরতায় সাহাদের নিমগ্ন হইবার অবসর নাই, ঘন ঘন অল্পপ্রাসে অতি শীঘ্রই তাহাদের মনকে উত্তেজিত করিয়া দেয় । সংগীত যখন বর্বর অবস্থায় থাকে তখন তাহাতে রাগরাগিণীর যতই অভাব থাক, তালপ্রয়োগের খচমচ কোলাহল যথেষ্ট থাকে । সুরের অপেক্ষা সেই ঘন ঘন সশব্দ আঘাতে অশিক্ষিত চিত্ত সহজে মাতিয়া উঠে । এক শ্রেণীর কবিতায় অল্পপ্রাস সেইরূপ ক্ষণিক, ত্বরিত, সহজ উত্তেজনার উদ্রেক করে । সাধারণ লোকের কর্ণ অতি শীঘ্র আকর্ষণ করিবার এমন সুলভ উপায় অল্পই আছে । অল্পপ্রাস যখন ভাব ভাষা ও ছন্দের অঙ্গগামী হয় তখন তাহাতে কাব্যের সৌন্দর্য বৃদ্ধি করে কিন্তু সে সকলকে ছাড়াইয়া ছাপাইয়া উঠিয়া যখন মূঢ় লোকের বাহবা লইবার জন্য অগ্রসর হয় তখন তদ্বারা সমস্ত কবিতা ইতরতা প্রাপ্ত হয় ।

কবিদলের গানে অনেক স্থলে অল্পপ্রাস—ভাব, ভাষা, এমন-কি ব্যাকরণকে ঠেলিয়া ফেলিয়া শ্রোতাদের নিকট প্রগলভতা প্রকাশ করিতে অগ্রসর হয় । অথচ তাহার যথার্থ কোনো নৈপুণ্য নাই, কারণ তাহাকে ছন্দোবদ্ধ অথবা কোনো নিয়ম রক্ষা করিয়াই চলিতে হয় না । কিন্তু যে শ্রোতা কেবল ক্ষণিক আমোদে মাতিয়া উঠিতে চাহে সে এত বিচার করে না ; এবং সাহাতে বিচার আবশ্যক এমন জিনিসও চাহে না ।

গেল গেল কুল কুল, যাক কুল—

তাহে নই আকুল ।

• লয়েছি সাহার কুল, সে আমার প্রতিকূল ।

যদি কুলকুণ্ডলিনী অহুক্লা হন আমার

অকুলের তরী কুল পাব পুনরায় ॥

এখন ব্যাকুল হয়ে কি দুকূল হারাব সই ।

তাঁহে বিপক্ষ হাসিবে যত রিপুচয় ।

পাঠকেরা দেখিতেছেন, উপরি-উদ্বৃত্ত গীতাংশে এক কুল-শব্দের কুল পাওয়া দুষ্কর হইয়াছে। কিন্তু ইহাতে কোনো গুণপনা নাই; কারণ, উহার অধিকাংশই একই শব্দের পুনরাবৃত্তিমাত্র। কিন্তু শ্রোতৃগণের কোনো বিচার নাই, তাহারা অত্যন্ত স্নলভ চাতুরীতে মুগ্ধ হইতে প্রস্তুত আছেন। এমন-কি, যদি অল্পপ্রাস-ছটার খাতিরে কবি ব্যাকরণ এবং শব্দশাস্ত্র সম্পূর্ণ লঙ্ঘন করেন তাহাতেও কাহারো আপত্তি নাই। দৃষ্টান্ত—

একে নবীন বয়স, তাতে স্নসভা,

কাব্যরসে রসিকে,

মাধুর্য গান্ধীর্ষ, তাতে 'দাস্তির্ষ' নাই,

আর আর বউ যেমনধারা ব্যাপিকে ।

অধৈর্ষ হেরে তোরে স্বজনী, ধৈর্ষ ধরা নাহি যায় ।

যদি সিদ্ধ হয় সেই কার্য করব সাহায্য,

বলি, তাই বলে যা আমায় ।

একে বাংলা শব্দের কোনো ভার নাই, ইংরাজি-প্রথা-মত তাহাতে অ্যাকসেন্ট, নাই, সংস্কৃত-প্রথা-মত তাহাতে ব্রহ্ম-দীর্ঘ রক্ষা হয় না, তাহাতে আবার সমালোচ্য কবির গানে স্তনিরমিত ছন্দের বন্ধন না থাকাতে এই-সমস্ত অযত্নকৃত রচনাগুলিকে শ্রোতার মনে মুদ্রিত করিয়া দিবার জগ্না ঘন ঘন অল্পপ্রাসের বিশেষ আবশ্যক হয়। সোজা দেয়ালের উপর লতা উঠাইতে গেলে যেমন মাঝে মাঝে পেরেক মারিয়া তাহার অবলম্বন স্থাপ্তি করিয়া যাইতে হয়, এই অল্পপ্রাসগুলিও সেইরূপ ঘন ঘন শ্রোতাদের মনে পেরেক মারিয়া যাওয়া; অনেক নির্জীব রচনাও এই কৃত্রিম উপায়ে অতি দ্রুত বেগে মনোযোগ আচ্ছন্ন করিয়া বসে। বাংলা পাঁচালিতেও এই কারণেই এত অল্পপ্রাসের ঘট।

উপস্থিতমত সাধারণের মনোরঞ্জন করিবার ভার লইয়া কবিদের গান—
ছন্দ এবং ভাষার বিস্তৃতি ও নৈপুণ্য বিসর্জন দিয়া কেবল স্থলভ অমুদ্রাস ও খুঁটা
অলংকার লইয়া কাজ সারিয়া দিয়াছে, ভাবের কবিত্ব সম্বন্ধেও তাহার মধ্যে
বিশেষ উৎকর্ষ দেখা যায় না। পূর্ববর্তী শাক্ত এবং বৈষ্ণব মহাজনদিগের ভাব-
গুলিকে অত্যন্ত তরল এবং ফিকা করিয়া কবিগণ শহরের শ্রোতাদিগকে স্থলভ মূল্যে
জোগাইয়াছেন। তাঁহাদের যাহা সংযত ছিল এখানে তাহা শিথিল এবং বিকীর্ণ।
তাঁহাদের কৃষ্ণবনে যাহা পুষ্প-আকারে প্রফুল্ল এখানে তাহা বাসি ব্যঞ্জন-আকারে
সম্মিশ্রিত।

অনেক জিনিস আছে যাহাকে স্বস্থান হইতে বিচ্যুত করিলে তাহা বিকৃত
এবং দুঃশীল হইয়া উঠে, কবির গানেও সেইরূপ অনেক ভাব তাহার যথাস্থান
হইতে পরিভ্রষ্ট হইয়া কলুষিত হইয়া উঠিয়াছে। এ কথা স্বীকার করিতে হইবে যে,
বৈষ্ণব কবিদের পদাবলীর মধ্যে এমন অংশ আছে যাহা নির্মল নহে, কিন্তু সমগ্র
মধ্যে তাহা একপ্রকার শোভা পাইয়া গিয়াছে। কবিওয়ালা সেইটিকে তাহার
সজীব আশ্রয় হইতে, তাহার সৌন্দর্য-পরিবেষ্টন হইতে, বিচ্ছিন্ন করিয়া ইতর
ভাষা এবং শিথিল ছন্দ-সহযোগে স্বতন্ত্রভাবে আমাদের সম্মুখে ধরিলে তাহা গলিত
পদার্থের ন্যায় কদর্থ মূর্তি ধারণ করে।

বৈষ্ণব কাব্যে প্রেমের নানা বৈচিত্র্যের মধ্যে রাধার খণ্ডিতা অবস্থার বর্ণনা
আছে। আধ্যাত্মিক অর্থে ইহার কোনো বিশেষ গৌরব থাকিতে পারে, কিন্তু
সাহিত্য হিসাবে শ্রীকৃষ্ণের এই কামুক ছলনার দ্বারা কৃষ্ণরাধার প্রেমকাব্যের
সৌন্দর্যও খণ্ডিত হইয়াছে তাহাতে সন্দেহ নাই। রাধিকার এই অবমাননায়
কাব্যশ্রীও অবমানিত হইয়াছে।

কিন্তু প্রচুর সৌন্দর্যরাশির মধ্যে এ-সকল বিকৃতি আমরা চোখ মেলিয়া দেখি
না; সমগ্র সৌন্দর্যপ্রভাবে তাহার দুঃশীলতা অনেকটা দূর হইয়া যায়।
লৌকিক অর্থে ধরিতে গেলে বৈষ্ণব কাব্যে প্রেমের আদর্শ অনেক স্থলে স্থলিত

হইয়াছে ; তথাপি সমগ্র পাঠের পর যাহার মনে একটা সুন্দর এবং উন্নত ভাবের সৃষ্টি না হয়, সে হয় সমস্তটা ভালো করিয়া পড়ে নাই নয় সে যথার্থ কাব্যরসের রসিক নহে ।

কিন্তু আমাদের কবিওয়ালারা বৈষ্ণব কাব্যের সৌন্দর্য এবং গভীরতা নিজেদের এবং শ্রোতাদের আয়ত্তের অতীত জানিয়া প্রধানত যে অংশ নির্বাচিত করিয়া লইয়াছেন তাহা অতি অযোগ্য । কলঙ্ক এবং ছলনা ইহাই কবিওয়ালাদের গানের প্রধান বিষয় । বারংবার রাধিকা এবং রাধিকার সখীগণ কুজাকে অথবা অপরাধকে লক্ষ্য করিয়া তীব্র সরস পরিহাসে শ্রামকে গঞ্জন করিতেছেন । তাঁহাদের আরো একটি রচনার বিষয় আছে, স্ত্রী-পক্ষ এবং পুরুষ-পক্ষের পরস্পরের প্রতি অবিশ্বাস-প্রকাশ-পূর্বক দোষারোপ করা ; সেই শথের কলহ শুনিতে শুনিতে শিক্কার জন্মে ।

যাহাদের প্রকৃত আত্মসন্মানজ্ঞান দৃঢ় তাহারা সর্বদা অভিমান প্রকাশ করিতে অবজ্ঞা করিয়া থাকে । তাহাদের মানে আঘাত লাগিলে, হয় তাহারা স্পষ্টরূপে তাহার প্রতিকার করে নয় তাহা নিঃশব্দে উপেক্ষা করিয়া যায় । প্রিয়জনদের নিকট হইতে প্রেমে আঘাত লাগিলে, হয় তাহা গোপনে বহন করে নয় সাক্ষাতভাবে সম্পূর্ণরূপে তাহার মীমাংসা করিয়া লয় । আমাদের দেশে ইহা সর্বদাই দেখিতে পাওয়া যায় পরাধীনতা যাহার অবলম্বন সেই অভিমানী ; যে এক দিকে ভিক্ষুক তাহার অপর দিকে অভিমানের অস্ত্র নাই, যে সর্ববিষয়ে অক্ষম সে কথায় কথায় অভিমান প্রকাশ করিয়া থাকে । এই অভিমান জিনিসটি বাঙালি-প্রকৃতির মজ্জাগত নির্লজ্জ দুর্বলতার পরিচায়ক ।

দুর্বলতা স্থলবিশেষে এবং পরিমাণবিশেষে সুন্দর লাগে । স্থল উপলক্ষে অভিমান কখনো কখনো স্ত্রীলোকদিগকে শোভা পায় । যতক্ষণ নায়কের প্রেমের প্রতি নায়িকার যথার্থ দাবি থাকে ততক্ষণ মাঝে মাঝে ক্রীড়াচ্ছলে

অথবা স্বল্প অপরাধের দণ্ডচ্ছলে পুরুষের প্রেমাবেগকে কিয়ৎকালের জন্য প্রতিহত করিলে সে অভিমানের একটা মাধুর্য দেখা যায়। কিন্তু গুরুতর অপরাধ অথবা বিশ্বাসঘাতের দ্বারা নায়ক যখন সেই প্রেমের মূলেই কুঠারাঘাত করে তখন যথারীতি অভিমান প্রকাশ করিতে বসিলে নিজের প্রতি একান্ত অবমাননা প্রকাশ করা হয় মাত্র ; এইজন্য তাহাতে কোনো সৌন্দর্য নাই এবং তাহা কাব্যে স্থান পাইবার যোগ্য নহে।

দুর্ভাগ্যক্রমে আমাদের দেশে স্বামীকৃত সকল প্রকার অসম্মাননা এবং অত্যাচারীকে অগত্যা সহ্য এবং মার্জনা করিতেই হয় ; কিঞ্চিৎ অশ্রুজলসিক্ত বক্রবাক্য-বাণ অথবা কিয়ৎকাল অবগুষ্ঠনাবৃত বিষুখ মৌনাবস্থা ছাড়া আর কোনো অস্ত্র নাই, অতএব আমাদের সমাজে স্ত্রীলোকের সর্বদা অভিমান জিনিসটা সত্য সন্দেহ নাই। কিন্তু তাহা সর্বত্র সুন্দর নহে ইহাও নিশ্চয় ; কারণ, যাহাতে কাহারো অবিমিশ্র স্থায়ী হীনতা প্রকাশ করে তাহা কখনোই সুন্দর হইতে পারে না।

কবিদলের গানে রাধিকার যে অভিমান প্রকাশ হইয়াছে তাহা প্রায়শই এইরূপ অযোগ্য অভিমান।—

সাধ ক'রে করেছিলেম দুর্জয় মান,

শ্রামের তায় হল অপমান।

শ্রামকে সাধলেম না, ফিরে চাইলেম না,

কথা কইলেম না রেখে মান।

কৃষ্ণ সেই রাগের অমুরাগে, রাগে রাগে গো

পড়ে পাছে চন্দ্রাবলীর নবরাগে।

ছিল পূর্বের যে পূর্বরাগ, আবার এ কী অপূর্ব রাগ,

পাছে রাগে শ্রাম রাধার আদর ভুলে যায় ॥

যার মানের মানে আমায় মানে, সে না মানে

তবে কী করবে এ মানে ।

মাধবের কত মান না হয় তার পরিমাণ,

মানিনী হয়েছি যার মানে ।

যে পক্ষে যখন বাড়ে অভিমান

সেই পক্ষে রাখতে হয় সম্মান ।

রাখতে শ্রামের মান গেল গেল মান,

আমার কিসের মান-অপমান ।

এই কয়েক ছত্রের মধ্যে প্রেমের যেটুকু ইতিহাস যে ভাবে লিপিবদ্ধ হইয়াছে তাহাতে ক্রুশের উপরেও শ্রদ্ধা হয় না, রাধিকার উপরেও শ্রদ্ধা হয় না, চন্দ্রাবলীর উপরেও অবজ্ঞার উদয় হয় ।

কেবল নায়ক-নায়িকার অভিমান নহে, পিতামাতার প্রতি কন্যার অভিমানও কবিদলের গানে সর্বদাই দেখিতে পাওয়া যায়। গিরিরাজ-মহিষীর প্রতি উমার যে অভিমানকলহ তাহাতে পাঠকের বিস্ময় উদ্বেক করে না—তাহা সর্বত্রই স্মিষ্ট বোধ হয়। তাহার কারণ, মাতৃস্নেহে উমার স্বার্থ অধিকার সন্দেহ নাই; কন্যা ও মাতার মধ্যে এই-যে আঘাত ও প্রতিঘাত তাহাতে স্নেহসমুদ্র সুন্দরভাবে তরঙ্গিত হইয়া উঠে।

মাতা-কন্যা এবং নায়ক-নায়িকার মান-অভিমান যে কবিদলের গানের প্রধান বিষয়, পূর্বেই বলিয়াছি তাহার একটা কারণ বাঙালির প্রকৃতিতে অভিমানটা কিছু বেশি, অর্থাৎ অন্তরের প্রেমের প্রতি স্বভাবতই তাহার দাবি অত্যন্ত অধিক; এমন-কি, সে প্রেম অপ্রমাণ হইয়া গেলেও ইনিয়া-বিনিয়া কাঁদিয়া-রাগিয়া আপনার দাবি সে কিছুতেই ছাড়ে না—আর-একটা কারণ, এই মান-অভিমানে উত্তর-প্রত্যুত্তরের তীব্রতা এবং জয়-পরাজয়ের উত্তেজনা রক্ষিত হয়। কবিগণ্যাদেবের গানে সাহিত্যরসের স্রষ্টা অপেক্ষা স্ফূর্ণক উত্তেজনা-উদ্বেকই প্রধান লক্ষ্য।

ধর্মভাবের উদ্দীপনাতেও নহে, রাজার সন্তোষের জ্ঞাপনও নহে, কেবল সাধারণের অবসর-রঞ্জনের জন্য গান রচনা বর্তমান বাংলায় কবিগণ্যারা এই প্রথম প্রবর্তন করেন। এখনো সাহিত্যের উপর সেই সাধারণেরই আধিপত্য, কিন্তু ইতিমধ্যে সাধারণের প্রকৃতি-পরিবর্তন হইয়াছে। এবং সেই পরিবর্তনের সঙ্গে সঙ্গে সাহিত্য গভীরতা লাভ করিয়াছে। তাহার সম্যক আলোচনা করিতে গেলে স্বতন্ত্র প্রবন্ধের অবতারণা করিতে হয়, অতএব এক্ষণে তাহার প্রয়োজন নাই।

কিন্তু সাধারণের যতই কচির উৎকর্ষ ও শিক্ষার বিস্তার হউক-না কেন তাহাদের আনন্দ-বিধানের জন্য স্থায়ী সাহিত্য এবং আবশ্যক-সাধন ও অবসর-রঞ্জনের জন্য ক্ষণিক সাহিত্যের প্রয়োজন চিরকালই থাকিবে। এখনকার দিনের খবরের কাগজ এবং নাট্যালাগুলি শেষোক্ত প্রয়োজন সাধন করিতেছে। কবি-দলের গানে যে-প্রকার উচ্চ আদর্শের শৈথিল্য এবং স্থূলভ অলংকারের বাহুল্য দেখা গিয়াছে, আধুনিক সংবাদপত্রে এবং অভিনয়ার্থে রচিত নাটকগুলিতেও কথঞ্চিৎ পরিবর্তিত আকারে তাহাই দেখা যায়। এই-সকল ক্ষণকালজাত ক্ষণ-স্থায়ী সাহিত্যে ভাষা ও ভাবের ইতরতা, সত্য এবং সাহিত্যনীতির ব্যভিচার এবং সর্ববিষয়ে রুচতা ও অসংযম দেখিতে পাওয়া যায়। অচিরকালেই সাধারণের এমন উন্নতি হইবে যে, তাহার। অবসর-বিনোদনের মধ্যেও ভদ্রোচিত সংযম, গভীরতর সত্য এবং দুর্লভতর আদর্শের প্রতিষ্ঠা দেখিতে পাইবে তাহাতে কোনো সন্দেহ নাই।

আমরা সাধারণ এবং সমগ্রভাবে কবির দলের গানের সমালোচনা করিয়াছি। স্থানে স্থানে সে-সকল গানের মধ্যে সৌন্দর্য এবং ভাবের উচ্চতাও আছে; কিন্তু মোটের উপর এই গানগুলির মধ্যে ক্ষণস্থায়িত্ব, রসের জলীয়তা এবং কাব্যকলার প্রতি অবহেলাই লক্ষিত হয়—এবং সেক্ষেপ হইবার প্রধান কারণ, এই গানগুলি ক্ষণিক উত্তেজনার জন্য উপস্থিতমত রচিত।

তথাপি এই নষ্টপরমায়ু কবির দলের গান আমাদের সাহিত্য এবং সমাজের ইতিহাসের একটি অঙ্গ— এবং ইংরাজ-রাজ্যের অভ্যুদয়ে যে আধুনিক সাহিত্য রাজসভা ত্যাগ করিয়া পৌরজনসভায় আতিথ্য গ্রহণ করিয়াছে এই গানগুলি তাহারই প্রথম পথপ্রদর্শক।

গ্রাম্যসাহিত্য

একদিন শ্রাবণের শেষে নৌকা করিয়া পাবনা-রাজশাহির মধ্যে ভ্রমণ করিতে-ছিলাম। মাঠ ঘাট সমস্ত জলে ডুবিয়াছে। ছোটো ছোটো গ্রামগুলি জলচর জীবের ভাসমান কুলায়পুঞ্জের মতো মাঝে মাঝে জাগিয়া আছে। কূলের রেখা দেখা যায় না শুধু জল ছলছল করিতেছে; ইহার মধ্যে যখন সূর্য অস্ত যাইবে এমন সময় দেখা গেল প্রায় দশ-বারো জন লোক একখানি ডিঙি বাহিয়া আসিতেছে। তাহারা সকলে মিলিয়া উচ্চকণ্ঠে এক গান ধরিয়াছে এবং দাঁড়ের পরিবর্তে এক-একখানি বাঁথারি দুই হাতে ধরিয়া গানের তালে তালে ঝাঁকে ঝাঁকে ঝপ্ ঝপ্ শব্দে জল ঠেলিয়া দ্রুত বেগে চলিয়াছে; গানের কথাগুলি শুনিবার জন্য কান পাতিলাম, অবশেষে বারংবার আবৃত্তি শুনিয়া যে দুয়াটি উদ্ধার করিলাম তাহা এই—

যুবতী, ক্যান্ বা কর মন ভারী।

পাবনা থ্যাহে আন্তে দেব ট্যাহা-দামের মোটরি ॥

ভরা বর্ষার জলপ্রাবনের উপর যখন নিঃশব্দে সূর্য অস্ত যাইতেছে এ গানটি ঠিক তখনকার উপযুক্ত কি না সে সম্বন্ধে পাঠকমাত্রেয়ই সন্দেহ হইতে পারে, কিন্তু গানের এই দুটি চরণে সেই শৈবালকীর্ণ জলময়র মাঝখান হইতে সমস্ত গ্রামগুলি যেন কথা কহিয়া উঠিল। দেখিলাম, এই গোয়াল-ঘরের পাশে, এই কূল গাছের ছায়ায়, এখানেও যুবতী মন ভারী করিয়া থাকেন এবং তাঁহার রোষারূপ কুটিলকটাক্ষপাতে গ্রাম্যকবির কবিতা ছন্দে-বন্ধে সুরে-তালে মাঠে-ঘাটে জলে-স্থলে জাগিয়া উঠিতে থাকে।

জগতে যতপ্রকার দুর্বিপাক আছে যুবতীচিন্তের বিষ্ময়তা তাহার মধ্যে অগ্রগণ্য—সেই দুর্গ্রহ-শাস্তির জন্য কবির ছন্দোন্নয়ন এবং প্রিয়প্রসাদ-বঞ্চিত হতভাগ্যগণ প্রাণপাত পর্যন্ত করিতে প্রস্তুত। কিন্তু যখন গানের মধ্যে শুনিলাম

‘পাবনা থেকে আনি দিব টাকা-দামের মোটরি’, তখন ক্ষণকালের জ্ঞান মনের মধ্যে বড়ো একটা আশ্বাস অল্পভব করা গেল। মোটরি পদার্থটি কী তাহা ঠিক জানি না, কিন্তু তাহার মূল্য যে এক টাকার বেশি নহে কবি তাহাতে সন্দেহ রাখেন নাই। জগতের এক প্রান্তে পাবনা জিলায় যে এমন একটা স্থান আছে যেখানে প্রতিকূল প্রণয়িনীর জ্ঞান অসাধ্যসাধন করিতে হয় না, পাবনা অপেক্ষা দুর্গম স্থানে যাইতে এবং ‘মোটরি’ অপেক্ষা দুর্লভ পদার্থ সংগ্রহ করিতে হয় না, ইহা মনে করিলে ভবযন্ত্রণা অপেক্ষাকৃত সূক্ষ্ম বলিয়া বোধ হয়। কালিদাস ভবভূতি প্রভৃতি প্রথম শ্রেণীর কবিরা এমন স্থলে নিশ্চয়ই মানস-সরোবরের স্বর্ণপদ্ম, আকাশের তারা এবং নন্দনকাননের পারিজাত অগ্নানয়নে হাঁকিয়া বসিতেন। এবং উজ্জয়িনীর প্রথম শ্রেণীর যুবতীরা শিখরিণী ও মন্দাকিনীস্বতীরা এমন দুঃসাধ্য অস্থানবাসিনীর প্রস্তাবমাত্র শুনিলে প্রসন্ন না হইয়া থাকিতে পারিতেন না।

অন্তত কাব্য পড়িয়া এইরূপ ভ্রম হয়। কিন্তু অবিখ্যাসী গণজীবী লোকেরা এতটা কবিত্ব বিশ্বাস করে না। শুদ্ধমাত্র মস্তপাঠের দ্বারা এক পাল ভেড়া মারা যায় কি না এ প্রশ্নের উত্তরে ভল্টেয়ার বলিয়াছেন, যায়, কিন্তু তাহার সঙ্গে সঙ্গে যথেষ্ট পরিমাণে আর্সেনিক বিষও থাকা চাই। মন-ভারী-করা যুবতীর পক্ষে আকাশের তারা, নন্দনের পারিজাত এবং প্রাণসমর্পণের প্রস্তাব সন্তোষজনক হইতে পারে, কিন্তু অধিকাংশ স্থলেই তাহার সঙ্গে সঙ্গে বাজুবন্ধ বা চরণচক্রের প্রয়োজন হয়। কবি ঐ কথাটা চাপিয়া যান ; তিনি প্রমাণ করিতে চান যে কেবল মস্তবলে, কেবল ছন্দ এবং ভাবের জোরেই কাজ সিদ্ধ হয়—অলংকারের প্রয়োজন হইতে পারে, কিন্তু তাহা কাব্যালংকারের। এ দিকে আমাদের পাবনার জনপদবাসিনীর কাব্যের আড়ম্বর বাহ্যিক জ্ঞান করেন, এবং তাঁহাদের চিরাহুরক প্রামবাসী কবি মস্ততন্ত্র বাদ দিয়া একেবারেই সোজা টাকা-দামের মোটরির কথাটা পাড়িয়া বসেন ; সময় নষ্ট করেন না।

তবুও একটা ছন্দ এবং একটা সুর চাই। এই জগৎপ্রাপ্তে এই পাবনা জিলার বিলের ধারেও তাহার প্রয়োজন আছে। তাহাতে করিয়া ঐ মোটরির দাম এক টাকার চেয়ে অনেকটা বাড়িয়া যায়। ঐ মোটরটাকে রসের এবং ভাবের পরশ-পাথর ছোঁওয়াইয়া দেওয়া হয়। গানের সেই দুটো লাইনকে প্রচলিত গজে বিনা সুরে বলিলে তাহার মধ্যে যে-একটি রুঢ় দৈন্ত্য আসিয়া পড়ে, ছন্দে সুরে তাহা নিমেষের মধ্যে ঘুচিয়া যায়; সংসারের প্রতিদিনের ধূলিম্পর্শ হইতে ঐ ক'টি তুচ্ছ কথা ভাবের আবরণে আবৃত হইয়া উঠে।

মাছুষের পক্ষে ইহার একটা একান্ত প্রয়োজন আছে। 'যে-সকল সাংসারিক ব্যাপারের দ্বারা সে সর্বদা ঘনিষ্ঠভাবে পরিবৃত্ত তাহাকে সে ছন্দে লয়ে মগ্নিত করিয়া তাহার উপর নিত্যসৌন্দর্যময় ভাবের রশ্মিপাত করিয়া দেখিতে চায়।

সেইজন্ত জনপদে যেমন চাষবাস এবং খেয়া চলিতেছে—সেখানে কামারের ঘরে লাঙলের ফলা, ছুতারের ঘরে ঢেঁকি এবং স্বর্ণকারের ঘরে টাকাদামের মোটরি নির্মাণ হইতেছে—তেমনি সঙ্গে সঙ্গে ভিতরে ভিতরে একটা সাহিত্যের গঠনকার্যও চলিতেছে; তাহার বিশ্রাম নাই। প্রতিদিন যাহা বিক্ষিপ্ত বিচ্ছিন্ন খণ্ড খণ্ড ভাবে সম্পন্ন হইতেছে সাহিত্য তাহাকে ঐক্যশূদ্রে গাঁথিয়া নিত্যকালের জন্ত প্রস্তুত করিতে চেষ্টা করিতেছে। গ্রামের মধ্যে প্রতিদিনের বিচিত্র কাজও চলিতেছে এবং তাহার ছিদ্রে ছিদ্রে চিরদিনের একটা রাগিণী বাজিয়া উঠিবার জন্ত নিয়ত প্রয়াস পাইতেছে।

পদ্মা বাহিয়া চলিতে চলিতে বালুচরের মধ্যে যখন চকাচকীর কলরব শুনা যায় তখন তাহাকে কোকিলের কুহতান বলিয়া কাহারো ভ্রম হয় না, তাহাতে পঞ্চম মধ্যম কড়িকোমল কোনোপ্রকার সুর ঠিকমত লাগে না ইহা নিশ্চয়, কিন্তু তবু ইহাকে পদ্মাচরের গান বলিলে কিছুই অসংগত হয় না। কারণ, ইহাতে সুর বেসুর যাহাই লাগুক, সেই নির্মল নদীর হাওয়ায় শীতের রৌদ্রে অসংখ্য প্রাণীর জীবনস্বপ্নসন্তোষের আনন্দধ্বনি বাজিয়া উঠে।

গ্রাম্যসাহিত্যের মধ্যেও কল্পনার তান অধিক থাক্ বা না-থাক্ সেই আনন্দের সুর আছে। গ্রামবাসীরা যে জীবন প্রতিদিন ভোগ করিয়া আসিতেছে, যে কবি সেই জীবনকে ছন্দে তালে বাজাইয়া তোলে সে কবি সমস্ত গ্রামের হৃদয়কে ভাষা দান করে। পদ্মাচরের চক্রবাক-সংগীতের মতো তাহা নিখুঁত সুর-তালের অপেক্ষা রাখে না। মেঘদূতের কবি অলকা পর্যন্ত গিয়াছেন, তিনি উজ্জয়িনীর রাজসভার কবি। আমাদের অখ্যাত গানের কবি কঠিন দায়ে পড়িয়াও পাবনা শহরের বেশি অগ্রসর হইতে পারে নাই; যদি পারিত তবে তাহার গ্রামের লোক তাহার সঙ্গ ত্যাগ করিত। কল্পনার সংকীর্ণতার দ্বারা ই সে আপন প্রতিবেশীবর্গকে ঘনিষ্ঠস্থত্রে বাঁধিতে পারিয়াছে এবং সেই কারণেই তাহার গানের মধ্যে, কল্পনাপ্রিয় একক কবির নহে, পরস্তু সমস্ত জনপদের হৃদয় কলরবে ধ্বনিত হইয়া উঠিয়াছে।

সেইজন্ত বাংলা জনপদের মধ্যে ছড়া গান কথা-আকারে যে সাহিত্য গ্রামবাসীর মনকে সকল সময়ই দোল দিতেছে তাহাকে কাব্যহিসাবে গ্রহণ করিতে গেলে তাহার সঙ্গে সঙ্গে মনে মনে সমস্ত গ্রাম, সমস্ত লোকালয়কে জড়াইয়া লইয়া পাঠ করিতে হয়; তাহারাই ইহার ভাঙা ছন্দ এবং অপূর্ণ মিলকে অর্থে ও প্রাণে ভরাট করিয়া তোলে। গ্রাম্যসাহিত্য বাংলার গ্রামের ছবির, গ্রামের স্মৃতির অপেক্ষা রাখে; সেইজন্তই বাঙালির কাছে ইহার একটি বিশেষ রস আসে। বৈষ্ণবী যখন ‘জয় রাধে’ বলিয়া ভিক্ষা করিতে, অন্তঃপুরের আঙিনায় আসিয়া দাঁড়ায় তখন কুতূহলী গৃহকর্ত্তী এবং অবগুষ্ঠিত বধূগণ তাহা শুনিবার জন্ত উৎসুক হইয়া আসেন। প্রবীণ পিতামহী, গল্পে গানে ছড়ায় যিনি আকর্ষণ পরিপূর্ণ—কত গুরুপক্ষের জ্যোৎস্নায় ও কৃষ্ণপক্ষের তারার আলোকে তাঁহাকে উদ্ভাসিত করিয়া তুলিয়া গৃহের বালকবালিকা যুবকযুবতী একাগ্রমনে বহু শত বৎসর ধরিয়া যাহা শুনিয়া আসিতেছে বাঙালি পাঠকের নিকট তাহার রস গভীর এবং অক্ষয়।

গাছের শিকড়টা যেমন মাটির সঙ্গে জড়িত এবং তাহার অগ্রভাগ আকাশের দিকে ছড়াইয়া পড়িয়াছে, তেমনি সর্বত্রই সাহিত্যের নিম্ন অংশ স্বদেশের মাটির মধ্যেই অনেক পরিমাণে জড়িত হইয়া ঢাকা থাকে ; তাহা বিশেষরূপে সংকীর্ণরূপে দেশীয়, স্থানীয়। তাহা কেবল দেশের জনসাধারণেরই উপভোগ্য ও আয়ত্তগম্য ; সেখানে বাহিরের লোক প্রবেশের অধিকার পায় না। সাহিত্যের যে অংশ সার্বভৌমিক তাহা এই প্রাদেশিক-নিম্নস্তরের থাকটার উপরে দাঁড়াইয়া আছে। এইরূপ নিম্নসাহিত্য এবং উচ্চসাহিত্যের মধ্যে বরাবর ভিতরকার একটি যোগ আছে। যে অংশ আকাশের দিকে আছে তাহার ফুল-ফল ডালপালার সঙ্গে মাটির নীচেকার শিকড়গুলার তুলনা হয় না ; তবু তত্ত্ববিদদের কাছে তাহাদের সাদৃশ্য ও সম্বন্ধ কিছুতেই ঘুচিবার নহে।

নীচের সহিত উপরের এই-যে যোগ, প্রাচীন বঙ্গসাহিত্য আলোচনা করিলে ইহা স্পষ্ট দেখিতে পাওয়া যায়। অন্নদামঙ্গল ও কবিকঙ্কণের কবি যদিচ রাজসভা-ধনীসভার কবি, যদিচ তাঁহার উভয়ে পণ্ডিত, সংস্কৃত কাব্যসাহিত্যে বিশারদ, তথাপি দেশীয় প্রচলিত সাহিত্যকে বেশি দূর ছাড়াইয়া বাইতে পারেন নাই। অন্নদামঙ্গল ও কুমারসম্ভবের আখ্যানে প্রভেদ অল্প ; কিন্তু অন্নদামঙ্গল কুমারসম্ভবের ছাঁচে গড়া হয় নাই। তাহার দেবদেবী বাংলাদেশের গ্রাম্য হরগৌরী। কবিকঙ্কণ চণ্ডী, ধর্ম্মঙ্গল, মনসার ভাসান, সত্যপীরের কথা, সমস্তই গ্রাম্যকাহিনী অবলম্বনে রচিত। সেই গ্রাম্য ছড়াগুলির পরিচয় পাইলে তবেই ভারতচন্দ্র-মুকুন্দরাম-রচিত কাব্যের স্বার্থ পরিচয় পাইবার পথ হয়। রাজসভার কাব্যে ছন্দ মিল ও কাব্যকলা সুসম্পূর্ণ সন্দেহ নাই, কিন্তু গ্রাম্য ছড়াগুলির সহিত তাহার মর্মগত প্রভেদ ছিল না।

আমার হাতে যে ছড়াগুলি সঞ্চিত হইয়াছে তাহা অপেক্ষাকৃত পুরাতন কি নূতন নিঃসন্দেহ বলিতে পারি না। কিন্তু দুই-এক শত বৎসরে এ-সকল কবিতার বয়সের কম-বেশি হয় না। আজ পঞ্চাশ বৎসর পূর্বে পল্লীর কবি

যে ছড়া রচনা করিয়াছে তাহাকে এক হিসাবে মুকুন্দরামের সমসাময়িক বলা যায় ; কারণ, গ্রামের প্রাণটি যেখানে ঢাকা থাকে কালশ্রোতের ঢেউগুলি সেখানে তেমন জোরের সঙ্গে ঘা দিতে পারে না। গ্রামের জীবনযাত্রা এবং সেই জীবনযাত্রার সঙ্গী সাহিত্য, বহুকাল বিনা পরিবর্তনে একই ধারায় চলিয়া আসে।

কেবল সম্প্রতি অতি অল্পদিন হইল ‘আধুনিক কাল’ দূরদেশাগত নবীন জামাতার মতো নূতন চাল-চলন লইয়া পল্লীর অন্তঃপুরেও প্রবেশ করিয়াছে। গ্রামের মধ্যেও পরিবর্তনের হাত পড়িয়াছে। এজন্য গ্রাম্য ছড়া-সংগ্রহের ভার সাঁহারা লইয়াছেন তাঁহারা আমাকে লিখিতেছেন—

‘প্রাচীনা ভিন্ন আজকালকার মেয়েদের কাছে এইরূপ কবিতা গুনিবার প্রত্যাশা নাই। তাঁহারা ইহা জানে না এবং জানিবার কৌতুহলও রাখে না। বর্ষীয়সী স্ত্রীলোকের সংখ্যা খুব কম। তাঁহাদের মধ্যেও অনেকে উহা জানেন না। দুই-একজন জানিলেও সকলে জানেন না। সুতরাং পাঁচটি ছড়া সংগ্রহ করিতে হইলেই পাঁচ গ্রামের পাঁচজন বৃদ্ধার আশ্রয় লইতে হয়। এ দেশের পুরাতন বৈষ্ণবীগণের দুই-একজন মাঝে মাঝে এইরূপ কবিতা বলিয়া ভিক্ষা করে দেখিতে পাই। তাঁহাদের কথিত ছড়াগুলির সমস্তই রাধাকৃষ্ণের প্রেম-বিষয়ক। এইরূপ বৈষ্ণবী সচরাচর মেলে না এবং মিলিলেও অনেকেই একবিধ ছড়াই গাহিয়া থাকে। এমন স্থলে একাধিক নূতন ছড়া সংগ্রহ করিতে হইলে অপেক্ষাকৃত বহু বৈষ্ণবীর সাহায্য আবশ্যক। তবে শশুশ্রামলা মাতৃভূমির রূপায় প্রতি সপ্তাহে অন্তত দু-একটি বিদেশিনী নূতন বৈষ্ণবীর ‘জয় রাধে’ রব শুনিতে পাওয়া বড়ো কিছু আশ্চর্যের বিষয় নহে।

পূর্বে গ্রাম্য ছড়াগুলি গ্রামের সম্ভ্রান্ত বংশের মেয়েদেরও সাহিত্যরস-তৃষ্ণা মিটাইবার জন্য ভিখারিনী ও পিতামহীদের মুখে মুখে ঘরে ঘরে প্রচারিত হইত। এখন তাঁহারা অনেকেই পড়িতে শিখিয়াছেন ; বাংলার ছাপাখানার সাহিত্য

তাঁহাদের হাতে পড়িয়াছে। এখন গ্রাম্য ছড়াগুলি বোধ করি সমাজের অনেক নীচের স্তরে নামিয়া গেছে।

ছড়াগুলির বিষয়কে মোটামুটি দুই ভাগ করা যায়। হরগৌরী-বিষয়ক এবং কৃষ্ণরাধা-বিষয়ক। হরগৌরী বিষয়ে বাঙালির ঘরের কথা এবং কৃষ্ণরাধা বিষয়ে বাঙালির ভাবের কথা ব্যক্ত করিতেছে। এক দিকে সামাজিক দাম্পত্যবন্ধন, আর-এক দিকে সমাজবন্ধনের অতীত প্রেম।

দাম্পত্যসম্বন্ধের মধ্যে একটা বিদ্র বিরাজ করিতেছে, দারিদ্র্য। সেই দারিদ্র্যশৈলটাকে বেঠন করিয়া হরগৌরীর কাহিনী নানা দিক হইতে তরঙ্গিত হইয়া উঠিতেছে। কখনো-বা শ্বশুর-শাশুড়ির স্নেহ সেই দারিদ্র্যকে আঘাত করিতেছে, কখনো-বা স্ত্রী-পুরুষের প্রেম সেই দারিদ্র্যের উপর আসিয়া প্রতিহত হইতেছে।

বাংলার কবিস্বদয় এই দারিদ্র্যকে মহত্ব এবং দেবত্ব মহোচ্চ করিয়া তুলিয়াছে। বৈবাগ্য এবং আত্মবিশ্বাসের দ্বারা দারিদ্র্যের হীনতা ঘুচাইয়া কবি তাহাকে ঐশ্বৰ্যের অপেক্ষা অনেক বড়ো করিয়া দেখাইয়াছেন। ভোলানাথ দারিদ্র্যকে অঙ্গের ভূষণ করিয়াছিলেন; দরিদ্রসমাজের পক্ষে এমন আনন্দময় আদর্শ আর কিছুই নাই। ‘আমার সম্বল নাই’ যে বলে সেই গরিব; ‘আমার আবশ্যক নাই’ যে বলিতে পারে তাহার অভাব কিসের? শিব তো তাহারই আদর্শ।

অন্য দেশের গায় ধনের সম্ভ্রম ভারতবর্ষে নাই, অন্তত পূর্বে ছিল না। যে বংশে বা গৃহে কুলশীলসম্মান আছে সে বংশে বা গৃহে ধন নাই এমন সম্ভাবনা আমাদের দেশে বিরল নহে। এইজন্য আমাদের দেশে ধনী ও নিধনের মধ্যে বিবাহের আদান-প্রদান সর্বদাই চলিয়া থাকে।

কিন্তু সামাজিক আদর্শ যেমনই হউক, ধনের একটা স্বাভাবিক মত্ততা আছে। ধনগৌরবে দরিদ্রের প্রতি ধনী কৃপাকটাক্ষপাত করিয়া থাকে। যেখানে

সামাজিক উচ্চনীচতা নাই সেখানে ধনের উচ্চনীচতা আসিয়া একটা বিপ্লব বাধাইয়া দেয়; এইরূপ অবস্থা দাম্পত্য-সম্বন্ধে একটা মন্ত বিপাকের কারণ। স্বভাবতই ধনী স্বত্ত্ব যখন দরিদ্র জামাতাকে অবজ্ঞা করে এবং ধনীকন্যা দরিদ্র পতি ও নিজের দুর্দৃষ্টের প্রতি বিরক্ত হইয়া উঠেন তখন গৃহধর্ম কম্পাঘিত হইয়া থাকে।

দাম্পত্যের এই দুর্বুগ্রহ কেমন করিয়া কমিয়া যায় হরগৌরীর কাহিনীতে তাহা কীৰ্তিত হইয়াছে। সতী স্ত্রীর অটল প্রদ্বা তাহার একটা উপাদান, তাহার আর-একটা উপাদান দারিদ্র্যের হীনতামোচন, মহৎ-কীর্তন। উমাপতি দরিদ্র হইলেও হয় নহেন, এবং শশানচারীর স্ত্রী পতিগৌরবে ইন্দ্রের ইন্দ্রাণী অপেক্ষা শ্রেষ্ঠ।

দাম্পত্যবন্ধনের আর-একটি মহৎ বিষয় স্বামীর বার্ধক্য ও কুরুপতা। হর-গৌরীর সম্বন্ধে তাহাও পরাভূত হইয়াছে। বিবাহসভায় বৃদ্ধ জামাতাকে দেখিয়া মেনকা যখন আক্ষেপ করিতেছেন তখন অলৌকিক প্রভাবে বৃদ্ধের রূপ-যৌবন বসনভূষণ প্রকাশিত হইয়া পড়িল। এই অলৌকিক রূপযৌবন প্রত্যেক বৃদ্ধ স্বামীরই আছে, তাহা তাহার স্ত্রীর আন্তরিক ভক্তি-প্ৰীতির উপর নির্ভর করে। গ্রামের ভিক্ষুক কথক গায়ক হরগৌরীর কথায় বারে বারে দ্বারে দ্বারে সেই ভক্তি উল্লেখ করিয়া বেড়ায়।

গ্রামের কবিপ্রতিভা এইখানেই ক্ষান্ত হয় নাই। শিবকে গাঁজা ভাঙ প্রভৃতি নেশায় উন্নত করিয়াছে। শুদ্ধ তাহাই নহে; অসভ্য কৌচকাগ্নিনীদের প্রতি তাঁহার আসক্তি প্রচার করিতে ছাড়ে নাই। কালিদাসের অমৃতরঙ্গ সমুদ্র ও নির্বাতনিকম্প দীপশিখাবৎ যোগীশ্বর বাংলার পল্লীতে আসিয়া এমনি দুর্গতি-প্রাপ্ত হইয়াছেন।

কিন্তু স্থূল কথা এই যে, হরগৌরীর কথা ছোটো-বড়ো সমস্ত বিশ্বের উপরে দাম্পত্যের বিজয়কাহিনী। হরগৌরীপ্রসঙ্গে আমাদের একান্ত-পারিবারিক

সমাজের মর্মরূপিণী রমণীর এক সজীব আদর্শে গঠিত হইয়াছে। স্বামী দীন দরিদ্র বৃদ্ধ বিরূপ যেমনই হউক, জ্ঞানী রূপধোবন-ভক্তিপ্রীতি-ক্ষমার্থ-তেজগর্বে সমুজ্জ্বল। জ্ঞানী দরিত্রের ধন, ভিত্তারির অল্পপূর্ণা, রিক্ত গৃহের সম্মানলক্ষ্মী।

হরগৌরীর গান যেমন সমাজের গান, রাধাকৃষ্ণের গান তেমনি সৌন্দর্যের গান। ইহার মধ্যে যে অধ্যাত্মতত্ত্ব আছে তাহা আমরা ছাড়িয়া দিতেছি। কারণ, তত্ত্ব যখন রূপকের ছদ্মবেশ ধারণ করিয়া সাধারণের দৃষ্টি আকর্ষণ করিতে চেষ্টা করে তখন তো সে আপন তত্ত্বরূপ গোপন করে। বাহ্যরূপেই সে সাধারণের হৃদয় আকর্ষণ করিয়া থাকে। রাধাকৃষ্ণের রূপকের মধ্যে এমন একটি পদার্থ আছে যাহা বাংলার বৈষ্ণব অবৈষ্ণব তত্ত্বজ্ঞানী ও মুঢ় সকলেরই পক্ষে উপাদেয়, এইজগ্গই তাহা ছড়ায় গানে যাত্রায় কথকতায় পরিব্যাপ্ত হইতে পারিয়াছে।

সৌন্দর্যসূত্রে নরনারীর প্রেমের আকর্ষণ সকল দেশের সাহিত্যেই প্রচারিত। কেবল সামাজিক কর্তব্যবন্ধনে ইহাকে সম্পূর্ণ কুলাইয়া পায় না। সমাজের বাহিরেও ইহার শাসন বিস্তৃত। পঞ্চশরের গতিবিধি সর্বত্রই, এবং বসন্ত অর্থাৎ জগতের ধোবন এবং সৌন্দর্য তাঁহার নিত্য-সহচর।

নরনারীর প্রেমের এই যে একটি মোহিনী শক্তি আছে, যে শক্তিবলে সে মুহূর্তের মধ্যে জগতের সমস্ত চন্দ্রসূর্যতারা পুষ্পকানন নন্দনদীকে এক সূত্রে টানিয়া মধুরভাবে উজ্জলভাবে আপনার চতুর্দিকে সাজাইয়া আনে, যে প্রেমের শক্তি আকস্মিক অনির্বচনীয় আবির্ভাবের দ্বারা এতদিনকার বিচ্ছিন্ন বিক্ষিপ্ত উপেক্ষিত বিশ্বজগৎকে চক্ষের পলকে সম্পূর্ণরূপে কৃতকৃতার্থ করিয়া তোলে— সেই শক্তিকে যুগে যুগে দেশে দেশে মহুগ্ধ অধ্যাত্মশক্তির রূপক বলিয়া অনুভব ও বর্ণনা করিয়াছে। তাহার প্রমাণ সলোমন, হাফেজ এবং বৈষ্ণব কবিদের পদাবলী। দুটি মহুগ্ধের প্রেমের মধ্যে এমন একটি বিরাট বিশ্বব্যাপকতা আছে যে আধ্যাত্মিক ভাবুকদের মনে হয়, সেই প্রেমের সম্পূর্ণ অর্থ সেই দুইটি মহুগ্ধের

মধ্যেই পর্যাপ্ত নহে; তাহা ইঙ্গিতে জগৎ ও জগদীশ্বরের মধ্যবর্তী অনন্তকালের সম্বন্ধ ও অপরিণীম ব্যাকুলতা জ্ঞাপন করিতেছে।

কাব্যের পক্ষে এমন সামগ্রী আর দ্বিতীয় নাই। ইহা একই কালে হৃদয় এবং বিরাট, অন্তরতম এবং বিশ্বগ্রাসী; লৌকিক এবং অনির্বচনীয়। যদিচ জীপুরুষের প্রকাশ্য মেলামেশা ও স্বাধীন বরণের অভাবে ভারতবর্ষীয় সমাজে এই প্রেম লাক্ষিত হইয়া গুপ্তভাবে বিরাজ করে, তথাপি ভারতবর্ষের কবিরা নানা ছলে নানা কৌশলে ইহাকে তাঁহাদের কাব্যে আবাহন করিয়া আনিয়াছেন। তাঁহারা প্রকাশ্যভাবে সমাজের অবমাননা না করিয়া কাব্যকে সমাজের বাহিরে স্থাপন করিয়াছেন। মালিনীনদীতীরে তপোবনে, সহকারসনাথ-বনজ্যোৎস্নাকুঞ্জে, নবযৌবনা শকুন্তলা সমাজ-কারাবাসী কবিহৃদয়ের কল্পনাস্বপ্ন। দুঃস্বস্ত-শকুন্তলার প্রেম সমাজের অতীত, এমন-কি, তাহা সমাজবিরোধী। পুরুষবার প্রেমোন্মত্ততা সমাজবন্ধন ছিন্ন বিচ্ছিন্ন করিয়া নদী-গিরি-বনের মধ্যে মদমত্ত বস্ত্র হস্তীর মতো উদ্দামভাবে পরিলম্বন করিয়াছে। মেঘদূত বিরহের কাব্য। বিরহাবস্থায় দৃঢ়বদ্ধ দাম্পত্যসূত্রে কিঞ্চিৎ ব্যবচ্ছেদ ঘটিয়া মানব যেন পুনশ্চ স্বতন্ত্রভাবে ভালোবাসিবার অবসর লাভ করে। জীপুরুষের মধ্যে সেই ব্যবধান পড়ে যেখানে হৃদয়ের প্রবল অভিযুগ্ম গতি আপনাকে স্বাধীনভাবে প্রবাহিত করিতে স্থান পায়। কুমারসম্ভবে কুমারী গৌরী যদি প্রচলিত সমাজনিয়মের বিরুদ্ধে শৈলতপোবনে একাকিনী মহাদেবের সেবা না করিতেন তবে তৃতীয় সর্গের শ্রায় এমন অভুলনীয় কাব্যের সৃষ্টি হইত কী করিয়া? এক দিকে বসন্তপুষ্পাভরণা শিরীষপেলবা বেপথুমতী উমা, অগ্নাদিকে যোগাসীন মহাদেবের অগাধস্তম্ভিত সমুদ্রবিশাল হৃদয়—লোকালয়ের নিয়মপ্রাচীরের মধ্যে বিশ্ববিজয়ী প্রেমের এমন স্ফোং মিলিত কোথায়?

যাহা হউক, মানবরচিত সমাজ আপনার মধ্যে আপনি সম্পূর্ণ পরিতৃপ্ত নয়। যে শক্তি সমাজকে সমাজের বাহিরের দিকে টানে সেই সৌন্দর্য সেই প্রেমের

শক্তিকে অন্তত মানসলোকে স্থাপন করিয়া কল্পনার দ্বারা উপভোগ না করিয়া মানুষ থাকিতে পারে না। পার্থিব সমাজে যদি-বা বাধা পায় তবে দ্বিগুণ তীব্রতার সহিত আধ্যাত্মিক ভাবের মধ্যে তাহাকে আয়ত্ত করিতে চেষ্টা করে। বৈষ্ণবের গান যে দেখিতে দেখিতে সমস্ত ভারতবর্ষ ছাইয়া ফেলিয়াছে ইহাই তাহার প্রধান কারণ। বৈষ্ণবের গান স্বাধীনতার গান। তাহা জাতি মানে না, কুল মানে না। অথচ এই উচ্ছ্বলতা সৌন্দর্যবন্ধনে হৃদয়বন্ধনে নিয়মিত। তাহা অন্ধ ইন্দ্রিয়ের উদ্ভাস্ত উন্নততা মাত্র নহে।

হরগৌরীকথায় দাম্পত্যবন্ধনে যেমন কতকগুলি বাধা বর্ণিত হইয়াছে, বৈষ্ণব গাথার প্রেমপ্রবাহেও তেমনি একমাত্র প্রবল বাধার উল্লেখ আছে, তাহা সমাজ। তাহা একাই এক সহস্র। বৈষ্ণব পদাবলীতে সেই সমাজ-বাধার চতুর্দিকে প্রেমের তরঙ্গ উচ্ছ্বসিত হইয়া উঠিতেছে। এমন-কি, বৈষ্ণব কাব্য-শাস্ত্রে পরকীয়া অমুরক্তির বিশেষ গৌরব বর্ণিত হইয়াছে। সে গৌরব সমাজ-নীতির হিসাবে নহে, সে কথা বলাই বাহুল্য। তাহা নিছক প্রেমের হিসাবে। ইহাতে যে আত্ম-বিশ্বাস, বিশ্ববিশ্বাস, নিন্দা ভয় লজ্জা শাসন সম্বন্ধে সম্পূর্ণ ঐক্যমীমাংসা, কঠিন কুলাচার লোকাচারের প্রতি অচেতনতা প্রকাশ পায় তদ্বারা প্রেমে প্রচণ্ড বল, দুর্বোধ রহস্য, তাহার বন্ধনবিহীনতা, সমাজ-সংসার স্থান-কাল-পাত্র এবং যুক্তিতর্ক কার্য-কারণের অতীত একটা বিরাট ভাব পরিস্ফুট হইয়া উঠে। এই কারণে যাহা বিশ্বসমাজে সর্বত্রই এক বাক্যে নিন্দিত সেই অভ্যুদয়ী কলঙ্কচূড়ার উপরে বৈষ্ণব কবিগণ তাঁহাদের বর্ণিত প্রেমকে স্থাপন করিয়া তাহার অভিষেকক্রিয়া সম্পন্ন করিয়াছেন। এই সর্বনাশী, সর্বভ্যাগী, সর্ববন্ধনচ্ছেদী প্রেমকে আধ্যাত্মিক অর্থে গ্রহণ করিতে না পারিলে কাব্য হিসাবে ক্ষতি হয় না, সমাজ-নীতি হিসাবে হইবার কথা।

এইরূপ প্রেমগানের প্রচার সাধারণ লোকের পক্ষে বিপজ্জনক এবং সমাজের পক্ষে অহিতকর মনে হইতে পারে। কিন্তু ফলত তাহা সম্পূর্ণ সত্য নহে।

মানবপ্রকৃতিকে সমাজ একেবারে উন্মূলিত করিতে পারে না। তাহা কাজে কথায় কল্পনায় আপনাকে নানাপ্রকারে ব্যক্ত করিয়া তোলে। তাহা এক দিক হইতে প্রতিহত হইয়া আর-এক দিক দিয়া প্রবাহিত হয়। মানবপ্রকৃতিকে অযথাপরিমাণে, এবং সম্পূর্ণভাবে রোধ করাতেই সমাজের বিপদ। সে অবস্থায় যখন সেই রুদ্ধ প্রকৃতি কোনো-একটা আকারে বাহির হইবার পথ পায় তখনই বরঞ্চ বিপদের কতকটা লাঘব হয়। আমাদের দেশে যখন বন্ধবিহীন প্রেমের সমাজবিহিত প্রকাশ স্থান কোথাও নাই, সদর দরজা যখন তাহার পক্ষে একেবারেই বন্ধ, অথচ তাহাকে শাস্ত্র চাপা দিয়া গোর দিলেও সে যখন ভূত হইয়া মধ্যাহ্নরাত্রে রুদ্ধদ্বারের ছিদ্রমধ্য দিয়া দ্বিগুণতর বলে লোকালয়ে পৰ্যটন করিয়া বেড়ায়, তখন বিশেষরূপে আমাদের সমাজেই সেই কুলমানগ্রাসী কলঙ্ক-অঙ্কিত প্রেম স্বাভাবিক নিয়মে গুপ্তভাবে স্থান পাইতে বাধ্য; বৈষ্ণব কবির। সেই বন্ধননাশী প্রেমের গভীর দুর্নিবার আবেগকে সৌন্দর্যক্ষেত্রে অধ্যাত্মলোকে বহমান করিয়া তাহাকে অনেক পরিমাণে সংসারপথ হইতে মানসপথে বিক্ষিপ্ত করিয়া দিয়াছেন, আমাদের সমাজের সেই চিরক্ষুধাতুর প্রেতটাকে পবিত্র গয়ায় পিণ্ডদান করিবার আয়োজন করিয়াছেন। তাহার। কামকে প্রেমে পরিণত করিবার জগ্নু ছন্দোবদ্ধ কল্পনার বিবিধ পরশপাথর প্রয়োগ করিয়াছেন। তাহাদের রচনার মধ্যে যে ইন্দ্রিয়বিকার কোথাও স্থান পায় নাই তাহা বলিতে পারি না। কিন্তু বৃহৎ স্রোতস্বিনী নদীতে যেমন অসংখ্য দূষিত ও মৃত পদার্থ প্রতিনিয়ত আপনাকে আপনি সংশোধন করে তেমনি সৌন্দর্য এবং ভাবের বেগে সেই-সমস্ত বিকার সহজেই শোধিত হইয়া চলিয়াছে। বরঞ্চ বিদ্যাসুন্দরের কবি সমাজের বিরুদ্ধে যথার্থ অপরাধী। সমাজের প্রাসাদের নীচে তিনি হাসিয়া হাসিয়া স্বরঙ্গ খনন করিয়াছেন। সে স্বরঙ্গ-মধ্যে পুত্নসুখলোক এবং উন্মুক্ত বায়ুর প্রবেশপথ নাই। তথাপি এই বিদ্যাসুন্দর কাব্যের এবং বিদ্যাসুন্দর যাত্রার এত আদর আমাদের দেশে কেন? উহা অত্যাচারী কঠিন সমাজের প্রতি

মানবপ্রকৃতির স্থনিপুণ পরিহাস। বৈষ্ণব কবি যে জিনিগটাকে ভাবের ছায়াপথে স্থন্দররূপে অঙ্কিত করিয়াছেন ইনি সেইটাকে সমাজের পিঠের উপরে দাগার মতো ছাপিয়া দিয়াছেন ; যে দেখিতেছে সেই কোতুক অনুভব করিতেছে।

যাহা হউক, মোটের উপর হরগৌরী এবং কৃষ্ণরাধাকে লইয়া আমাদের গ্রাম্যসাহিত্য রচিত। তাহার মধ্যে হরগৌরীর কথা আমাদের ঘরের কথা। সেই হরগৌরীর কথায় আমাদের বাংলাদেশের একটা বড়ো মর্মের কথা আছে। কন্তা আমাদের গৃহের এক মস্ত ভার ; কন্তাদায়ের মতো দায় নাই। কন্তা-পিতৃৎ থলু নাম কষ্টম্। সমাজের অমুশাসনে নির্দিষ্ট বয়স এবং সংকীর্ণ মণ্ডলীর মধ্যে কন্তার বিবাহ দিতে আমরা বাধ্য। স্ততরাং সেই কৃত্রিম তাড়নাবশতই বরের দর অত্যন্ত বাড়িয়া যায়, তাহার রূপগুণ অর্থসামর্থ্য আর তত প্রয়োজন থাকে না। কন্তাকে অযোগ্য পায়ে সমর্পণ করা, ইহা আমাদের সমাজে নিত্য-নৈমিত্তিক দুর্ঘটনা। ইহা লইয়া দুশ্চিন্তা, অমুতাপ, অশ্রুপাত, জামাতৃপরিবারের সহিত বিরোধ, পিতৃকুল ও পতিকুলের মধ্যবর্তিনী বালিকার নিষ্ঠুর মর্মবেদনা, সর্বদাই ঘরে ঘরে উদ্ভূত হইয়া থাকে। একান্নপরিবারে আমরা দু'ও নিকট, এমন-কি, নামমাত্র আত্মীয়কেও বাধিয়া রাখিতে চাই; কেবল কন্তাকেই ফেলিয়া দিতে হয়। যে সমাজে স্বামী-স্ত্রী ব্যতীত পুত্রকন্তা প্রভৃতি সকলেই বিচ্ছিন্ন হইয়া যায় তাহারা আমাদের এই দুঃসহ বেদনা কল্পনা করিতে পারিবে না। আমাদের মিলনধর্মী পরিবারে এই একমাত্র বিচ্ছেদ। স্ততরাং ঘুরিয়া ফিরিয়া সর্বদাই সেই ক্ষতবেদনায় হাত পড়ে। হরগৌরীর কথা বাংলার একান্ন-পরিবারের সেই প্রধান বেদনার কথা। শরৎসপ্তমীর দিনে সমস্ত বঙ্গভূমির ভিখারি-বধু কন্তা মাতৃগৃহে আগমন করে, এবং বিজয়ার দিনে সেই ভিখারি-ঘরের অন্তর্পূর্ণা যখন স্বামীগৃহে ফিরিয়া যায় তখন সমস্ত বাংলাদেশের চোখে জল ভরিয়া আসে।

এই-সকল কারণে হরগৌরীসম্বন্ধীয় গ্রাম্যছড়াগুলি বাস্তব ভাবের। তাহা

রচয়িতা ও শ্রোতৃবর্গের একান্ত নিজের কথা। সেই-সকল কাব্যে জামাতার নিন্দা, জীপুরুষের কলহ ও গৃহস্থালীর বর্ণনা যাহা আছে তাহাতে রাজভাব বা দেবভাব কিছুই নাই; তাহাতে বাংলাদেশের গ্রাম্য কুটিরের প্রাত্যহিক দৈন্ত ও ক্ষুদ্রতা সমস্তই প্রতিবিম্বিত। তাহাতে কৈলাস ও হিমালয় আমাদের পানাপুকুরের ঘাটের সম্মুখে প্রতিষ্ঠিত হইয়াছে, এবং তাহাদের শিখররাজি আমাদের আম-বাগানের মাথা ছাড়াইয়া উঠিতে পারে নাই। যদি তাঁহারা নিজ নিজ অভভেদী মূর্তি ধারণ করিবার চেষ্টামাত্র করিতেন তাহা হইলে বাংলার গ্রামের মধ্যে তাঁহাদের স্থান হইত না।

শরৎকালে রানী বলে বিনয়বচন—

আর শুনেছ গিরিরাজ নিশার স্বপন ?

এই স্বপ্ন হইতে কথা আরম্ভ। সমস্ত আগমনী গানের এই ভূমিকা। প্রতি বৎসর শরৎকালে ভোরের বাতাস যখন শিশিরসিক্ত এবং রৌদ্রের রঙ কাঁচা সোনার মতো হইয়া আসে, তখন গিরিরানী সহসা একদিন তাঁহার ঋশানবাসিনী সোনার গৌরীকে স্বপ্ন দেখেন, আর বলেন—

আর শুনেছ গিরিরাজ নিশার স্বপন ?

এ স্বপ্ন গিরিরাজ আমাদের পিতামহ এবং প্রপিতামহদের সময় হইতে ললিত বিভাস এবং রামকেলি রাগিণীতে শুনিয়া আসিতেছেন, কিন্তু প্রত্যেক বৎসরই তিনি নূতন করিয়া শোনে। ইতিবৃত্তের কোন্ বৎসরে জানি না, হরগৌরীর বিবাহের পরে প্রথম যে শরতে মেনকারানী স্বপ্ন দেখিয়া প্রত্যুষে জাগিয়া উঠিয়াছিলেন সেই প্রথম শরৎ সেই তাহার প্রথম স্বপ্ন লইয়াই বর্ষে বর্ষে ফিরিয়া ফিরিয়া আসে। জলে স্থলে আকাশে একটি বৃহৎ বেদনা বাজিয়া উঠে, যাহাকে পরের হাতে দিয়াছি আমার সেই আপনার ধন কোথায়।

বৎসর গত হয়েছে কত, করছে শিবের ঘর।

যাও গিরিরাজ, আনতে গৌরী কৈলাসশিখর ॥

বলা বাহুল্য, গিরিরাজ নিতান্ত লঘু লোকটা নহেন। চলিতে ফিরিতে, এমন-কি, শোক দুঃখ চিন্তা অশ্রুভব করিতে তাঁহার স্বভাবতই কিঞ্চিৎ বিলম্ব ঘটয়া থাকে। তাঁহার সেই সর্বাঙ্গীণ জড়তা ও ঔদাসীন্যের জগৎ একবার গৃহিণীর নিকট গোটা-কয়েক তীব্র তিরস্কার-বাক্য শুনিয়া তবে তিনি অক্লুশাহত হস্তীর ত্রায় গাত্রোত্থান করিলেন।

শুনে কথা গিরিরাজ লজ্জায় কাতর
পঞ্চমীতে যাত্রা করে শাস্ত্রের বিচার।
তা শুনি মেনকারানী শীঘ্রগতি ধরি
থাজা মণ্ডা মনোহর। দিলেন ভাণ্ড ভরি ॥
মিশ্রিসাঁচ চিনির ফেনি ক্ষীর তন্ত্রি সয়ে
চিনির ফেনা এলাচদানা মুক্তা থরে থরে।
ভাঙের লাডু সিদ্ধি ব'লে পঞ্চমুখে দিলেন।
ভাণ্ড ভরি গিরিরাজ তখনি সে নিলেন ॥

কিন্তু দৌত্যকার্ধে যেরূপ নিপুণতা থাকা আবশ্যক হিমালয়ের নিকট তাহা প্রত্যাশা করা যায় না। কৈলাসে কন্টার সহিত অনর্থক বচসা করিয়া তাঁহার বিপুল শুল প্রকৃতির পরিচয় দিলেন। দোষের মধ্যে অভিমানিনী তাঁকে বলিয়াছিলেন—

কহ বাবা নিশ্চয়, আর কব পাছে—
সত্য করি বলো আমার মা কেমন আছে।
তুমি নিষ্ঠুর হয়ে কুঠুর মনে পাসরিলা কি,
শিবনিন্দা করছ কত তার বলব কী ॥

সত্য দোষারোপে ভালোমত উত্তর জোগায় না বলিয়া রাগ বেশি হয়। গিরিরাজ স্বেযোগ পাইলে শিবনিন্দা করিতে ছাড়েন না; এ কথার প্রতিবাদ করিতে না পারিয়া রুষ্ট হইয়া বলিয়া উঠিলেন—

মা, তুমি বল নিষ্ঠুর কুষ্ঠুর, শম্ভু বলেন শিলা ।
 ছার মেনকার বুদ্ধি শুনে তোমায় নিতে এলাম ॥
 তখন শুনে কথা জগৎমাতা কাঁদিয়া অস্থির ।
 পাড়া মেঘের বৃষ্টি ঘেন প'ল এক রীত ॥
 নয়নজলে ভেসে চলে, আকুল হল নন্দী—
 কৈলাসেতে মিলল ঝরা, হল একটি নদী ॥
 কেঁদো না মা, কেঁদো না মা, ত্রিপুরসুন্দরী ।
 কাল তোমাকে নিয়ে যাব পাষণের পুরী ॥
 সন্দেহ দিয়েছিলেন মেনকারানী, দিলেন দুর্গার হাতে ।
 তুষ্ট হয়ে নারায়ণী ক্ষান্ত পেলেন তাতে ॥
 উমা কন শুন বাবা, বোসো পুনর্বীর ।
 জলপান করিতে দিলেন নানা উপহার ॥
 যত্ন করি মহেশ্বরী রান্না করিলা ।
 খশুর জামাতা দৌঁছে ভোজন করিলা ॥

ছড়া যাহাদের জন্ম রচিত তাহারা যদি আজ পর্যন্ত ইহার ছন্দোবদ্ধ ও মিলের বিরুদ্ধে কোনো আপত্তি না করিয়া থাকে তবে আমাদের বলিবার কোনো কথাই নাই ; কিন্তু জামাতৃগৃহে সমাগত পিতার সহিত কন্যার মান-অভিমান ও তাহার শাস্তি ও পরে আহার-অভ্যর্থনা এই গৃহচিত্র যেন প্রত্যক্ষের মতো দেখা যাইতেছে । নন্দীটা এক পাশে দাঁড়াইয়া ছিল, সে মাঝে হইতে আকুল হইয়া গেল । খশুর জামাতা ভোজনে বসিয়াছেন এবং গৌরী স্বহস্তে রন্ধন করিয়া উভয়কে পরিবেশন করিতেছেন, এ চিত্র মনে গাঁথা হইয়া রহিল ।

শয়নকালে দুর্গা বলে আজ্ঞা দেহ স্বামী ।
 ইচ্ছা হয় যে বাপের বাড়ি কাল যাইব আমি ॥

শুন গোঁরী, কৈলাসপুরী তুচ্ছ তোমার ঠাই।

দেখছি তোমার কাঙাল পিতার ঘর-দরজা নাই।

শেষ দুইটি ছত্র বৃত্তিতে একটু গোল হয়। ইহার অর্থ এই যে, তোমার বাসের পক্ষে কৈলাসপুরীই তুচ্ছ, এমন স্থলে তোমার কাঙাল পিতা তোমাকে স্থান দিতে পারেন এমন সাধ্য তাঁহার কী আছে !

পতিকে লইয়া পিতার সহিত বিরোধ করিতে হয়, আবার পিতাকে লইয়া পতির সহিত বিবাদ বাধিয়া উঠে— উমার এমন অবস্থা।

গোঁরী কন, আমি কইলে মিছে দন্দেজ হবে।

সেই-যে আমার কাঙাল পিতা ভিক্ষা মাঙছেন কবে ॥

তার। রাজার বেটা, দালান-কোঠা অট্টালিকাময়।

যাগযজ্ঞ করছে কত, শ্মশানবাসী নয় ॥

তার। নানা দানপুণ্যবান দেবকার্য করে।

এক দফাতে কাঙাল বটে, ভাঙ নাই তার ঘরে ॥

কিন্তু কড়া জবাব দিয়া কার্যোদ্ধার হয় না। বরং তর্কে পরাস্ত হইলে গায়ের জোর আরো বাড়িয়া উঠে। সেই বৃত্তিয়া দুর্গা তখন—

গুটি পাঁচ-ছয় সিদ্ধির লাডু যত্ন ক'রে দিলেন।

দাম্পত্যযুদ্ধে এই ছয়টি সিদ্ধির লাডু কামানের ছয়টা গোলায় মতো কাজ করিল ; ভোলানাথ এক দমে পরাভূত হইয়া গেলেন। সহসা পিতা কন্যা ও জামাতার ঘনিষ্ঠ মিলন হইয়া গেল। বাক্যহীন নন্দী সকৌতুক ভক্তিভরে দ্বারপাশে দাঁড়াইয়া মনে মনে হাসিতে লাগিল।

সম্মুখে সম্ভাষণ করি বসলেন তিন জন।

দুর্গা, মর্তে যেয়ে কী আনিবে আমার কারণ ॥

প্রতিবারে কেবলমাত্র বিষপত্র পাই।

দেবী বললেন, প্রভু ছাড়া কোন দ্রব্য থাই ॥

সিঁদুর-ফোটা অলকছটা মুক্তা গাঁথা কেশে ।
 সোনার বাঁপা কনকচাঁপা শিব ভুলেছেন যে বেশে ।
 রত্নহার গলে তার ঢুলছে সোনার পাটা ।
 চাঁদনি রাত্রিতে যেন বিদ্যুৎ দিচ্ছে ছটা ॥
 তাড় কঙ্কণ সোন পৈছি শঙ্খ বাহুমূলে ।
 বাক-পর্য মল সোনার নুপুর, আঁচল হেলে দোলে ॥
 সিংহাসন, পট্টবসন পরছে ভগবতী ।
 কার্তিক গণেশ চললেন লক্ষ্মী সরস্বতী ॥
 জয়া বিজয়া দাসী চললেন দুই জন ।
 গুপ্তভাবে চললেন শেষে দেব পঞ্চানন ॥
 গিরিসঙ্গে পরম রঙ্গে চললেন পরম সুখে ।
 ষষ্ঠী তিথিৎ উপনীত হলেন মর্তলোকে ॥
 সারি সারি ঘট বারি আর গজাজল ।
 সাবধানে নিজ মনে গাচ্ছেন মঙ্গল ॥

তখন—

গিরিরানী কন বাণী চুমো দিয়ে মুখে,
 কণ্ড তারিণী, জামাই-ঘরে ছিলে কেমন সুখে ॥

এই ছড়াটি এইখানে শেষ হইল— ইহার বেশি আর বলিবার কথা নাই।
 এ দিকে বিদায়ের কাল সমাগত। কন্যাকে লইয়া শশুরঘরের সহিত বাপের
 ঘরের একটু ঈর্ষার ভাব থাকে। বেশিদিন বধূকে বাপের বাড়িতে রাখা
 শশুরপক্ষের মনঃপূত নহে। বহুকাল পরে মাতায় কন্যায় যথেষ্ট পরিতৃপ্তিপূর্বক
 মিলন হইতে-না-হইতেই শশুরবাড়ি হইতে তাগিদ আসে, ধরা বসিয়া যায়।
 জীবচ্ছেদবিধুর স্বামীর অর্ধেক তাহার কারণ নহে। হাজার হউক বধূ পরের
 ঘর হইতে আসে; শশুরঘরের সহিত তাহার সম্পূর্ণ জোড় লাগা বিশেষ

চেষ্ঠার কাজ। সেখানকার নূতন কর্তব্য অভ্যাস ও পরিচয়-বন্ধন হইতে বিচ্ছিন্ন করিয়া তাহার বাল্যকালের স্বাভাবিক আশ্রয়স্থলে ঘন ঘন যাতায়াত বা দীর্ঘকাল অবস্থিতি করিতে দিলে জোড় লাগিবার বাধাত করে। বিশেষত বাপের বাড়িতে বিবাহিতা কন্যার কেবলই কর্তব্যাহীন আদর, শ্বশুরবাড়িতে তাহার কর্তব্যের শাসন, এমন অবস্থায় দীর্ঘকাল বাপের বাড়ির আবহাওয়া শ্বশুরবর্গ বধূর পক্ষে প্রার্থনীয় জ্ঞান করেন না। এই-সকল নানা কারণে পিতৃগৃহে কন্যার গতিবিধি সম্বন্ধে শ্বশুরপক্ষীয়ের বিধান কিছু কঠোর হইয়াই থাকে। কন্যাপিতৃদ্বয়ের সেও একটা কষ্ট। বিজয়ার দিন বাংলাদেশের শ্বশুর-বাড়ির সেই কড়া তাগিদ লইয়া শিব মেনকার দ্বারে আসিয়া উপস্থিত। মাতৃ-স্নেহের স্বাভাবিক অধিকার সমাজ-শাসনের বিরুদ্ধে বুথা আছাড় খাইয়া মরিতে লাগিল।

নাহি আজ গিরিরাজ, শিবকে বলো যেয়ে।

অমনি ভাবে ফিরে যাক সে, থাকবে আমার মেয়ে ॥

তখন, শ্বশুরবাড়িতে দুর্গার যত-কিছু হুঃখ আছে সমস্ত মাতার মনে পড়িতে লাগিল। শিবের ভাণ্ডারে যত অভাব, আচরণে যত ক্রটি, চরিত্রে যত দোষ, সমস্ত তাঁহার নিকট জাজ্ঞ্যমান হইয়া উঠিল। অপাত্রে কন্যাদান করিয়াছেন, এখন সেটা যতটা পারেন সংশোধন করিবার ইচ্ছা, যতটা সম্ভব গৌরীকে মাতৃক্রোড়ে ফিরাইয়া লইবার চেষ্টা। শ্বশুরগৃহের আচারবিচার অনেক সময় দূর হইতে পিতৃ-গৃহের নিকট অযথা বলিয়া মনে হয় এবং পিতৃপক্ষীয়ের স্নেহের আক্ষেপে কন্যার সমক্ষেই তাহার কঠোর সমালোচনা করিয়া থাকেন। মেনকা তাহাই শুরু করিলেন, এবং শিব সেই অগ্নায় আচরণে ক্ষিপ্ত হইয়া শ্বশুরবাড়ির অন্তঃশাসন সত্তেজে প্রচার করিয়া দিলেন—

মর্তে আসি পূর্বকথা তুলছ দেখি মনে।

বারে বারে নিষেধ তোমায় করছি এ কারণে ॥

মায়ের কোলে মস্ত হয়ে ভুলছ দেখি স্বামী ।
 তোমার পিতা কেমন রাজা তাই দেখব আমি ॥
 শুনে কথা গিরিরাজা উন্মায়ুত হল ।
 জয়-জোগাড়ে অভয়াগে যাত্রা করে দিল ॥
 যে নিবে সে ক'তে পারে, নইলে এমন শক্তি কার ।
 যাও তারিণী হরের ঘরে, এসো পুনর্বীর ॥

অনুগ্রহের সংকীর্ণ মেয়াদ উত্তীর্ণ হইল, কন্তা পতিগৃহে ফিরিয়া গেল ।

এক্ষণে যে ছড়ার আলোচনায় প্রবৃত্ত হইতেছি তাহাতে দেবদেবীর একটি গোপন ঘরের কথা বর্ণিত আছে—

শিবসঙ্গে রসরঙ্গে বসিয়ে ভবানী ।
 কুতূহলে উমা বলেন ত্রিশূলশূলপাণি,
 তুমি প্রভু তুমি প্রভু ত্রৈলোক্যের সার—
 ইন্দ্র চন্দ্র কুবের বরুণ তোমারি কিংকর ॥
 তোমার নারী হয়ে আমার সাধ নাহি পোরে ।
 যেন বেণী পতির কপালে প'ড়ে রমণী ঝোরে ॥
 দিব্য সোনার অলংকার না পরিলাম গায় ।
 শামের বরন দুই শঙ্খ পরতে সাধ যায় ॥
 দেবের কাছে মরি লাঞ্জে হাত বাঁড়াতে নারি ।
 বারেক মোরে দাও শঙ্খ তোমার ঘরে পরি ॥

ভোলানাথ ভাবিলেন, একটা কৌতুক করা যাক । প্রথমেই একটু কৌন্দল বাধাইয়া তুলিলেন—

ভেবে ভোলা হেসে কন শুন হে পার্বতী,
 আমি তো কড়ার ভিথারি ত্রিপুরারি শঙ্খ পাব কথি ॥
 হাতের শিঙাটা বেচলা পরে হবে না

একথানা শঙ্খের কড়ি,
বলদটা মূল করিলে হবে কাহনটেক কড়ি ।
এটি ওটি ঠাক ঠিকাটি চাও হে গৌরী,
ধাকলে দিতে পারি ।

তোমার পিতা আছে বটে অর্থের অধিকারী ।
সে কি দিতে পারে না দুয়টো শঙ্খের মুজুরি ॥

এই-যে ধনহীনতার ভড়ং এটা মহাদেবের নিতাস্ত বাড়াবাড়ি, জীজ্ঞাতির নিকট ইহা স্বভাবতই অসম্ভব । স্ত্রী যখন ব্রেসলেট প্রার্থনা করে কেরানিবাবু তখন আয়ব্যয়ের হুদীর্ঘ হিসাব বিশ্লেষণ করিয়া আপন দারিদ্র্য প্রমাণ করিতে বসিলে কোন্ ধর্মপত্নী তাহা অবিচলিত রসনায় সহ্য করিতে পারে ? বিশেষত শিবের দারিদ্র্য ওটা নিতাস্তই পোশাকি দারিদ্র্য ; তাহা কেবল ইন্দ্র চন্দ্র বরুণ সকলের উপরে টেক্কা দিবার জন্ত, কেবল লক্ষ্মীর জননী অন্নপূর্ণার সহিত একটা অপরূপ কৌতুক করিবার অভিপ্রায়ে । কালিদাস শংকরের অট্টহাস্তকে কৈলাসশিখরের ভীষণ তুহিনপুঞ্জের সহিত তুলনা করিয়াছেন ; মহেশ্বরের শুভ্রদারিদ্র্যও তাঁহার এক নিঃশব্দ অট্টহাস্ত । কিন্তু দেবতার পক্ষেও কৌতুকের একটা সীমা আছে । মহাদেবী এ সম্বন্ধে নিজের মনের ভাব যেক্রমে ব্যক্ত করিলেন তাহা অত্যন্ত স্পষ্ট । তাহাতে কোনো কথাই ইঙ্গিতের অপেক্ষায় রহিল না ।

গৌরী গর্জিয়ে কন, ঠাকুর শিবাই
আমি গৌরী তোমার হাতে শঙ্খ পরতে চাই ।
আপনি যেমন যুব-যুবতী অমনি যুবক পতি হয়
তবে সে বৈরস রস নইলে কিছুই নয় ॥
আপনি বুড়ো আধবয়সী ভাঙধুতুরায় মত্ত ।
আপনার মতো পরকে বলে মন্দ ॥

এইখানে শেষ হয় নাই—ইহার পরে দেবী মনের কোণে আরো দুই-চারিটি
যে কথা বলিয়াছেন তাহা মহাদেবের ব্যক্তিগত চরিত্র সম্বন্ধে ; তাহা সাধারণো
প্রকাশযোগ্য নহে । সুতরাং আমরা উদ্ভূত করিতে ক্ষান্ত হইলাম । ব্যাপারটা
কেবল এইখানেই শেষ হইল না ; দ্বীর রাগ যতদূর পর্যন্ত যাইতে পারে, অর্থাৎ
বাপের বাড়ি পর্যন্ত, তাহা গেল ।

কোলে করি কার্তিক হাঁটায় লম্বোদরে

ক্রোধ করি হরের গৌরী গেলা বাপের ঘরে ॥

এ দিকে শিব তাঁহার সংকল্পিত দাম্পত্যপ্রহসনের নেপথ্যবিধান শুরু করিলেন ।

বিশ্বকর্মা এনে করান শঙ্খের গঠন ।

শঙ্খ লইয়া শাঁখারি সাজিয়া বাহির হইলেন—

দুই বাহু শঙ্খ নিলেন নাম স্ত্রীরাম লক্ষ্মণ ।

কপটভাবে হিমালয়ে তলাসে ফেরেন ॥

হাতে শূলী কাঁখে থলি শঙ্খ ফেরে গলি গলি ।

শঙ্খ নির্বি শঙ্খ নির্বি এই কথাটি ব'লে ॥

সঙ্গীলঙ্গে বসে গৌরী আছে কুতূহলে ।

শঙ্খ দেখি শঙ্খ দেখি এই কথাটি বলে ॥

গৌরীকে দেখায়ে শাঁখারি শঙ্খ বার ক'ল ॥

শঙ্খের উপরে যেন চন্দ্র উদয় হল ॥

মনি-মুকুতা-প্রবাল-গাঁথা মাণিক্যের ব্যুরি ।

নব ঝলকে ঝলকে যেন ইন্দ্রের বিজুলি ॥

দেবী খুশি হইয়া জিজ্ঞাসা করিলেন—

শাঁখারি ভালো এনেছ শঙ্খ ।

শঙ্খের কত নিবে তব ॥

দেবীর লুপ্তভাব দেখিয়া চতুর শাঁথারি প্রথমে দর-দামের কথা কিছুই আলোচনা করিল না ; কহিল—

গৌরী, ব্রহ্মলোক, বৈকুণ্ঠ, হরের কৈলাস, এ তো সবাই কয় ।

বুঝে দিলেই হয় ।

হস্ত ধুয়ে পরো শঙ্খ, দেয়ি উচিত নয় ।

শাঁথারি মুখে মুখে হরের স্থাবর সম্পত্তির যেরূপ ফর্দ দিল তাহাতে শাঁথাজোড়া যে বিশেষ সন্তায় বাইবে মহাদেবীর এমন মনে করা উচিত ছিল না ।

গৌরী আর মহাদেবে কথা হল দড় ।

সকল সখি বলে দুর্গা শঙ্খ চেয়ে পরো ।

কেউ দিলেন তেল গামছা কেউ জলের বাটি ।

দেবের উরুতে হস্ত থুয়ে বসলেন পার্বতী ॥

দয়াল শিব বলেন, শঙ্খ আমার কথাটি ধরো ।

দুর্গার হাতে গিয়ে শঙ্খ বজ্র হয়ে থাকো ॥

শিলে নাহি ভেঙে শঙ্খ থড়ে নাহি ভাঙে ।

দুর্গার সহিত করেন বাক্যের তরঙ্গ ॥

এ কথা শুনিয়া মাতা মনে মনে হাসে ।

শঙ্খ পরান জগৎপিতা মনের হরষে ॥

শাঁথারি ভালো দিলে শঙ্খ মানায়ে ।

ভাণ্ডার ভেঙে দেইগে তরু লগ্নে গনিয়ে ॥

এতক্ষণে শাঁথারি সময় বুঝিয়া কহিল—

আমি যদি তোমার শঙ্খের লব তরু

জ্যেষ্ঠাত-মাঝারে মোর রহিবে কলঙ্ক ॥

ইহার। যে বংশের শাঁথারি তাঁহাদের কুলাচার স্বতন্ত্র ; তাঁহাদের বিষয়বুদ্ধি কিছুমাত্র নাই ; টাকাকড়ি সম্বন্ধে বড়ো নিম্পৃহ ; ইহার। যাহাকে শাঁথা পরান

তঁাহাকে পাইলেই মূল্যের আর কোনো প্রকার দাবি রাখেন না ! ব্যবসায়টি অতি উত্তম ।

কেমন কথা কও শাঁথারি কেমন কথা কও ।

মানুষ বুঝিয়া শাঁথারি এসব কথা কও ॥

শাঁথারি কহিল—

না করো বড়াই দুর্গা না করো বড়াই ।

সকল তত্ত্ব জানি আমি এই বালকের ঠাই ॥

তোমার পতি ভাঙড় শিব তা তো আমি জানি ।

নিতি নিতি প্রতি ঘরে ভিক্ষা মাগেন তিনি ।

ভগ্নমাথা তায় ভুজঙ্গ মাথে অঙ্গে ।

নিরবধি ফেরেন তিনি ভূত-পেরেতের সঙ্গে ।

ইহাকেই বলে শোধ তোলা । নিজের সম্বন্ধে যে-সকল স্পষ্ট ভাষা মহাদেব সহধর্মিণীর মুখ হইতে মধ্যে মধ্যে শুনিয়া আসিয়াছেন; অল্প স্বযোগমত সেই সত্য কথাগুলিই গৌরীর কানে তুলিলেন ।

এই কথা শুনি মায়ের রোদন বিপরীত ।

বাহির করতে চান শঙ্খ না হয় বাহির ॥

পাষণ আনিল চণ্ডী শঙ্খ না ভাঙিল ।

শঙ্খেতে ঠেকিয়া পাষণ খণ্ড খণ্ড হল ॥

কোনোরূপে শঙ্খ যখন না হয় কর্তন ।

খড়গ দিয়ে হাত কাটিতে দেবীর গেল মন ॥

হস্ত কাটিলে শঙ্খে ভরিবে ঋধিরে ।

ঋধির লাগিলে শঙ্খ নাহি লব ফিরে ॥

মেনকা গো মা,

কী কৃষ্ণে বাড়াছিলাম পা ॥

মরিব মরিব মা গো হব আত্মঘাতী ।

আপনার গলে দিব নরসিংহ কাতি ॥

অবশেষে অল্প উপায় না দেখিয়া দুর্গা ধূপ দীপ নৈবেদ্য লইয়া ধ্যানে বসিলেন—

ধ্যানে পেলেন মহাদেবের চরণ-দুখান ।

তখন ব্যাপারটা বুঝা গেল ; দেবতার কোঁতকের পরিসমাপ্তি হইল ।

কোথা বা কল্যা, কোথা বা জামাতা ।

সকলেই দেখি যেন আপন দেবতা ॥

এ যেন ঠিক স্বপ্নের মতো হইল । নিমেষের মধ্যে—

দুর্গা গেলেন কৈলাসে, শিব গেলেন আশানে ।

ভাঙ ধুতুরা বেঁটে দুর্গা বসলেন আসনে ।

সন্ধ্যা হলে দুই জনে হলেন একখানে ॥

এইখানে চতুর্থ ছত্রের অপেক্ষা না রাখিয়াই ছড়া শেষ হইয়া গেল ।

রাধাকৃষ্ণ-সম্বন্ধীয় ছড়াগুলির জাতি স্বতন্ত্র । সেখানে বাস্তবিকতার কোঠা পার হইয়া মানসিকতার মধ্যে উদ্ভীর্ণ হইতে হয় । প্রাত্যহিক ঘটনা, সাংসারিক ব্যাপার, সামাজিক রহস্য সেখানে স্থান পায় না । সেই অপরূপ রাখালের রাজ্য বাঙালি ছড়া-রচয়িতা ও শ্রোতাদের মানসরাজ্য ।

স্থানে স্থানে ফেরেন রাখাল, সঙ্গে কেহ নাই ।

ভাণ্ডীবনে দেখে চরান সুরল কানাই ॥

সুরল বলিছে শুন ভাই রে কানাই ।

আজি তোরে ভাণ্ডীবনবিহারী সাজাই ॥

এই সাজাইবার প্রস্তাব মাত্র শুনিয়া নিকুঞ্জে যেখানে ষত ফুল ছিল সকলেই আগ্রহে ব্যাকুল হইয়া উঠিল—

কদম্বের পুষ্প বলেন সস্তা-বিগ্ধমানে
 সাজিয়া তুলিব আজি গোবিন্দের কানে ।
 করবীর পুষ্প বলেন, আমার মর্ম কে বা জানে—
 আজ আমায় রাখবেন হরি চুড়ার সাজনে ॥
 অলক-ফুলের কনক দ্বাম বেলফুলের গাঁথনি—
 আমার হৃদয়ে শ্রাম তুলাবে চুড়ামণি ।
 আনন্দেতে পদ্ম বলেন, তোমরা নানা ফুল
 আমায় দেখলে হবে চিত্ত ব্যাকুল ।
 চরণতলে থাকি আমি কমল পদ্ম নাম
 রাধাকৃষ্ণে একাসনে হেরিব বয়ান ॥

কোনো ফুলকেই নিরাশ হইতে হইল না ; সেদিন তাহাদের ফুটিয়া ওঠা সার্থক হইল—

ফুলেরই উড়ানি ফুলেরই জামাজুরি
 স্বেদল সাজাইলি ভালো ।
 ফুলেরই পাগ ফুলেরই পোশাক
 সেজেছে বিহারীলাল ।
 নানা আভরণ ফুলেরই ভূষণ
 চুড়াতে করবী ফুল ।
 কপালে কিরীটি অতি পরিপাটি
 পড়েছে চাঁচর চুল ।

এ দিকে কৌতুহলী ভ্রমর-ভ্রমরী ময়ূর-ময়ূরী খঞ্জন-খঞ্জরীর মেল। বসিয়া গেল। যে-সকল পাখির কণ্ঠ আছে তাহারা স্বেদনের কলানৈপুণ্যের প্রশংসা করিতে লাগিল। কোকিল সঙ্গীক আসিয়া বলিয়া গেল ‘কিংকিণী কিরীটি অতি পরিপাটি’—

ডাঙ্ক ডাঙ্কী টিয়া টুয়া পাখি

ঝংকারে উড়িয়া যায়।

তাহারা ঝংকার করিয়া কী কথা বলিল?

সুবল রাখাল সাজায়েছে ভালো

বিনোদবিহারীরায়।

এ দিকে চাতক-চাতকী শ্রামকে মেঘ ভ্রম করিয়া উড়িয়া উড়িয়া ঘুরিয়া ঘুরিয়া
'জল দে' 'জল দে' বলিয়া ডাকিয়া বেড়াইতে লাগিল। বনের মধ্যে শাখায়
পল্লবে বাতাসে আকাশে ভারি একটা রব পড়িয়া গেল।

কানাই বলিছে প্রাণের ভাই রে সুবল

কেমনে সাজালে ভাই বল দেখি বল।

কানাই জানেন তাঁহার সাজ সম্পূর্ণ হয় নাই। কোকিল-কোকিলা আর
ডাঙ্ক-ডাঙ্কীরা যাহাই বলুক-না কেন, সুবলের রুচি এবং নৈপুণ্যের প্রশংসা
করিবার সময় হয় নাই।

নানা ফুলে সাজালে ভাই, বামে দাও প্যারী।

তবে তো সাজিবে তোর বিনোদবিহারী।

বৃন্দাবনের সর্বপ্রধান ফুলটিই বাকি ছিল। সেই অভাবটা পশু-পক্ষীদের নজরে
না পড়িতে পারে, কিন্তু শ্রামকে ধেন বাজিতে লাগিল।

কুঞ্জ-পানে যে দিকে ভাই চেয়ে দেখি আখি।

সুখময় কুঞ্জবন অঙ্ককার দেখি ॥

তখন লজ্জিত সুবল কহিল—

এই স্থানে থাকো তুমি নবীন বংশীধারী।

খুঁজিয়া মিলাব আজ কঠিন কিশোরী ॥

এ দিকে ললিতা-বিশাখা সখীদের মাঝখানে রাধিকা বসিয়া আছেন।

স্ববলকে দেখিয়া সবাই হয়ে হরষিত—

এসো এসো বোসো স্ববল একী অচরিত ।

স্ববল সংবাদ দিল—

মন্দ মন্দ বহিতেছে বসন্তের বা, পত্র পড়ে গলি ।

কাঁদিয়া বলেন কৃষ্ণ কোথায় কিশোরী ॥

কৃষ্ণের দুরবস্থার কথা শুনিয়া রাধা কাঁদিয়া উঠিয়া কহিলেন—

সাধ ক'রে হার গেঁথেছি সই,

দিব কার গলে ।

বাঁপ দিয়ে মরিব আজ যমুনার জলে ॥

রাই অনাবশ্যক এইরূপ একটা হুঃসাধ্য হুঃসাহসিক ব্যাপার ঘটাইবার জন্য মুহূর্তের মধ্যে কৃতসংকল্প হইয়া উঠিলেন । কিন্তু অবশেষে সখীদের সহিত রফা করিয়া বলিলেন—

যেই সাজে আছি আমি এই বৃন্দাবনে

সেই সাজে যাব আমি কৃষ্ণদরশনে ॥

দাঁড়া লো দাঁড়া লো সই বলে সহচরী ।

ধীরে যাও ফিরে চাও রাধিকাসুন্দরী ॥

রাধিকা সখীদের ডাকিয়া বলিলেন—

তোমরা গো পিছে এসো মাথে করে দই ।

নাথের কুশল হোক, ঝাটিং এসো সই ॥

রাধা প্রথম আবেগে যদিও বলিয়াছিলেন, যে সাজে আছেন সেই সাজেই যাইবেন, কিন্তু সে প্রতিজ্ঞা রহিল না ।

হালিয়া মাথায় বেণী বামে বাঁধি চূড়া

অলকা তিলকা দিয়ে এঁটে পরে ধড়া ।

ধড়ার উপর তুলে নিলেন স্ববর্ণের ঝরা ॥

সোনার বিজটা শোভে হাতে তাড়বালা ।

গলে শোভে পঞ্চরত্ন তন্ত্রি কণ্ঠমালা ॥

চরণে শোভিছে রাইয়ের সোনার নুপুর ।

কটিতে কিংকিনী সাজে, বাজিছে মধুর ॥

চিন্তা নাই চিন্তা নাই বিশাখা এসে বলে ।

ধবলীর বৎস একটি তুলে লও কোলে ॥

সখীরা সব দধির ভাণ্ড মাথায় এবং রাধিকা ধবলীর এক বাছুর কোলে লইয়া
গোয়ালিনীর দল ব্রজের পথ দিয়া শ্রাম-দরশনে চলিল । কৃষ্ণ তখন রাধিকার
রূপ ধ্যান করিতে করিতে অচেতন ।

সাক্ষাতে দাঁড়ায়ে রাই বলিতেছে বাণী—

কী ভাব পড়িছে মনে শ্রাম গুণমণি ।

যে ভাব পড়েছে মনে সেই ভাব আমি ॥

রাধিকা সগর্বে সবিনয়ে কহিলেন, তোমারই অন্তরের ভাব আমি বাহিরে প্রত্যক্ষ
বিরাজমান ।

গাও তোলো চক্ষু মেলো ওহে নীলমণি ।

কাঁদিয়ে কাঁদাও কেন, আমি বিনোদিনী ॥

অঞ্চলেতে ছিল মালা দিল কৃষ্ণের গলে ।

রাধাকৃষ্ণের যুগল মিলন ভাণ্ডীরবনে ॥

ভাণ্ডীরবনবিহারীর সাজ সম্পূর্ণ হইল ; স্রবলের হাতের কাজ সমাধা হইয়া গেল ।

ইহার মধ্যে বিশেষ করিয়া বাংলার গ্রাম্যদৃশ্য গৃহচিত্র কিছুই নাই ।
গোয়ালিনীরা যেরূপ সাজে নুপুর কিংকিনী বাজাইয়া, দধি মাথায়, বাছুর কোলে
বনপথ দিয়া চলিয়াছেন, তাহা বাংলার গ্রামপথে প্রত্যহ অথবা কদাচিত্ দেথিতে
পাওয়া যায় না । রাখালের মাঠের মধ্যে বটচ্ছায়ায় অনেকরকম খেলা করে,
কিন্তু ফুল লইয়া তাহাদের ও তাহাদিগকে লইয়া ফুলের এমন মাতামাতি শুনা

যায় না। এ-সমস্ত ভাবের সৃষ্টি। কৃষ্ণরাধার বিরহ-মিলন সমস্ত বিশ্বাসীর বিরহ-মিলনের আদর্শ; ইহার মধ্যে ভারতবর্ষীয় ব্রাহ্মণসমাজ বা মনুসংহিতা নাই; ইহার আগাগোড়া রাখালি কাণ্ড। যেখানে সমাজ বলবান সেখানে বৃন্দাবনের গোচারণের সঙ্গে মথুরার রাজ্যপালনের একাকার হওয়া অত্যন্ত অসংগত। কিন্তু কৃষ্ণরাধার কাহিনী যে ভাবলোকে বিরাজ করিতেছে সেখানে ইহার কোনো কৈফিয়ৎ আবশ্যক করে না। এমন-কি, সেখানে চিরপ্রচলিত সমস্ত সমাজপ্রথাকে অতিক্রম করিয়া বৃন্দাবনের রাখালবৃত্তি মথুরার রাজত্ব অপেক্ষা অধিকতর গৌরবজনক বলিয়া সপ্রমাণ হইয়াছে। আমাদের দেশে, যেখানে কর্মবিভাগ শাস্ত্রশাসন এবং সামাজিক উচ্চনীচতার ভাব সাধারণের মনে এমন দৃঢ় বদ্ধমূল, সেখানে কৃষ্ণরাধার কাহিনীতে এই-প্রকার আচারবিরুদ্ধ বন্ধনবিহীন ভাবের স্বাধীনতা যে কত বিস্ময়কর তাহা চিত্রাভ্যাসক্রমে আমরা অনুভব করি না।

কৃষ্ণ মথুরায় রাজত্ব করিতে গেলে রাধিকা কাদিয়া কহিলেন—

আর কি এমন ভাগ্য হবে, ব্রজে আসবে হরি।

সে গিছে মথুরাপুরী, মিথ্যে আশা করি ॥

রাজাকে পুনরায় রাখাল করিবার আশা দুর্ভাষা, এ কথা সকলকেই স্বীকার করিতে হইবে। কিন্তু, বৃন্দা বৃন্দাবনের আসল কথা বোঝে, সে জানে নিরাশ হইবার কোনো কারণ নাই। সে জানে, বৃন্দাবন-মথুরায় কাশী-কাশীর নিয়ম ঠিক খাটে না।

বৃন্দে বলে আমি যদি এনে দিতে পারি

তবে মোরে কী ধন দিবে

বল তো কিশোরী ॥

শুনে বাণী কমলিনী যেন পড়িল ধন্দে—

দেহপ্রাণ করেছে দান কৃষ্ণপদারবিন্দে ॥

এক কালেতে ষাঁক সঁপেছি বিরাগ হলেন তাঁই ।

যম-সম কোনো দেবতা রাধিকার নাই ॥

ইহা বই নিশ্চয় কই কোথা পাব ধন ।

মোর কেবল কৃষ্ণনাম অঙ্গের ভূষণ ॥

রাজার নন্দিনী মোরা প্রেমের ভিখারি—

বধুর কাছে সেই ধন লয়ে দিতে পারি ॥

বলছে দূতী, শোন্ শ্রীমতী, মিলবে শ্রামের সাথে ।

তখন দুজনের দুই যুগল চরণ, তাই দিয়ো মোর মাথে ॥

এই পুরস্কারের কড়ার করাইয়া লইয়া দূতী বাহির হইলেন । যমুনা পার হইয়া পথের মধ্যে—

হাস্তরসে একজনকে জিজ্ঞাসিলেন তবে,

কণ্ড দেখি কার অধিকারে বসত কর সবে ॥

সে লোক বললে তখন রাজা কৃষ্ণচন্দ্ররায়,

মেঘের ধারা রৌদ্রে যেমন লাগল দূতীর গায় ॥

ননীচোরা রাখাল ছোড়া ঠাট করেছে আসি ।

চোর বিনে তাকে কবে ডাকছে গোকুলবাসী ॥

কৃষ্ণের এই রায়বাহাদুর খেতাবটি দূতীর কাছে অত্যন্ত কৌতুকাবহ বোধ হইল ।

কৃষ্ণচন্দ্ররায়, এ তো আসল নাম নয় । এ কেবল মুঢ় লোকদিগকে ভুলাইবার একটা আড়ম্বর । আসল নাম বৃন্দা জানে ।

চললেন শেষে কাঙালবেশে উত্তরিলেন দ্বারে ।

হুকুম বিনে রাত্রিদিনে কেউ না যেতে পারে ॥

বহুকষ্টে হুকুম আনাইয়া ‘বৃন্দাদূতী গেল সভার মাঝে’ ।

সম্ভাষণ করি দূতী থাকল কতক্ষণ ।

একদৃষ্টে চেয়ে দেখে কৃষ্ণের বদন ॥

ধড়াচুড়া ত্যাগ করিয়ে মুকুট দিয়েছ মাথে ।
 সব অঙ্গে রাজ-আভরণ, বংশী নাইকো হাতে ॥
 সোনার মালা, কণ্ঠহার, বাজতে বাজুবন্ধ ।
 খেত চামরে বাতাস পড়ে দেখে লাগে ধন্দ ॥
 নিশান উড়ে, ডঙ্কা মারে, বলছে খবরদার ।
 ব্রাহ্মণ পণ্ডিতের ঘটা ব্যবস্থা বিচার ॥
 আর এক দরখাস্ত করি শুন দামোদর ।
 যমুনাতে দেখে এলেম এক তরী মনোহর ॥
 শূন্য হয়ে ভাসছে তরী ওই যমুনা-তীরে ।
 কাণ্ডারী অভাবে নৌকা ঘাটে ঘাটে ফিরে ॥
 পূর্বে এক কাণ্ডারী ছিল সর্বলোকে কয় ।
 সে চোর পালালো কোথা তাকে ধরতে হয় ॥
 শুনতে পেলেম হেথা এলেম মথুরাতে আছে ।
 হাজির না কর যদি জানতে পাবে পাছে ॥
 —মেয়ে হয়ে কয় কথা, পুরুষের ডরায় গা ।
 সত্যমুদ্র নিঃশব্দ, কেউ না করে রা ॥—

ব্রজপুরে ঘর বসতি মোর ।

ভাণ্ড ভেঙে ননি খেয়ে পলায়েছে চোর ॥
 চোর ধরিতে এই সভাতে আসছে অভাগিনী ।
 কেমন রাজা বিচার কর জানব তা এখনি ॥

বৃন্দা কৃষ্ণচন্দ্ররায়ের রাজসম্মান রক্ষা করিয়া ঠিক দস্তুর-মত কথাগুলি বলিল—অন্তত কবির রিপোর্ট দৃষ্টে তাহাই বোধ হয়—তবে উহার মধ্যে কিছু স্পর্ধাও ছিল। বৃন্দা মথুরার উপরে আপন বৃন্দাবনের দেমাক ফলাইতে ছাড়ে নাই। ‘হাজির না কর যদি জানতে পাবে পাছে’ এ কথাটা খুব চড়া কথা ;

ভনিয়া সভাস্থ সকলে নিঃশব্দ হইয়া গেল। মথুরার মহারাজ কৃষ্ণচন্দ্ররায়
কহিলেন—

ব্রজে ছিলে বৃন্দাদাসী বৃষ্টি অমুমানে।

কোনদিন বা দেখা-সাক্ষাৎ ছিল বৃন্দাবনে ॥

তখন বৃন্দা কচ্ছেন, কী জানি তা হবে কদাচিৎ।

বিষয় পেলে অনেক ভোলে মহতের রীত ॥

কৃষ্ণ বৃন্দাবনের কুশলসংবাদ জিজ্ঞাসা করিলে বৃন্দা কহিলেন—

হাতে ননি ডাকছে রানী গোপাল কোথা রয়।

ধেমু বৎস আদি তব তৃণ নাহি খায় ॥

শতদল ভাসতেছে সেই সমুদ্র-মাঝে।

কোন ছার ধুতুরা পেয়ে এত ডকা বাজে ॥

মথুরার রাজত্বকে বৃন্দা ধুতুরার সহিত তুলনা করিল; তাহাতে মন্তভা আছে,
কিন্তু বৃন্দাবনের সৌন্দর্য ও স্বগন্ধ কোথায়!

বলা বাহুল্য, ইহার পর বৃন্দার দোঁত্য ব্যর্থ হয় নাই—

দূতী কৃষ্ণ লয়ে বিদায় হয়ে ব্রজপুরে এল।

পশুপক্ষী আদি যত পরিভ্রাণ পেল ॥

ব্রজের ধন্য লতা তমালপাতা ধন্য বৃন্দাবন।

ধন্য ধন্য রাধাকৃষ্ণের যুগলমিলন ॥

বাংলার গ্রাম্যছড়ায় হরগৌরী এবং রাধাকৃষ্ণের কথা ছাড়া সীতারাম ও
রাম-রাবণের কথাও পাওয়া যায়, কিন্তু তাহা তুলনায় স্বল্প। এ কথা স্বীকার
করিতেই হইবে, পশ্চিমে, যেখানে রামায়ণ-কথাই সাধারণের মধ্যে বহুল
পরিমাণে প্রচলিত সেখানে বাংলা অপেক্ষা পৌরুষের চর্চা অধিক। আমাদের
দেশে হরগৌরী-কথায় স্ত্রী-পুরুষ এবং রাধাকৃষ্ণ-কথায় নায়ক-নায়িকার সম্বন্ধ
নানারূপে বর্ণিত হইয়াছে; কিন্তু তাঁহার প্রসঙ্গ সংকীর্ণ, তাহাতে সর্বাক্রীণ

লোকসাহিত্য

মহুগুয়ের খাণ্ড পাওয়া যায় না। আমাদের দেশের রাধাকৃষ্ণের কথায় সৌন্দর্য-বৃষ্টি এবং হরগৌরীর কথায় হৃদয়বৃষ্টির চর্চা হইয়াছে, কিন্তু তাহাতে ধর্মপ্রবৃত্তির অবতারণা হয় নাই। তাহাতে বীরত্ব, মহত্ব, অবিচলিত ভক্তি ও কঠোর ত্যাগ-স্বীকারের আদর্শ নাই। রামসীতার দাম্পত্য আমাদের দেশ-প্রচলিত হরগৌরীর দাম্পত্য অপেক্ষা বহুতরগুণে শ্রেষ্ঠ, উন্নত এবং বিস্তৃত; তাহা যেমন কঠোর গম্ভীর তেমনি স্নিগ্ধ কোমল। রামায়ণ-কথায় এক দিকে কর্তব্যের দুরূহ কাঠিন্য, অপর দিকে ভাবের অপরিসীম মাধুর্য, একত্র সম্মিলিত। তাহাতে দাম্পত্য, সৌভ্রাতৃত্ব, পিতৃভক্তি, প্রভুভক্তি, প্রজাবাৎসল্য প্রভৃতি মহুগুয়ের যতপ্রকার উচ্চ অঙ্গের হৃদয়বন্ধন আছে তাহার শ্রেষ্ঠ আদর্শ পরিস্ফুট হইয়াছে। তাহাতে সর্বপ্রকার হৃদয়বৃত্তিকে মহৎ ধর্মনিয়মের দ্বারা পদে পদে সংযত করিবার কঠোর শাসন প্রচারিত। সর্বতোভাবে মানুষকে মানুষ করিবার উপযোগী এমন শিক্ষা আর-কোনো দেশে কোনো সাহিত্যে নাই। বাংলাদেশের মাটিতে সেই রামায়ণ-কথা হরগৌরী ও রাধাকৃষ্ণের কথার উপরে যে মাথা তুলিয়া উঠিতে পারে নাই তাহা আমাদের দেশের দুর্ভাগ্য। রামকে যাহারা যুদ্ধক্ষেত্রে ও কর্মক্ষেত্রে নরদেবতার আদর্শ বলিয়া গ্রহণ করিয়াছে তাহাদের পৌরুষ, কর্তব্যনিষ্ঠা ও ধর্মপরতার আদর্শ আমাদের অপেক্ষা উচ্চতর।

গ্রন্থপরিচয়

মজুমদার লাইব্রেরি-কর্তৃক প্রকাশিত রবীন্দ্রনাথের গল্পগ্রন্থাবলীর তৃতীয় ভাগ-রূপে লোকসাহিত্য ১৩১৪ সালে প্রথম প্রচারিত হয়।

বর্তমান সংস্করণের দ্বিতীয় প্রবন্ধ—‘ছেলেভুলানো ছড়া : ২’ ১৩৪৫ সালে প্রথম গ্রন্থভুক্ত হইয়াছে। সংকলিত নিবন্ধচতুষ্টয়ের সাময়িক পত্রে প্রকাশের সূচী নিম্নে দেওয়া গেল—

ছেলেভুলানো ছড়া^১

সাধনা। আশ্বিন-কার্তিক ১৩০১

ছেলেভুলানো ছড়া : ২^২

সাহিত্য-পরিষৎ-পত্রিকা। মাঘ ১৩০১

এবং কার্তিক ১৩০২

কবি-সংগীত^৩

সাধনা। জ্যৈষ্ঠ ১৩০২

গ্রাম্যসাহিত্য

ভারতী। ফাল্গুন-চৈত্র ১৩০৫

১ ‘মেয়েলি ছড়া’ নামে মুদ্রিত।

২ ১৩০১ মাঘ সংখ্যায় সম্পাদক রজনীকান্ত গুপ্ত, সংকলিত তিনটি ছড়ার এক-একটি পাঠান্তর পাদটীকায় দেন। (সেগুলি পরপৃষ্ঠায় দ্রষ্টব্য।) তাহা ছাড়া, ১৩০২ কার্তিক সংখ্যায় ‘বাকুড়া-বেলেতোড় হইতে সংগৃহীত’ ২৬টি, ‘মেদিনীপুর হইতে সংগৃহীত’ ৪টি, ‘বন-বিষ্ণুপুর হইতে সংগৃহীত’ ৮টি এবং ‘সাঁওতাল পরগনার ছড়া’ ১৬টি রবীন্দ্রনাথের ছড়া-সংগ্রহের পরিপূরক হিসাবে মুদ্রিত হয়। সংগ্রাহকেরা বলেন, এগুলি প্রধানত পাঠান্তর বলিয়াই গণ্য হইবে।

৩ ‘গুপ্তরত্নোদ্ধার’ নামে মুদ্রিত।

“শ্রীকেশরনাথ বন্দ্যোপাধ্যায়-কর্তৃক সংগৃহীত ও প্রকাশিত” ‘গুপ্তরত্নোদ্ধার বা প্রাচীন কবিসঙ্গীতসংগ্রহ’ গ্রন্থের সমালোচনা-প্রসঙ্গে লিখিত।

পাঠাস্তর

বর্তমান গ্রন্থের ৫০-৫৩ পৃষ্ঠায় সংকলিত ছড়ার অংশ একটি পাঠাস্তর সাহিত্য-
পরিষৎ-পত্রিকার (মাঘ ১৩০১) সম্পাদক পাদটীকায় দেন—

আগড়ুম বাগড়ুম ঘোড়াডুম সাজে ।
ডাহিন মেড়া ঘাগর বাজে ॥
বাজতে বাজতে লাগলো হলি ।
কে কে যাবি কদমফুলি ॥
ওন্ গোন্ টিয়ে টোন্ ।
লাল বাগানের লাল ঝটকা ।
লেগে যা গোয়াল ঘটকা ॥
হলুদ ফুলে কলুদ ফুল ।
আয়রে আমার টগরের ফুল ॥
কাকী রোধে কুকী থায় ।
হিম সময়ে দুঃখ পায় ॥
বনের বাঘে থায় কী ।
কপ্লে গায়ের হুধ ॥
কপ্লে গাই নড়ে চড়ে ।
পান ছিটকির বাড়ি মায়ে ॥

সংকলিত প্রথম ছড়ার (পৃ. ৫৩) পাঠাস্তর—

মাসি পিসি বনগাঁবাসী বনের আগে টিয়া ।
মাসি গেলেন শ্রীবন্দাবন দেখে আসি গিয়া ॥
কিসের মাসি কিসের পিসি কিসের বন্দাবন ।
এতদিনে জানলেম আমি মা বড়ো ধন ॥
মাকে দেব শঙ্খ সিন্দূর ভাইকে দেব বিয়া ।
সোনার মুকুট মাথায় দিয়া তীর্থ করি গিয়া ॥

সংকলিত একাদশ ছড়ার (পৃ. ৫৭) পাঠান্তর—

ঘুঘু—ঘু!
পেটে—ফু ॥
কী ছেলে হ'ল ।
বেটা ছেলে ॥
ছেলে কই ।
মাছ ধরতে গেছে ॥
মাছ কই ।
চিলে নিলে ॥
চিল কই ।
ডালে বসেছে ॥
ডাল কই ।
পুড়েঝুড়ে গেল ॥
ছাই মাটি কই ।
ধোপায় নিলে ॥
কী করলে !
কাপড় ধুলে ॥
সোনা কুড়ে পড়বি, না
ছাই কুড়ে পড়বি ? ।

৬১-৬৪ -সংখ্যক ছড়া (পৃ. ৭১-৭২) কোনো বিক্রমপুরনিবাসী ভদ্রগৃহস্থ হইতে সংগৃহীত ।

৪৭-সংখ্যক ছড়ার একটি পাঠান্তর হুগলি-অঞ্চলে এইরূপ শোনা যায়—

কাজল বলে আজল রে ভাই আমি রাঙা মুখের পান ।

কালো মুখে গেলে পরে আমি হই গো হতমান ॥

হরিশচরণ বন্দ্যোপাধ্যায় -কর্তৃক সংকলিত বঙ্গীয় শব্দকোষ-অনুসারে : আজল=‘আদরিণী’ বা যে আদরে নেক। সাজে ।



মূল্য ১২.০০ টাকা

